

OL “VANGĚL DĚL SAN LUKA”

KÖNTÂD SŌ LIBĚRAMĚNT DĚ Ū BĚRGAMÂSK DĚL MCMXC
È PĚJÈ DĚ IMPRĚSĴŪ DĚ LA SŌ IŇŌRANSA PĚRSUNÂL

2. PREÁMBOI
4. KO PRIM : OL BATESTA E 'L GEŽŪ
5. KO SEGÓND : KOMAKĚ NAS GOÂN
10. KO TERS : KOMAKĚ NAS E KRES GEŽŪ
14. KO KUART : A NÂŽARET E A KAFAREN
19. KO KŪINT : A L'CAMA I SO PRIM AMÎS
22. KO SEST : I DUDES PO I BEÂC
26. KO (D'I) SET : KI KE L'Ê OL BATESTA
30. KO (D'I) OT : SOMNA – BORASKA – GAÎR
34. KO NŌV : MISĴŪ – PA E PES – TRASFIGŪRASĴŪ
38. KO DES : MISĴŪ IN 72 – SAMARETÂ BU
42. KO ÖNDES : PADER NOST – GONA
47. KO DUDES : PROIDENSA – SPETÂ
50. KO TREDES : FIG' – LEÂT – PORTA STRECA
53. KO KUATORDES : BANKĚC – PREENTÎV
55. KO KŪINDES : PEGRA PERDIDA –
SCEC LAATÎV E RAŇÎ DE PADER ISĴŌR
57. KO SEDES : FATŪR – SĴOR E POERĚT
60. KO DESSĚT : SKÂNDŌI – FI DEL MOND
63. KO DEŽDŌT : SCEC – CEKO DE GEREK
67. KO DEŽNŌV : ŽAKÉ – BANKE – PALME
70. KO (V)INTE : IT – SET FRADEI ŌNA MOĚR
74. KO (V)INTŤ : MONEDINE – FI DEL MOND
76. KO (V)INTEDŪ : SENAKOL – ĜAL DE PĴERO
82. KO (V)INTETRÎ : PELÂT – KALVARE
87. KO (V)INTEKUATER : A LA TOMBA – ASENSĴŪ
91. KUA A 'L “VANGĚL DEL LUKA” SEGÓND ME

..... istruzioni di lettura / manéra dè lèzèl sò :

a, b, d, f, l, m, n, p, r, s, t, v : lètre tūso “italiane” (come “italiano”)

â = tònica; à : in voci imperative; ǎ = voci di verbo “avere”

b : a fine parola, pronùncia “p”

c : leggi sempre “c” come in “ci, ce” [*per “ca, chi, che” trovi*]

k, K : come in “ca, co, cu, chi, che”

d : a fine parola, pronùncia “t”

e : come “è” aperta/larga; ê = tònica o verbo “èssere”; è = in voci imperative

ē : come “é” stretta; ě = tònica;

é = in voci imperative, o di verbo “èssere”; ě = in verbo “avere”

g, G : come in “gi, ge”; finale di parola leggi “c”

g, Ğ : come in “ga, go, gu, ghi, ghe”; finale di parola, leggi “k”

ī : “i” di “istinti”; î = tònica; ĩ = voci di “avere”; ì = imperative

j : come in “più, già, fiocco, media, ...” mai tòniche [*così suona la “i” isolata davanti ǎ, ǒ, ĩ, ě, é, ê* (avere, èssere...) e parole iniziati con vocale]

l : come in “foglio, vegliare, egli”

ñ, Ñ : come in “legna, maligno, ignorare”

o piena : come “ò”, aperta, larga; ô = tònica; ò = voci imperative

o ridotta : come “ó”, chiusa/stretta; ǒ = tònica; ó = voci di verbo “avere”

ö : come francese “eu/oeu”; ǒ = tònica

z : come in “esosi”... non “sospirata”; finale leggi “e_{ss}e”

u : come italiana “ugo, gufo, Però” e francese “ou”; û = tònica

u : come in “qui, sguardo, frequenza, seguire, quota”

ü : come in “würstel, e francese “u” netta; ű = tònica

ü : “glissata” come “u”, mai tòniche – v : finale, leggi “f”

parole ordinariamente “piane”, salvo accento tònico espresso

o' = ol ; a' = a 'l ; de' = del ; sò = sò ol ; ko' = kon ol ; é = vieni! ; à/á = va!

altri aiuti di lettura/dicitura in “pèr ol dumela è pasa : teoria” p. 77-91-96-102

PREÂMBOI DEL
“VANGĚL SEGÖND OL LUKA”

Dapo ke zemô in tace i s'ê inziñâc a met zo in urden ôna storja d'i laür ke g'ê söcedîd e ke i me interesa a töc noter, isě kompâñ ke m'i ä köntâc sö kei ke de preñsepe i n'n'ê stac testemone koi so ög... e dapo ke me so infurmâd me per be sö töt kuat, infina d'i prim laür... m'ê parîd a bel de skrien zo poa me be in fila ôna traca, in manera ke m'pöde rendes könt kon buna rezû del fondamět ke l'istâ sota kel k'i me fa imparâ amô a 'l de de 'nkö.

Oter ke me lezi sö, dokâ, teñi semper a met ke me ke ve skrie ö mia est töc i laür ke ve könte sö: ma ke perö ö est in faca skuase töc kei k'i ä est i fati, ke i a köntâc sö per prim, me... e ke tace laür i m'ê stac köntâc sö prope de lur de prima uz, e amô fresk de Senakol. Ñe pjö ñe meno, êkola. Ma sul ke adês perö m'ä ülfîd urdenâ impö be töt, ni-ger sö bjank.

Po teñi semper a met akâ ke töt kel ke g'ê adês de skriîd zo a l've ü tok dapo ol fato d'i fati: dapo k'i testemone i ä rekoñosîd ol Gezû iv, dapo la so mort in kruz; e 'lura, e sul ilura, i ä kapîd tace laür de prima, e sul ke 'lura i s'ê metîc dre a camâ “Siñûr” poa 'l Gezû, mia pjö sul ke 'l Gran Dio Sant, Pader indel cel. Ke prima i a camaa per nom “Gezû” o “Maester”, o “Amîz” komâ lü lur, o “kapo” kei pjö politek; po in tate d'otre manere de konfidensa e de respêt, ma negü ñemô mia “ol Siñûr Gezû, Gezû ol Siñûr... ol nost Siñûr Gezû Krist”. E me, dokâ, ö mia riteñîd de turnâ semper indrě e de sfrondâ zo ol rendikönt, ma sě de lasâ skuaze despertöt intrega l'amirajû e la venerajû per ol Gezû... kompâñ ke l'ö rileada e 'mparada a sköla d'i so Apöstoi, d'i so parěc de lü, d'i so amize e amîz, e 'nfina d'i so kuntrare, kei ke l'g'ia fac del be. Po l'ê naturâl, ma l'dige alistês: i nom, cêrtoza, i sarâ pjö ñe italâ ñe latî e men amô ebrě, ma metîc zo in bergamâsk: ke sedenô, prezempe, per din adoma ü per töc... la Maria la g'ävrês d'ês (a presapök) Mirjam. A di la eritâ, ö lasâd istâ amô Pjero, zemô trop fjurîd; ke l'pöderês vês invece a “Peder”, pjö izî a 'l latî e a “preda”.

E amô a ü laûr sul regordis be semper, ke l'ê mia 'l meno. Me po, ke v'ô ultâd ke in bergamâsk kel leber læ, l'ô lezîd sô in itaîâ, ke ü falî me se ne 'ntende: ma, be deluntâ de îga kapîd det töt kel ke ô lezîd sô... ve rekomande ak a oter de imparâ a lez sô ol originâl autentekâd e de fidâs po mia trop dela mea skritûra 'ndei pas pjö kritek o defîcei; ke me ô fac i salc mortai a met mia zo dei laûr senza sügo per me... ke so a pjötöst materjalôt; abekê, kon töc i me retök, me g'ô alistês l'ambisjû de püdî ês teñîd, in vja de mâsima, “fedël”. “Fedël”, ne... in tât ke kon parole de 'nkö s'pöl vês fedei a ôna storja de dumela añ indrê, skriida zo la prima olta ü melanövsentsinkuantâñ fa: e 'nkö prezempe, m's'ê a 'n fastöde a kapîs zemô adoma a parlâ de besôc e de lüv e de pastûr, ke a 'l me paîz; kompâñ se m'g'ès de parlagä a 'l san Luka... de kanû (de melgôt o de gu e-ra), de cakolât, o de bombe inteligente e radar: per di sô ergöt de in kors intât ke skrie, a i noste feste de Paskua 1999 (ma zâ a i noste feste de Nedâl 1998, kon buna paz d'i ângei, 'ste añ: bombe krestjane sô 'l ko de krestjâ, sirkade o no). Però kesto, pota, a l'völ mia di ke a kel tep læ g'ê mia söcedîd neğöt, ne, e ñe ke la kambjerâ mai, êkola.

E oter. Siñûr...: ârda zo 'mpo te, sedenô ke m'se salva pjö ön'otra olta!

E dokâ, kua t a parole amô, prezempe, teñî po a met be ke ge digerö “amîz” a i so amîz del Gezû k'i ge 'ndaa dre e i vülia 'mparâ (de lü), po ge digerö “dom” a 'l “Tempjo de Gerüzalêm”, “prec” a i “sacerdôc del dom de Gerüzalêm” (mia kei k'i eñia 'nsâ adoma oñe tat, d'i oter paîz e sitâ, a fa 'l so brao ôfese), e “ka de dotrina” o “sala dutrina” a i “sinagoge”: per parlâ kome maje, e miga a sköla.

Po g'ê a (o') “speret sant”: e 'l Luka l'dizia prope mia – kompâñ ke de noter bergamâsk inkö; a l'so mia de kua t – o' “speret de dizinfetâ o de fa sô la grapa”; ma noter inkö m'sa ñemô mia dil mei de isê: “l'intensjû, 'l sentimênt, ol fjat/respîr... de du k'i se baza sô de murûs”, per proâ a spjegâs kondü parağû, se ge rie almeno 'mpo a presapök; e per fa du: forsâk impö a kompâñ del lac d'öna mader.

KO PRIM : OL BATESTA E 'L GEZÛ

Ol an kel d'i küindes del so reñ del Cezer Otavjâ 'l G'usto (ol so neüd fjölâd del Gô-lo Ceser), ke a 'l goerno de la Gödea l'ïa mandâd ilâ 'l Ponsjo Pelât, e kapo in Galelea l'éra ü Erôd, e ü so fradêl a l'éra kapo del'Etürea e Trakonêteda, e ü tal Lezaña kapo de Abilena; gran kapi d'i prec d'i ebrê ol (Go)An e 'l Kâefa, êkola: gôsto 'n kel tep lě, ol Sant Siñûr a l'g'ã komandâd a 'l so scet del Żakarea, ol Goân, ke jura l'éra amô vja fo 'ndel dezêrt... a l'g'ã komandâd de parlâ in mez a la zet. Isě, ol Goân a l's'ê metîd dre a 'nda 'nsô e 'nzo per ü tok del fjôm Żordâ, e l'predikaa fo de laâs zo bei nec, de konvertîs, per vîga 'l perdû d'i pekâc, prope komê g'ê skriîd zo det indel so leber d'i orâkoi del profêt Ezai: “Uz de ü ke uza sô 'nsâ e 'lâ, de preparaga ôna vja bela dreca, de 'l dezêrt infina a i sitâ... per ol re del Grand Siñûr ke l'ê dre a riâ! 'Nğualî zo i monta-ñete dokâ, 'mpjeni sô i fope, i sentêr a gombet indresîi fo, e ke ge see mia pjô de ostâkoi... isě ke ü per ü töc aturen i pöderâ ed ki ke 'l Dio Grand a l'manda ke per salvâm!”.

A n'ne kuria lâ a muntû per fas laâ zo. E isě, n'ne kapitaa lâ poa tace de kei ke se an-taa de konôs benone la lege e oservalâ a pontî, lur, po de fağla oservâ ak a i oter.

E lü l'ge diaza isě: — Brôta rasa de lëpere! Kom'êla, po, ke ve e mia pura de ês kasti-gâc, a ure o a de!? Fila ed pjôtôst koi veste ovre, kela oja ke de kontrisjû! Metis mia dre a köntâm sô a me ke g'ï ol Abrâm per pader... voter! Ve digerô ergôt poa me, jura ...ve dige isě ke 'l Dio Sant a l'ê bu de tra fo a de kei plok ke ...tace bei seec viv per ol Abrâm, e a kei... ge okorerês nê 'l vost taetî per fagel ved a i oter (de ês iscêc de l'A-brâm)! Ma uramai, l'ã a perdîd la pasensja: la zğür l'ê lě a la raîz dela pjan-ta, e la pjan-ta ke la porte ü frôt mia bu la e teada zo, po bôtâda det indel fôg! —

La zet, i ge domandaa g'ŕei de fa kozê, dokâ, e 'l Goân a l'ge respondia isě:

— Ki ke l'g'ã dre du mantei, a l'fage ü per ü kon ki ke n'n'ã mia ke de kuarcâs zo per durmî ke stanôc... e l'istês a l'fage ki ke g'ã dre de majâ asě per du —

A i eñia lâ a fas batezâ poa kei ke i skôdia i tase. E i ge domandaa poa lur “maestro,

dîm koze m'g'âi de fa kozê, noter...”, e lû l'ge respondia isê: — Pretendî mia de sköd de pjö dela so tangenta stabelida... ke per kela i v'ã mandâd insã! —

Po, i g'ã domandâd akâ dei guardje, lur koz' i g'ïa de fa... e lû l'g'ã respondid isê:

— Figa mia 'ntort ñe svjolensa a negũ... po kontentis dela osta paga, oter! —

Oter. E sikome ke la zet la se spetaa ergöt de gros... e 'ntat i se domandaa se 'l Goân l'éra diolte prope lû ol mesia... ațura 'l Goân a l'ã uzâd sô bel car fo sô i rie:

— Adé ke me ve bateze adoma ko' l'akua... e ve lae zo adoma de fo. Ma uramai a l'ria ü ke l'ê 'nfinamai de pjö de me, ke me ge entre po ñe koi so strenge de dezligâ fo, kompân k'i fa i stödênc kol so maestro, po i servidûr kol so padrû: e lû sê, ke l'ria, ekol... a l've laerâ zo de det, a speret e fög! A g'l'ã 'ndi so ma lû, sô l'era, la perga de bat, e la pala de fa ent e sernî fo 'l formët de 'l gaër... ol formët det indê so braa arka panera, e 'l gaër det indel so bel fög sensa mai fi! —. Isê, kon kele parâbole ke po kon tate d'otre amô, l'ge predikaa fo la buna nöa a la zet, dre lâ a 'l fjôm. E, intat ke l'batezaa, g'ê tokâd de batezâ poa 'l Gezû. E 'ntat k'i pregaa, a l's'ê komê dervid fo 'l cel, po sô sô 'l ko del Gezû... s's'ê est ôna kolomba, e de 'l volt a s's'ê sentid kompân d'ôna uz a di sô isê: — Te set te ol me scet ol pjö kar, êkola. Me se ante prope, de te! —

KO SEGÓND : KOMAKÊ NAS GOÂN

Ma... ěrei ki, po... 'sto batezadûr e 'sto batezâd ke, a... e sâltei fo de 'ndoê, per la no-sta storĵa, e?

A kel tep lâ ke, ü trent'añ indrê, l'éra re in Gödea ün'otr'Erôd, dokâ (ol prim, ol Grand, ke l'ÿa imbelid ol Dom)... g'éra ü pret d'i ebrê, de nom Zakarea, dela kongregasjû del Abea. La so moër la eña fo de la trebû del Arôn e la se camaa Lizabeta. A i éra töc du persune göste denâc a 'l Dio Siñûr, ke i kaminaa drec indei so komandamênc e indei so precêc del Dio Siñûr. Ma, érel per lü o érela po le, i g'ÿa mia de sccec: ge n'éra mai ñe riâc, e töc du uramai a i éra za bei tempâc, ak.

Ałura, g'ê söcedid ke 'ndi so facende de pret, a 'l tórno dela so kongregasjû... a g'ê tokâd in sort a lü de 'nda prope det indel santüare segrêc a ofriga ol incêns, intât ke tötta la zet lâ de fo la pregaa, in kel'ura læ. E isê, a l'g'ê komparid ün ângel del Siñûr, lâ a ma dreca de l'altâr. A edel... ol Zakarea l'ê saltâd indrê e l's'ê stremid asê. E l'ângel a l'g'â dic isê: — İga mia pura, te, Zakarea! T'êc pregâd, e te set istâc iskoltâd. Defati, la to moër, la Lizeta, la te tirerâ 'nsem ü scet, e te te l'camerêc Goân, regâl del cel. A l'sarâ 'l to vant, la to alegresa... e poa tace d'oter i ge n'âvrâ botêp ke l'see nasid! A l'sarâ grand a i so ög del Dio Siñûr, a l'sarâ ü nazerê, de kei ke i biv mia i ñe i se tea zo i kiei; a l'sarâ pje de sant isperet zemô 'nde' pansa dela so mader. A l'konverteserâ a 'l Dio Sant ü muntû de esdraelite. Prope lü l'kaminerâ denâc a 'l Dio Siñûr kol isperet e la forsa del Elî, per fa turnâ i pader a interesâs d'i so sccec e fai turnâ sae, kei k'i se resulta, e fa pas intrê pader e sccec kompâñ ke l'diz ol Malakê: sae 'ndel doër e sapjênc, de traga 'nsem amô a 'l Dio Siñûr öna nasjû domêstega, e mia adoma tace selvadeg! —

Ol Zakarea, ałura, a l'g'â dic isê a l'angel: — Ma, dim impö, te: in ke manera pöderö po saî ke l'ê ira töt kel ke te me diget, a, e fal deentâ ira? Me, pota, so a eg uramai, e la me moër l'ê pjötöst inâc koi añ akâ le! — E l'angel a l'g'â respondid isê:

— A l'set mia, te, ki ke so me, e? Me so l'arkangel Gâbrjêl, ke sto semper lâ denâc a 'l

me e 'l to Siñûr, êkola: e so stac mandád ke a portât istâ buna nõa. E adês, te te deenterê möt e te parlerêt pjö 'nfina ke l'söcederâ kel ke t'õ dic. Isê te 'mparet a kredem, e te se anterêt mia prima del tep! Ma, iga mia pura te: te deenterêt pader... po te parlerêt amô, te. Adio! —. De fo intât la zet a la spetaa, e l'ge paria mia normâl ke l'istês det isê tat indel tabernakol. E kuand ke l'ê eñîd fo... l'ge riaa pjö a parlaga: isê, i â kapîd ke lâ de det a l'g'ïa ũd ön'aparisjû. A l'ge faa sö d'i señ koi so ma, ma perô l'parlaa mia!

Po, fenîd ol so törno de servî lâ 'ndel santöare, l'ê turnâd amô a ka soa.

Fatolê, delê kuak de... la so moër l'ê eñîda a pont. Perô per sik miz la s'ê ñe faca ed in gir, e la pensaa: — Adês sê ke, prope, ol Dio Sant Siñûr l'ã ardâd zo, e l'm'ã esta: e isê poa me g'ov rō amô 'l me göst unûr in paîz —.

Oter. Dapo... dre a i so ses miz dela Lizabeta, ol Gran Dio Siñûr... l'ã mandád zo amô 'l so arkangel Gabrijël indŭ paîz dela Gâlelea: a Nâzaret, prope; i â mandád lâ d'õna zûena muruza ke la sarês deentada la so moër del Gozep, ü zuen dela so trebŭ del re David. A l'ê 'ndac lâ de le, po l'g'ã dic isê:

— Cao Marî, e sö alegra! Paz a te, belesa pjena del me Siñûr! —.

A sent kele parole læ, le l'ê restada skuaze a mal, e la se domandaa 'ndo l'vŭlia riâ, kel læ, a salüdâla 'n kela manera læ! Po, l'angel a l'g'ã dic amô isê:

— Íga mia pura, te... Marî. Te, te g'êt vŭd la grasja de pjaziga a 'l to Siñûr. Prope: ol Dio Grand, ol me e 'l to Siñûr... adês a l'te õl mader: ke isê te te ge ferê nas ü scet, e te l'camerê Gezû, “kel ke de 'l cel a l'te salva”. A l'deenterâ ü grand om, e l'sarâ camâd “ol so scet del Dio Ol Pjö Olt in del cel”, ak: ol me Siñûr a i a farâ deentâ ü re kompân del re David, ke l'ê so pader a lü, e isê l'reñerâ senza mai fi sö la so ka del Gakôb! — [*...i a farâ deentâ kel ke akâ 'l vost pader David a l'isperaa... e ke la spera õne braa fonna d'Ezdraël: ke isê 'l so reñ del Dio Sant a l'feneserâ ñe mai, per la so zet del Ezdraël*].

A 'l ke, kompân de 'l Zakarea, la Marî la ge diz isê: — Ma... kom'él po posibol... ke me l'so ñemô mia se 'l me Gozep a l'me spuza, in fi d'i kõnc; e m'sarês po semper a du poerêc, oter ke re! —. E l'angel a le: — Te, fides! Ol rest, a l'ê doër del cel e olontâ del

me e 'l to Siñûr. A l'ê mia ñe ü zök ñe ü bröt iskêrs: l'ê ol amûr mandâd de 'l cel, ke l'te 'mpjeneserâ kola so lüs! A l'te naserâ ki ke t'õ dic, e l'sarâ "ol to scet ke t'l'ã dac ol Dio Sant"! E a 'l to Gozep, poa lü g'õ ergõt de diga, me, sô de 'l volt: e l'sarâ dekor-de, mia pura, te! E te, söbet dapo, te 'nderë vja per impö. La to pareta Lizeta... skólta be adês te, e próa bofa: la speta gösto zemô poa le! Kela k'i camaa la seka, la söca... l'ê zemô de ses miz! Isë, po... te ge krederët, ke negõt a l'ê imposibel per ol nost Dio Sant, per ol me e 'l to Siñûr! — Hura la Marî la g'ã dic isë, kompân ke l'ia zemô parlâd inde Bibja ön'otra zueneta kol so pader: — Cêrtoza: me so e öle restâ öna serva fideta del me Padrû! E dokâ, l'me söcede pör kompân ke te m'ët dic te —.

Po, ol angel a l'ê desaparîd: l'ê pasâd de lâ a fa la so part kol Gozep; e amen: kel ke l'g'ëra de söcëd l'ê söcedîd, e deograssja!

Ü kuak de dapo, d'i so bele koline de Nâzaret, la Marî la s'ê 'nviada lâ de fresa a ü pañz dela Gödea, sô 'n montaña. Riada det indela so ka del Zakarea, l'ã salüdâd la so pareta Lizabeta. E in kel ke la Lizabeta l'ã sentîd la Marî a salüdala... o' scetî l'ge s'ê ultâd, det inde pansa. E jura la Lizabeta, töta ispirada, a l'ã uzâd sô, prope uzâd, isë:

— A te, benedeta 'ntra töte i fomne del mond! E benedët poa 'l to scet! Koze me kâpitel mai, a me... ke la eñe ke de me öna mader del Siñûr kompân de te? Ke, äda: apena ke t'õ sentida a salüdâm, a l'me s'ê ultâd det o' scetî, de alegresa, deante a 'l to: e adês së so po sigüra ke l'me naserâ. Gräsje, ke ta set veñida ke! Po, beada te e l'âanima to, perkê te g'ët kredîd ke l'sarês söcedîd prope isë komê ke l't'ã ispirâd ol nost Grand Siñûr! Ke, noter du ke... m'g'l'ã ñemô mia dic a negű, ke me spetae —.

Ałura, la Marî l'ã dic isë [*...la Marî e la Betî i ã dervîd fo ol leber del Zakarea, kel d'i salmi e kântici, e 'mpo i ã pregâd a bras, impö lezîd sô e kantâd, a presapök isë, impö öna 'mpo l'otra; e i balaa ak... kompân de la so mader del Samüël kuand ke l'ê 'ndaca 'lâ a 'l Dom a di grasje de' scet tat pregâd*]:

— A l'see glôrea a 'l Siñûr Dio kon töt ol me fjat, e alegresa per lü kon töt ol me kör! Êkola: adês së, poa me töta 'ntrega kante la so grandesa, e so 'mpjenida de 'l so regâl!

Perkê lû l'm'ă salvada de 'l dizunûr: ke l'g'ă ũd a kôr la pôera situasjû de la so serva. E isê de adês a 'nda 'n'nac, tîc kei ke nas i me digerâ beada, per i gran laûr ke l'ă fac kon me, lû ke l'pöl töt, lû, ke sul ol so nom de lû l'ê "Ol Töt Sant", e 'l so bu kôr a l'ê per oñû ke me nas, de pader a scet, intrâ kei k'i g'ă 'l so sant timûr. L'ă 'mpeñad tîta la so forsa a desfâ sî i so progêc d'i sîperbe, l'ă skañotâd zo d'i so skrañ tace ke kîntaa tat, lur: e l'ă trac in pe i ôltem. A l'ă 'mpjenîd sî de oñe bededio i morc de fam, e i sjo-rasû i ă kasâc ivjâ a ma ôde. A l'g'ă dac ôna ma a l'Ezdraçl, ol so scetî e servidûr... la so zet, a l's'ê regordâd del so bu kôr de Lû, prope kompâñ ke l'g'ă imprometîd a i nosc veci d'ôna ôlta, in pro del so Abrâm e de tîc i so neûc d'i so neûc per semper! – .

[...“kon töt ol nost fjat ...kon töt ol nost kôr ...a l'm'ă salvade ...i so brae serve ...i me digerâ beade ...l'ă fac prope kon notre”. Ma forsâk, a strenz: “finfî, grasje a Dio m'sarâ kontete a notre do, beade e unurade per i nost iscêc ke me naserâ”.]

Delê 'mpo, êkola, riâd ol so tep, la Lizabeta la g'ă ũd, e l'ă fac nas ol so scetî. I vizî e i parêc, isê, a i ă est ke 'l Siñûr a l'éra stac grand poa kon le, indel so bu kôr, e i ge faa ak'a le i so bei kömplimênc. In kel d'i ot de, i ê eñîc in ka per faga la so fatûrina d'i mascî 'lâ de lâ e fo per l'Âfrika. I ũlia mêtega de nom Zaker, kompâñ del so pader... ma la so mader la salta sî le a diga:

— Negôt afâc... A l'g'ă de camâs Goân, regâl del cel! —. I ge diz isê, ilura: — Ma... se g'ê det ñe negû d'i to parêc k'i se cama isê, dokâ, a te! —. Po de lâ, a señ (kompâñ se lû l'éra a surd, e mia adoma môt), i ge domandaa poa a 'l so pader [ke l'ge fes ved a señ] komê l'vûlia ke l'se camês. Lû... l'g'ă sirkâd de skriv, po l'g'ă fac zo isê: “A l'g'ă de camâs Goân”. Isê ke tîc a i ê ñak restâc: — Alura i ê prope dekorde isê! Sarala staca le, a ũlî isê... o l'ê lû ke l'perd impö de ko? A, poer iscêt a lû! —.

E, apena ke l'ă skriîd zo... a derv fo la boka ge s'ê dezligâd fo la lengua, e l'parlaa, e l'benedia 'l Grand Siñûr. E, dokâ... pje de santa 'spirasjû, a l'g'ă predic isê:

— A l'see benedîd ol Siñûr... ol so Grand Dio del Ezdraçl! Perkê l's'ê müid per dezli-berâ fo la so zet. E l'me fa nas ü, ke la so forsa la me salverâ tîc kuance, ü dela so

famea del David, ol re so servidûr: kompân ke l'îa za dic sent e po sent'ân indrě... per boka d'i so sanc Profčë! E l'me dezlibererâ fo de töc kei k'i me fa de 'l mal, po de töc kei k'i me öl mal. Isě... l'me fa ed ol so bu kör kompân ke dre a i nosc veci zemô de j u-ra: a l'se regorda amô del so pato sant, kel ke l'g'îa gürâd a 'l nost pader Abrâm: de fa isě ke öna ölta amô, dezliberâc fo d'i samfe de kei k'i me skisa sota, a m'pöde sta ke a servîl senza pure, töta la eta denâc a lü, semper a fa kel ke l'ê göst e sant! E (kisâ, po... magare) prope te, scetî, te serět camâd “ol so profčët del Dio Ol Pjô Olt!” e te vj azerět denâc a 'l Grand Re, per preparağa la so strada, per faga koñôs a la so zet la liberasjû, ol perdû d'i so kolpe in grasja del so grand bu kör del nost Dio Grand: ke isě l'me eñe-râ inkontra, kompân d'ü sul ke lea sô olt a fa de senza pjô ñe noc, dopo... a faga car a kei k'i se troa kucâc zo 'ndel fosk k'i sômea ombre de morc; e per indresâ zo öna ölta buna per töte i nosc pas dre a i sentër dela so paz! —. [Certo ke l'îa 'mpo a ezagerâd... kome pader noël mia pjô zuen, e dokâ pjô kontět amô, e poa kome eco del Ezdračël, ke töc i a koñosia per tranküil e moderâd, e koi pe per tera. Oter.]

Töc kei ke staa lě aturen, pota, i ê restâc pjô zbatîc amô. E 'sti fati ke s'i köntaa sô fo 'n gir per töta la montaña, e töc kei k'i a sentia i se dizia töc pensûz “koze deenterâl kozê, po, 'sto scetî ke!? Perkê, pok ma sigŕ, a g'ê la so ma del Sant Siñûr sô 'l so ko! Ke, a sent komâ l'ê 'ndaca... a l'ê 'ndaca kompân ke g'ê nasîd ol Gedeû ol Sansû e ol Samüčël... E dokâ, m'indarâ po a ed”.

E o' scetî l'kresia, e l'éra ü speret fort.

...Po, de zuen, sotrâc so pader e so mader, lü l's'ê ritirâd fo 'ndel dezêrt, fin'a 'l so momênt ke l'g'îa de faga ed lü ki ke l'éra, a töt ol Ezdračël.

...Isě kom'a m's'ê po metîc dre a köntâ sô noter, mia îra?

KO TERS : KOMAKË NAS E KRES GEZÛ

Oter. La Marí l'éra staca 'nsö lä kola Lizabeta ü tri mižêc, po l'ê turnada zo a ka soa, prima ke metes de vjaz a la fes trop fadiqa. Ma dapoo...

E ìhura po, a kel tep lä, a g'ê riäd fo ön urden del Cezer Gùsto... ke l'vülia saî de kua-ce ke l'éra 'l padrû lü, a 'l mond (...figürâs: padrû, e?! Ma lü o ergüdoter i ge kredia; töcimanere): l'éra 'l prim d'i könc d'i ko per i tase de kei ke l'ã fac in Palestina ol Küe-rî, kuand ke l'goernaa 'ndela Serja (e isê n'n'ã po fac deentâ förjûs tace, ko' 'sta troada kontra 'l cel, e l'ã fac nas i partizâ zelôc). E i 'ndaa 'là per forsa töc a notâs zo oñü a 'l paîz ke l'éra kel d'i pjö tace dela so kazada. Poa 'l Gozep, dokâ, sikome ke l'éra dela trebû del re David... e speta e speta... g'ã tokâd indâ 'là, de Nâzaret in Galelea, infina a 'l paîz de Betlêm in Gödea, per notâs zo kola Marí, la so moçr... ke l'éra grosa. E 'ntat k'i éra lä, g'él mia riäd a per le 'l so tep de ìga, êkola?! E isê, la g'ã üd ol so prim iscêt: e g'ê tokâd pugâl zo sura öna braka de paja indü büz de korna per i besce d'ü so luntâ parêt del Gozep, perkê g'éra mia stac post per lur, lä, in mez a i persune: g'éra za pje depertöt, a i éra riâc lä tarde.

A g'éra lä, aturen per la kontrada, dei pastûr k'i dörmia fo a i stele, de faga a törno la guardja a i besôc d'i so padrû. E isê l'ge s'ê prezentâd ol angel del Siñûr e öna lüz pjö fenida, la lüz dela so glôrea del Dio Sant, a i ã cirkondâc in pjena noc: e jura... i ã po ñak capâd öna bela pura! Ma l'angel a l'g'ã dic isê: — Ìiga mia pura, oter!, ke g'ö de div ü gran bel laür, de fa festa töt ol mond. Ke, indel so paîz del re David, inkö g'ê nasîd kel ke l've salverâ: ol vost mesia siñûr! Lei sö... müis fo. Ederî e kapeserî: troerî lä ü scetî ultâd det in du panizei, pugâd zo 'ndöna braka de paja —. E söbet dre a 'l so parlâ del angel i ã a sentîd öna kansû de mela ângei amô ke la faa isê: “A s'kante glôrea sö 'ndel cel, e s'fage paz ke 'n tera 'ntra i omeñ: ke 'nkö 'l Siñûr a l'g'ã ülfid be !”

Ałura, kuando ke i ângei i ê desaparîc amô 'ndel so cel, e g'ê turnâd fosk... i pastûr i se dizia ü ko' l'oter: — Sã, dem dokâ... dóm a ed kozê g'ê po söcedîd, de kel ke l'm'ê

stac fac saî de 'l Ġrand Siñûr —. E isê, de buna onda...lasâd lâ i ka e i sccec de guardja, i s'ê 'nviac ilâ : e i ã po troâd lâ la Marî, ol Gozep e o' scctî apena nasîd, metîd zo lâ sô 'ndôna braka de paja! E i se kõntaa sô amô kel ke i s'êra sentîc a di prope sô 'l kõnt de kel iscetî lê! Eñendo de tre o kuater bande, po... i restaa tõc, a troâs isê dekorde!

Po... i pastûr i ê turnac tõc a 'l so defâ, e perô 'ntat i ge daa a ringrasjâ e lodâ ol Dio Ġrand per kel ke i ãa sentîd e est e komekê i du laûr i se kõmbinaa isê be: akâ se in fi d'i kõnc... a l'êra po adoma ke ôna bela storja, ke negû pjô 'struîd e net de lur i âvrês ñe mai kredîda: e dokâ, mei têñela per lur, e rescâ mia de sêntele sô per ï lasâd lâ i pegre. Tat a l'ê, dapo, finâ ke i tri i ê stac lâ, g'ê pjô stac de gran mõimênc, aturen... fo ke kuak fomne e sccec e ü per de pastûr pjô izî a portâ lâ ergõt de majâ e de kuarcâs zo.

Perô, la Marî l'ã skoltâd tõt atenta, e la g'ã pensâd sô asê, det indel so kôr, a 'sta storja lâ de ângei e glorje sô la boka de poer pastûr... ke la tekaa împö a fadiqa, ñak, se l'êra mia ke ergota ge n'saia zemô, le. Kisâ, pôtôst, se ergû de kei vizitadûr lâ i âvrâ per kuak tep regordâd e kõntâd sô amô ergõt a sccec e neûc, de kela noc lâ: perô, dige mia tat de regordasen amô ü trent'añ dopo, ne!

A kel d'i ot de, a 'l momênt dela so fatûrina, i so, koi so luntâ parêc del Gozep lâ i g'ã metîd per nom "Gezû", gôst kompâñ ke l'êra za stac nõminâd de l'angel prim amô ke lur du i ge pensês ñak, a ü scctî; e kompâñ de 'l prim gran pret del Dom nõv a turnâ 'ndre de Babeloña; po kompâñ de kel ke l'ã skriîd zo, ü sent'añ indrê, ol liber sant de la Sapiensa...

E a 'l so tep, za k'i 'ndaa 'nsö per i feste, segõnd i so legi del Mozê, i l'ã portâd lâ a Gerüzalêm per ofrigel a 'l Siñûr komê ke g'êra preskriîd per oñe prim mascî, e per riskatâl, komê ke g'êra permetîd, kol' oferta de do tûrture, o do kolombele, de poerêc (e negõt de añelî: l'añelî... l'sarês istâc lü dopo, per riskatâ lü tõc: perô, "ofrið fo d'i mûre", mia det lâ 'ndel Dom...).

A g'êra lâ a Gerüzalêm, gôst iñura, ü tal Simeû, om gôst e ke l'pregaa, ü de kei ke spetaa e speraa amô la liberajû per l'Ezdraçl... A l'êra ispirâd sô del volt, e l'êra sigûr

de mia mör senza ed ol mesia 'nviâd ispecâl del Ġrand Siñûr. E isĉ, dokâ, ispirâd, a l'ê 'ndac ilâ a 'l Dom prope kel de lĕ, ekol; e 'ntat ke pader e mader i faa kel ke g'êra preskriîd per ol so scetî... lû l'â ûlîd capâl imbrâs, e l'benedia 'l Dio Sant isĉ... ñe l'födês ol Gakôb kê 'trooa amô 'l so Beñamî e 'l so Gozef, lâ de 'l re Faraû: — Buna, o Ġrand Siñûr! Adês sĕ, kon kel iscetî ke in bras, a sente ke ô prope fenîd la me karjera, e te pödet a tòm sô 'n buna paz! Inkô ede ke la to ovra de salvamĕt ke te g'ĕ pronta prope per noter denâc a töc... indĕ 'sti tep ke de diagressja generâl: la to parola imprometida e kömpida, po la lüz del mond intrĕg, e la benedisjû de töta la to zet, del Ezdraĕl! —

Imaginâs ol so pader e la so mader, a sent kei laûr lĕ! Po, ol veco Simeû i â benedîc, e a la so mader a l'g'â dic isĉ: — E te skóltem be, te: kel iscetî ke... l'ê destinâd a deentâ ü gran señ de kontrâst intrâ de notr'ebřĕ: ge n'sarâ de kei ke per lû i se soleerâ sô a 'l volt, infî; e de kei ke per lû i borlerâ zo tat in bas, ke... oi ñe pensaga. E te, pota... te te tokerâ poa ôna bela stiletada 'ndel kôr! Ma stâm sô alegra, ne, te kol to Siñûr! —

A g'êra lâ amô prope kel de lĕ la (Go)Ana, ôna d'i so scete del Fanüĕl dela trebû del Azer, uramai a ega, ke la profetaa. Spuzada zûena be, dapo set añ a l'êra zemô êdoa. A lura la g'ïa za otantakuatrâñ, e la staa semper lâ 'ndi paragi del Dom, a dezû spes e semper a pregâ, de e noc a servî 'l Sant Siñûr. Riada lâ prope 'ndel momĕnt göst, êkola, poa le la lodaa 'l Ġrand Siñûr per kel iscetî lĕ, e po per la so liberasjû del Ezdraĕl ke la sarês veñida kon lû de grand. [Pöl a das ke, lâ a 'l Dom... i fes vergöt del gener amô a koi oter prim mascî d'i famee k'i veñia lâ a prezentâgei; perô, a 'l Gezû g'ê kapitâd prope kele do sante persune lĕ, e i â mia köntâd sô a vânvera.]

Oter. E dapo, fenîd de fa töt kel ke l'êra preskriîd, a i ê turnâc zo indela Ġalelea, a 'l so paiz de Nâzaret. E o' scetî l'kresia e l'deentaa grand e gros, ma poa brao e sapjĕnt, in grasja del Dio Sant ke l'ge teñia sô la so ma sô 'l ko.

I so, töc i añ per i feste de Paskua i 'ndaa 'lâ a Gerüzalĕm.

Kuando ke lû l'g'â ũd i so dudezâñ, dokâ, a i ê 'ndac ilâ a i feste, kome semper. E, fenîda la so festa, i s'ê metîc dre a turnâ 'ndre a ka soa. Ma o' scet istaolta l'ê restâd lâ a

Gerüzalêm: e isë per ol de dapo i so i s'ê a preoküpâc: ma adoma impensando ke l'fôs in gir per la karoana: l'éra po mia la prima olta! Isë, i ȳa zemô fac ôna gornada de kamînâ, prima de decides a sirkâl intrâ parëc e amîz. Ma sikome k'i l'lo troaa mia, êkola, g'ê tokâd turnâ 'ndre vers a Gerüzalêm. E isë, a 'l ters de, t'l'âi mia troâd lâ amô 'nde saladutrina del Dom de Gerüzalêm... sentâd zo koi otr'iscêc lâ 'ndelmêz a tace duturû? Ke daltronde, l'éra la so etâ de 'nviâs a capâ indimâ i rôtoi e lez e parlâ in ka dela dutrina. E kei k'i a sentia i restaa ñak, de tat ke l'istaa atênt e l'se 'nteresaa de tace laûr ...de sakrefese e altâr e Dom e 'kemanera ke de noter isë e lâ 'ndel Gito isô: e l'faa ed, isë, ke l'éra padrû d'i Skritüre kompân de ü grand ke l'istödja, a fa domande po proâ a respônd... fin'a mêtega ergôt de so de lü, a kel ke l'impara. I so, a edel amô i s'ê lasâc capâ d'ü grop, e 'l so pader a l'g'ã dic isë: — Kar a te 'l me scet... kozê m'êt po kûmbinâd, de sparîm isë, e?! Áda ke: la to mader e me... m'te sirkaa skuaze a despirâc! —

Ma lü invece l'g'ã respôndîd isë: — Madonimë (*madoona mea!*) a oter! A fa po, sirkâm isë? Pensî diolte ke l'so mia 'ndo g'õ de sta? Me g'õ de sta in ka kol me pader, o no?, kompân ke ma fi di sô 'ndel salm 27! — [*... “Pura de kozê, po? Koñoserês ñe pjö la (strada per la) ka del me pader, me, adês, isë de perdes, a?”*. Ma pöl das: “o sedenô ge farês magare 'ntort ai me genitûr, a metes dre a servî 'l Siñûr, me... a?!”]

Indâ po a saî kozelê ke g'i ävrâ kapîd det e pensâd, kela olta lë, i so... E lü, pöl a das, l'éra mia stac lâ adoma a cakolâ, kei tri de, ma a da ôna ma a fa po ergota, koi operare del Dom, poa per majâ: ol mestër del so pader... l'éra be dre a 'mparâl. Po, kapîd ol so dispjasër de lur, a l's'ê sküzâd, e l'ê turnâd zo kon lur a Nâzaret. E lâ, l'faa 'l brao scet sota so pader e so mader, e 'ntat a l'kresia in sapjensa e poa 'ndi mezure, in grasja del Dio Sant, e poa 'ndi grasje de töc in paîz, sae, karî, cerûz e poa de brao zuen, negôt de di. Isë, la Marî la g'ȳa tace bei laûr de regordâs, de kel tep lâ (ke perô, g'i ä ñe mai kôntâc sô a nisû, intât ke la g'ȳa 'l so Gezû innâc e 'ndre per la Palestina). E dokâ, l'kresia be. Ma, kel de met sô famea... a l'ge pensaa prope mia. Finakê, po, apena sotrâd ol so Gozep... sã ke m'va aante de lâ a 'l fjôm indo m's'éra zemô a prima.

KO KUART : A NÂZARET, PO A KAFAREN

A kel tep lâ, ol re Erôd, ke l'se sentia a fôstegâ de 'l Goân, perkê l'ïa töld sö la so moër del so fradêl amô iv a lü, e per tate d'otre d'i so maleface... a g'n'ă zuntâd lâ amô ôna... e l'ă metîd in prezû 'l Goân!

Ol Gezû l'g'ïa, 'hura, aturen a i trentâñ: e isê l'inviaa po fo la so misjû, kuand ke töc i ge sia ke l'éra o' scet del Gozep e de la Marî, du dela trebû del re David, dela so kâ del Abrâm e del Noê, e a la finfî... scet del Adâm, kel fac sö de 'l Dio Siñûr a so sôme-ansa, e camâd lü per prim "scet del Siñûr", abekê... trop prest iscêt iskapâd vja de ka.

Oter. E dokâ, dapo 'l batêz indel Zordâ, ol Gezû l'ê stac ispirâd de restâ fo 'ndel dezêrt, indoke l'ê po restâd lâ ü kuaranta de, fo de 'l mond lü e tri o kuater besôc... e lâ l'veñia tentâd del djaol. Per töc kei de læ... l'ă ñe majâd negôt [de 'mpjenî sö 'mpo la pansa: adoma lac, e kel negôt ke s'troa 'n kei posc læ]: e isê, vers la fi, a l'g'ïa delbû a fam. Añura ol djaol a l'ge diz isê: — Te, a... za ke ta set iscêt del Dio Grand, e dokâ padrû a te del mond... se ta öt mia kopâ fo ü besotî, almên komândega a kel plok ke de deentâ ü pa, o no!? — Ma 'l Gezû l'ge respönd: — Me okorerâl, diolte, ol to permês? Dâi, ke te ge l'set poa te ke 'nde Bibja g'ê skriîd det isê be, ke l'om a l'kampa mia adoma kol pa! — Po 'l djaol ("Cêrtoza... ga ôl akâ 'mpo de cici! E po te magare ta ria zo la mana de 'l cel, te, ne?! Dâi, köntel sö car ke ta set mia bu e ta riscet a de mör de fam!") ol djaol a i a porta sö sö bel a 'l volt, de faga edî 'nd'ôn'ögada sula töc i reâm dela tera lâ 'nturen, po l'ge diz isê: — Tê: oter ke prede de majâ. Ta dorö me a te töta la potensa e töt ol or de töc kei reâm ke, ke per adês a i ê töta roba 'ndi me ma, e g'i do a ki ke g'ö oja me: t'i do a te, basta ke te adês... ta sa 'nzenöcet zo ke deante a me! — Ma 'l Gezû l'ge respönd isê: — Á lâ, fals e antadûr de fôm! Dâi, ke te l'set a te, ke 'nde Bibja g'ê skric det isê de adorâ ü Siñûr Dio sul, e de pregâ adoma Ol Ûnek! So eñîd insâ a portâ ke 'l so reñ del Siñûr, me, mia ol to... re del rüt! — Hura ("Ma ki t'äl dic de pregâm, po!? Dil, invece, ke la ta spösa de ïga de mör, te, po de dam indrê töt!") ol djaol a i a porta lâ de bot a Gerüzalêm, sö sura 'l kantû pjö olt del Dom, po l'ge diz amô isê: — A

be... va be. Perô, adês me ta pjente ke. Te ke ta set “iscêt del Dio G’rand”, sâlta pör zo: ke, tat... a l’so ke g’ê skriid zo zemô ke 'l Siñûr a l’ga komandâd a i so ângei de protegît, te, e de teñet sô koi so ale... de manera ke 'l to pe ga kâpîte ñe mai de 'nsokâs det in kuak prede! Figüres te se l’ta lasa borlâ zo e sfracelâs ke deante a töc, kompân del poer kavri k’i böta zo de lâ per ol so sakrefese: prope te, ke... ta g’êt po de salvâ töt ol mond e reñâ! — E 'l Gezû l’ge respönd a pontí amô a staolta: — E dâga, te! A s’ved ke te se regordet pjö, prope te, ke 'ndela Bibja g’ê skric det poa isë de tra mia trop la korda... kol Dio Sant, ol to padrû! Po... g’êt mia proâd asë zemô öna ölta, te, ne!/? —

E isë (“Ööla, se ta g’la set longa, te! Töcimanere... pura de mör prima de 'l tep, a!/? G’a sorö lâ me, a ed la a po a fenî komê, per te!/?”)... vja djaol kola so kua 'ntra i samfe, fenida læ per istaolta. ...A l’sarês po stac ol kolmo, a, ke o’ scet del Padrû delbû de töt ...l’âvrês fac prope kel ke l’völia ol padrû de negöt deltöt (ñe d’i musî, kompân k’i dizia de lü lâ)!

Ol Gezû aûra l’ê turnâd lâ in Galelea, pjö fort e ispirâd de prima. E l’s’ê po metîd dre a predikâ in töte i ka dela dutrina læ aturen, e töc i se kômplimentaa kon lü. E isë l’éra koñosid be in gir per töta la regû. L’ê 'ndac a sta a Kafaren, perô, mia amô lâ a Nâzaret de la so mader e koi so parêc: lâ, töc i vülia diga lur kozê fa e komê fa, per tra aan-te la famea. A Kafaren, l’éra pjö liber, e i a l’sia lü kel ke l’g’ïa de fa o mia.

In kela ka de dutrina lâ, g’éra lâ ü poerêt a bała d’ü bröt isperet katív, e kela olta lâ l’s’ê metîd idrë a uzâ sô isë: — A te 'ntereserâl kozê po a te, de me... Gezû de Nâzaret, e!/? Set veñîd ke per mandâm in rüina me, te, e!/? Me l’so ki ke te set, te: te, l’tè manda ke 'l Dio Sant Siñûr! — [*Set veñîd ke per me, te? Dài... könta sô ke l’tè manda ke 'l Siñûr... po famel ved!*] Ma 'l Gezû... l’g’â uzâd idrë koi katie, e l’g’â urdenâd isë:

— Te fâ sito, læ, e fila söbet ivjâ, fo de kel om læ! —

Fatolê, ol demone, bötâd zo 'n tera lâ denâc a töc kel poer om lâ, l’ê skapâd vja sen-sa faga pjö negöt de mal! E jura së, ke töc kei ke g’éra lâ i â capâd öna bela pura, e i se dizia po ü ko’ l’oter töc impresjunâc: — Ke parlâél po mai, kesto ke, a!/? Isë car, sigûr e

fort, ke... l'ge komanda ak a i demone, e i ê obligâc a sparî, po!? —

E dapo, kel sabet lâ, eñîd fo dela dutrina, l'ê 'ndac lâ 'ndela so ka de la so madona del Simû, ü peskadûr k'i s'éra fac amîz e l'ge endia 'l pes. Le, l'éra in lec malada kon-döna gran fevra, e isê i pregaa 'l Gezû ke g'la fes guarî. E lü 'lura l's'ê kürvâd zo sö 'l so lec, a l'g'ã dic dre be ergöt a la fevra... e la fevra la g'ê pasada! E le l'ê saltada in pe: in prâtika la so prima resüsitada, e la s'ê metida dre a servîi.

E de 'lura, ü per de de a la setimana lü l'éra lâ a ka de la so madona del Simû, e, dapo kalâd zo 'l sul, töc kei k'i g'ïa dei malâc in famea g'i portaa lâ. E lü i a guaria... adoma kol mêttega sö i so ma a oññ. De tace 'n kei momênc lë i ge skapaa fo i demone, e i vuzaa sö “A te, scet de Dio, te... el?”. Ma 'l Gezû l'ge bajaa dre de bröt, e i a lasaa mia fenî de parlâ, ke lur i ge daa a köntâ sö ke l'éra lü 'l mesia [e a sfidâl a fal po ed impö a la svelta]. E dapo, prim de eñ fosk, a l's'ê sluntanaa de ka desperlû, indû post solitare. Ma l'söcedia poa ke a la matina amô prest öna möca de zet a i a sirkaa zemô, e kuand ke po i a troaa i vülia teñel semper lâ in paîz kon lur, e i a lasaa pjö 'nda vja...

Ma lü l'g'ã diazia pötöst isê: — Adé: bizoña prope ke 'ndage lâ a portaga la buna nöa akâ 'ndei oter paîz, ke 'l reñ del Dio l've poa per lur. A l'ê be per kel, ke me so stac inviâd insä! — E, dokâ, l'indaa fo a predikâ d'öna ka dela dutrina a l'otra dela G'alelea.

Ü bel de, l'sê portâd îlä amô a ka, a Nâzaret, lâ 'ndokê l'éra stac kresîd. L'éra sabet, e a 'l solet l'ê 'ndac lâ a dutrina, e l'ê leâd sö per lez. I g'ã dac indimâ ol rotol del profët Ezai, e lü l'l'ã dervîd fo: e l's'ê 'mbatîd det in kel pas lâ ke g'ê skriîd zo isê, êkola: “Sura de me... speret del Dio Siñûr! Isê, l'm'ã onzîd sö kol öle sant, po l'm'ã 'nviâd insä a portaga la buna nöa a i poerêc, e a prediga la so liberasjû a i prezunêr, a faga ed la so lüz a i orbi, a desliberâ kei k'i i ê teñîc sota e a derv fo l'an de grasja del Dio Siñûr”. E dapo lezîd e turcâd sö amô 'l rotol, a l'g'p'ã dac amô a 'l segrestâ, po l's'ê sentâd zo.

Töc kei k'i éra lâ de det a i a fisaa, per sentî 'mpo.

E lü, jura... l'g'ã dic sö isê, in parole pôere: — Buna. Ve l'dige me ke 'nkö, ke de oter e per voter, a l'deenta eritâ e fati i parole dela Bibja ke v'ö lezîd sö desedês... kompâñ

ke m'i les sô de sento e sent'añ: e pjô tat amô koñê a i so tep del re Ciro kela olta lâ —.

E de prenepe i püdia adoma ke sta lë ontera a skoltâl e restâ per ol so bel parlâ; ke anse i se domandaa töc “ma él, o él mia o' scet del Gozep e dela Marî, kesto ke? E 'tura po...”, e “pekât... a l'éra isê mai brao e onêst, de karpentër: turnerâl magare mia ke 'n bütiga koi so?”... po amô “adé lë: pjentâ ke isê desperlë la so mader!”. Ke, de sigÿr, i püdia mia zemô pensâ (ma ñe i so parëc e amîs de lü, ne) ke 'nvece lü l'éra prope poa “kel izâd... kel mandâd insâ, onzîd sô: o' scet del Siñûr”. Però lü l's'ê portâd inâc: — Adês, ô bel e kapîd... oter, a, me kônterî sô 'l proerbe “dutûr, kûra la salûte dela to famea, prima: ke l'ê 'l to unûr!”... mia ira? —.

— Prope — i ge dis — “sê: a me n'sent a dei bele a köntâ sô, de te... ke t'âvreset fac, lâ a Kafaren... E dokâ, fâ ergöt poa ke a 'l to paîz adês, o no, a te! —

— Però, ofendîs mia, ne: ge n'ê a ün oter de proerbe ke l'fa isê: “profêt in ka, bastunade capâ!”, se la storja l'ê maestra. 'Nda a saî 'nkemanera, ma... ge n'éra magare mia lâ, de êdoe, 'ndel so paîz (sentîm be) a 'l so tep del Elî, kuand ke per tri añ e ses miez g'ê eñîd zo pjô ñe ôna gosa de akua, e ôna karestea vaka la 'mpesta la regû? Epör, a ñe ôna d'i so êdoe l'ê stac inviâd lâ 'l profêt... ma adoma a ôna êdoa de Sareta, 'là de lâ per Sidû. Po... in töt ol Ezdraël, a g'n'éra magare mia, de lebrûz, a i so tep del Elizê? Oter fac, se n'n'éra! Epör, a negÿ de kei g'ê stac koncedîd de guarî, ma sul ke a 'l Naman ol Serjâ! Prope: in ka soa... lur i a köntaa per ü zero, per ü debet, ol so profêt! —.

Ge ôl mia tat a kred ke, a sent kei laûr lë, lâ in saladutrina töc i n'n'â ùd a mal asê: “Öölâ... se i a met zo düra! Oê, se 'nkredel po ki, lü ke... E noter, ke l'me sômeaa ke l'g'ès de deentâ ergÿ: ma... l'ê bu apena de ultâ lâ do parole 'n kruz, a la finfî, po de ofênd! Ma za: zemô de scet, lü l'vülia sta lâ a 'l Dom, sta sô a 'l volt, lü, ne?!”; e ergÿ d'oter “tò, ke adês noter ke m's'ê töc kuance orb, surc, sop, lebrûs, prezunër: e l'ria sâ gösto lü, âdel lë 'l mesia!” po ak “oter ke speret del Siñûr, te: te set bu ñe de fam ved ü stras de señ, de mirakol, te!”. E leac sô töc ñek, i l'p'â kasâd ivjâ, fo de 'l paîz, i g'ê stac a i kôstole fina sô 'n sima a 'l kustû del mut... e i vülia aderetûra rüzâl zo.

Ma lü, sensa ñe skapâ, l'ê pasâd det indelmêz a 'l muntû dela zet... e i l'ă pjö ñe est!

Îhura l'ê eñîd zo amô a Kafaren, e l'ge predikaa a la zet, a 'l sabbat. E kei k'i a skoltaa i restaa, de kel ke l'kõntaa sô e ke l'faa imparâ, tat ke l'parlaa de maester e po sigÿr; e poa noter ma eñia de pensâ ke l'parlaa mia a vânera, i tate olte ke l'dizia sô kel laür lâ de Bibja "l'ê propjamenta per me, ke g'ê skric zo de eñ insâ a fa kel ke te komandet Te: e dokâ eñe me, êkola, g'ô mia de spetâ nisÿ d'oter, o de fağa fa a ergÿdoter!". Ke, sedenô... ki e kuando, po!?"

...Dre a la setimana, per majâ, a l'faa kuak laorâ koi peskadÿr e koi karpentÿr.

KO KÛINT : A L'CAMA I SO PRIM AMÎZ

E ü bel de, ke l'éra lâ sô la ria del lag de Genêzaret e la zet la ge faa resa aturen e i ă skoltaa, a l'ă est lâ do barke ôde lâ sô la ria, ke i peskadÿr i éra saltâc zo e i netaa fo i so rec. Lü l'ê saltâd det indöna, kela del Simû de la so madona guarida, a i ă camâd po i ă pregâd impjasÿr de sluntanâs ü falî de la ria. E, sentâd zo det indela barka, de lâ l's'ê metîd dre a predikaga a la zet.

Kuand ke po l'ă fenîd de parlâ, l'g'ă dic isÿ a 'l Simû de 'nda lâ 'ndelmêz a 'l lag po de bôtâ fo la so braa ret. Ol Simû l'g'ă respondîd: — Áda, maester, ke noter a m'ă zemo fadigâd asÿ stanôc... sensa capâ ñe ü pesî! Però... se prope te me l'diget te, böterô fo amô la ret: a m'la rezenterâ amô öna ölta —. Dic e fac. E indÿ menÿt a i ă capâd det ü sfrak de pes, ke ge se strasaa sô a la ret! Îhura i g'ă dac la uz a i so soci de kel'otra barka, ke i veñês insâ a ütaga. Kei lâ i ê eñîc insâ... e isÿ i ă po 'mpjenîd sô do barke, ke skuaze i 'nda ak a fond! E defati 'l Simû e poa töc kei lâ kon lü a i ê ñak restâc, de tace pes ke i ă trac fo; e l'istês kei de kel'otra barka ol Gakom e 'l Goân, i so sccec del Zebedÿ, ke i éra po i so soci del Simû e del so fradêl ol Andrea. A ed ü laür kompân...

ol Simû l'ge s'ê 'ngünikâd zo deante a 'l Gezû, e l'ge dizia: — Árdem mia mal a me, te, Siñûr: ke me so ü gran pok de bu, öna preda, ü kör malfidët! E benedésem, te, prim de partí! — E kela olta læ 'l Gezû l'g'ã dic prope isê, a 'l Simû: — Íga mai pura, te! De 'nkö a 'nda in 'nac, te serët la me braa preda, te: te peskerë pjö adoma pes a la padela, te: ma poa omeñ a la eta! — E de jura, po, trace fo de l'akua i so barke, a i ã lasåd læ tötta la baraka e i g'ê po 'ndac idrë a 'l Gezû; i prime ölte per kuak de, po i turnaa töc amô a ka, per impö, — poa lü — eko; finakê in pañz i s'ê skuaze pjö ñe fac ved!

Ü bel de, intât k'i se troaa læ indü pañz, g'ê 'ndac inkontra ü lebrûz... l'ã rescât a 'nda-ga læ apröf, a l'ge s'ê metíd zo 'n tera deante a 'l Gezû e i a pregaa 'nfina, e l'ge dizia:

— Ne, Siñûr: se te te ölet, te set bu de fam guarî a me, te! — E 'l Gezû... a i ã tokâd, prope, po l'g'ã dic isê: — Sê, ke l'völe a me kompâñ de te. Guarés, te, dokâ! — E söbet la so lebra l'ê skomparida! A l'g'ã urdenâd de digel a negü e de 'nda læ de 'l pret a fas ved e de faga la so bela oferta del sakrefese kome l'ia stabelíd ol Mozê, in manera ke l'ge fös car ke l'éra töt in rëgola. E isê, pota... s'se ne parlaa öñe de semper de pjö, de kel ke l'faa, e ü muntû de zet la se traa 'nsem öñe olta per iskoltâl, e per fas guarî d'i so mai. Ma lü, öñe tat, a l'se ritiraa 'n kuak kantû per so könt, e l'pregaa.

Ü bel de, l'éra læ sentâd zo sota ü porteg, a predikâ. E g'éra læ a skoltâl akâ dei farezê e dei duturû, eñic insá de tate bande, Galelea, Gödea, e 'nfina a de Gerüzalêm.

La so ma del Dio Siñûr la ge faa guarî sö ü muntû de zet. Kuatr o sik, intât, i sirkaa de fa pasâ det ü paraleték kol so lecî, per mêtegel læ denâc a lü. Ma sikome k'i ge ríaa mia... t'éi mia saltâc sö sö 'l tecî?! E, spostâd impö de tégole e de kantinele, i g'l'ã ka-lâd zo, lü e l'so lecî, prope sota 'l naz, læ 'ndelmêz indokê l'se troaa 'l Gezû, ekol.

E lü, intüíd la so fidüca de lur læ, po kel k'i speraa, l'ge diz isê:

— O om: i t'ê perdunâc töc i to pekâc... te, po, i to amíz! —

Imaginâs, farezê e duturû! A i ã tekâd læ a tontoñâ e i se dizia isê: — Ee, cêrtoza! Áda po ke: ki saresel ki po, lü ke, ke l'isfida ol Sant Siñûr? Él lü ol Dio Sant: ke adoma Lü l'pöl perdunâ delbû i pekâc, læ a 'l Dom e kol so brao sakrefese prupursjunâd, e? —

Ol Gezû, a sent i so ragunamênc, a l'ge fa, lě 'ndelmêz:

— Koze sis po dre a ragunâ komê oter lě... e kemanera ma l'dizî mia sô 'l müz, ke a 'l perdû oter ge kredî prope mia, e? Êl pjö belfâ a di sô “i t'ê perdunâc i to pekâc”... opör a diga “lêa sô 'mpe te, po kamina!”; e? Buna. Gösto isě per fav saî ke poa ke sô la tera ü kome me l'pöl remetî poa i pekâc... a te me te dige isě: lêa sô, vâ a ka toa depertě, e tós dre 'l to stremasî, de regordâs be kom'a te ge staet! —

Dic e fac! A l'ê saltâd in pe lâ denâc a töc, l'ă capâd sô 'l so brao stremasî po l'ê 'ndac a ka, a ringrasjando 'l Dio Siñûr. Isě ke töc a i ê ñak restâc! E i kantaa infina i so brae lode a 'l Dio Grand, e 'mpresapök i se dizia “Inkô m'a est delbû dei laûr... prope fo del normâl!”. Kei oter perô i reklamaa “alura sě: se ü ke l'ê nisö l'perduna i pekâc ke, e ü paraletek a l'kamina e l'porta ü lec, perkê g'ê pjö ñe negöt de proebîd a 'l sabat... 'ndo 'ndarai a fenî 'ndoê, po, töta la nosta bela religû e l'urden, e?”

Indâc de fo poa 'l Gezû, l'ă est lâ ü de kei d'i tase, ü tal Levi, sentâd zo lâ a sköd a 'l so brao banketî. A l'g'ă dic sensoter “te êñem dre a me, tel!”: e kel lâ... pjentâd lâ töt, él mia leâd sô delbû... e g'él mia 'ndac idrě!? Anse dapo, amô kel de lě, a l'g'ă fac preparâ ü gran bankêt de festa 'n ka soa. A tâola g'éra lâ amô a ü kuak de kei d'i tase, e poa de l'otra zet isě isě... mia prope “de prima”, sentâc zo lâ kon lur. De fo, farezě e duturû, tat per kambjâ, i ge daa a tontoñâ... po i ge dizia isě a i so amîz del Gezû:

— A sě, e, oter! Oter... maî e biî 'nsem a kele karoñe lě d'i tase... e tate bele kanaje d'otre amô, a! —. A i ă sentîc infina a 'l Gezû 'n persuna, e i ă metîc a bola isě, de lâ a tâola: — Indi vja, 'ndi pör ivjâ, oter! Ke, kei k'i se 'nkred de sta be, i g'ă mia 'mbizöñ de spisjër lur, e? A i ê adoma i malâc, ke i ge n'ă göst e pro! Buna: e me prope so mia ke a met insêm ol fjûr de kei k'i se 'nkred de sta be, lur, brae bei e sae... Me so ke a tram insêm kei k'i ge sa de ĩga ergöt ke (v)a mia, kei k'i sta mal indi so pañ; e a daga aze de konvertîs poa lur a 'l nost brao reñ, ekol! —

Ma kei lâ, i éra 'mpo dîr de orege, lur...

E dapo la festa, ergû i g'ă dic amô isě: — I so amîz del Goân a i ê semper dre a fa de-

zů, e isě poa i so amîz d'i farezě... I to, de amîz invece, kon te i maja e i biv tötura! Kom' éla, po, ke!? — E 'l Gezû l'g'ă be dac resposta isě: — Ve pârela gösta, a oter, de faga fa dezů a i 'nvidác, intât ke i spuz a i ê amô lě a 'l bankêt? Dapo, pjö tarde, l'veñerâ a 'l tep, sigůr, ke la festa de spuze la sarâ pasada... e ge sarâ de tirâ la cengja! —

Po l'g'ă köntâd sô kela parâbola ke (öna parâbola... l'éra öna manera d'i sapjênc de faga imparâ ergöt, a prezempe e proerbe... a ki ke ülia 'mparâ): — Negů, él vira, l'lasa 'ndre de capâ de regalâ ü bel vestît növ, per istâ lě pötôst a mêttega sô öna pesa 'nsă e 'lă sô 'l vestît vec e kar, me dige. Perd ü estît növ a gratis, e ĩga mia ergoña de fa strasû? O sedenô se ve e regalâd ü bel vi noël, a l'manderî 'ndre... pör de zvodâ mia fo i oste bote de l'azît ansâd, e? O mağare i mescerî sô, oter, a? Bona: o 'nsem a me, (v)i po estît növ ... o 'ndi aante per la osta strada ega, oter, ke me g'ö la mea, nöa, per ki ke ge sta! —

KO SEST : I DUDEZ PO I BEÁC

Oter, ekol. Öna ölta, l'éra de sabat, i pasaa 'mbanda a ü kap de formêt, e i so amîz del Gezû (i g'ès po fam, o i fes impö i scec) i kataa fo dei spege e i a zgranaa koi ma per majân i gre. Dei farezě, k'i ge köntaa akâ i pas, 'lura i g'ă oservâd:

— Koze fiv, po... ke a 'l sabat a l'ê ñe permetîd!? —

E 'l Gezû l'g'ă respondîd isě:

— A ĩv mai lezîd sô, oter, kel ke l'ă fac ol re David, kuand ke koi so kompâñ a l'g'ă ũd fam, öna olta?él mia 'ndac de det indela so ka del Siñûr, e n'n'âl mia töld sô i pa del'oferta, e n'n'âl mia forsâk majâd lü e poa kei ke g'éra lă kon lü... akâ se l'éra permetîd adoma a i prec, de majân? E l'éra de sabat! E jura... adi amô ke: “scet de om, padrû del sabat”, e mia a l'inkontrare! —

Ûn oter sabat, a l'va det indela ka dela dutrina, e l'se met idrě a predikâ. A g'éra lă ün om kondöna ma paralizada. I duturû e i farezě del post i staa gösto lă a tendel, ka-

zomai se l'guaria ergŭ prope a 'l sabat: isě i g'ăvrês vŭd vergŏt de gros a so kareg in trebŭnâl. Ma 'l Gezŭ, akâ se l'koňosia benone i so pensěr de lur lâ (o prope a per kel?), a l'ge diz isě a kel om lâ: — Lèa sŏ mo te, e mètes ke 'ndelmêz!—.

E lŭ lâ l'ê leâd sŏ pront e l's'ê metîd lâ 'ndelmêz. Aŭura 'l Gezŭ l'ge domanda a kei lâ:

— Dizim împŏ, oter: a s'pŏl... o s'pŏl mia, a 'l sabat, fa ergŏt de be, fa ergota per kŭrâ ergŭ... o mê adoma suportâ 'l mal, a 'l sabat, e lasâ patî e mŏr ũ, e? —. A l'ge lasa ũ menŭt de pensâga sŏ, l'se arda be 'n gir tŏt aturen... po l'ge diz isě a kel poerêl lâ:

— Islŏngela zo... kela ma lě, dokâ, te! —. E kel lâ i a slonga zo, e l'ê guarida, nŏa!

Figŭrâs lur lâ: i éra ñak rabjŭz! Uramai, i deskŭtia adoma de koz'i pŭdia fa per rŭinâl. Ke, per lur ol sabat a l'éra de santefikâ per unurâ la lege, mia per salvâ l'om, o per salvân ũ isě!

Ōna olta, ol Gezŭ l's'éra ritirâd sŏ sŏ 'l mut, tŏta la noc a pregâ. E, scarîd fo 'l de, l'ă trac insêm i so amîz, a n'n'ă sirkâd fo dudez de nŏmer e a kei lâ l'g'ă dac la funsjŭ de "i so apŏstoi"... i so misjunare, êkola. Ol so apostol de ergŭ ke l've lě de te, a l'ê kompanŭ se kel vergŭ lâ l'rierês lě prope lŭ de te, êkola.

I so dudez apŏstoi, dokâ, a i éra: ol Simŭ, scet de Gona, mia ŏna gran sima perŏ d'ŭ tok sul, ke i ă camâd akâ "ol Pjero, la me preda"; ol Andreî so fradêl; ol Gakom e 'l Goân fradei a lur, iscec del Zebed e dela Mari, ŏna de kele ke g'ê po 'ndace dre a 'l Gezŭ koi so du "fŏmêlga po trŭna... e l'vage tŏt a fŏg!"; ol Dŭda (Gŭda Tadě) e 'l Gakomî (g'ê restâd a ka 'l Bepino... ma pjŏ tarde g'ê 'ndac dre poa la so mader de lur tri); ol Pepo (Felĉp), de 'l so paîs del Simŭ e del Andreî; ol Bortol ("Nataňel del fig"); ol Levi Matě ke prima l'iskŏdia tase per i româ; ol Maaz ("Tomâz, pikega det ol naz!"); ol Simunî, k'i ge dizia ol Zelŏt (l'éra zemŏ stac a skŏla d'ergŭdoter per împŏ, prima, lŭ) e 'l Gŭda de Iskar, kel ke dapŏ a i ăvrês po tradîd.

Ōna olta l's'ê fermâd lâ kon lur indŏna spjanada, ke g'éra lâ zemŏ ŏna bela skuadra de amîz amŏ e ũ muntŭ de zet riâc insă de tŏte i bande, infina a de Tir e Sidŭ, a skoltâl e magare fas quarî d'i so mai. De manera ke tŏc i sirkaa 'doma de riaga a tokâl, perkê

s'dizia 'sse ke ge eñia fo komê ü kold, ke l'guaria töt. Kuando ke g'ê stac impö de kalma, a l's'ê sentâd zo, lü: e la zet in gir, e i so dudez i ge faa cirkol in pe, lâ a kuak pas.

E l'jura, ardândoga 'ndi ög a oñü d'i so, l'ã tekâd a di sö isë, bel volt:

— Beâc voter e fis korago, kuand ke siv poerêc: ke, l'reñ ke l'ria de l'cel a l'ê la osta benedisjû! Beâc voter, kuand ke g'iv fam e sit: ke si preparâc a ês impjenic sö delbû! Beâc töc voter kuand ke löciv: mei isë per voter, ke si pronc a griñâ de festa! E beâc voter, prope, kuand ke i ve tö in öde e i ve refüda, e i ve spüda e despreza, kompâñ de tace 'mpestâc, kuando sti dela banda d'ü poer iscêt de om... ke l'sees a ü lebrüs e pok de bu. Fis korago, jura, e fi a festa: ke jura së, ol vost pro l'ê grand sö 'ndela banka del cel! Stâei mia isë mal akâ i so profêc koi osc veci, a: e l'Siñûr g'âl mia pensâd lü, a i so profêc? Ma pjötöst: guai a oter, se se riteñî benedêc perkê si 'ssjôr: ke g'ï zemô 'n skarsela ol vost pro e amen, fenida lê! Poerêc a oter, se siv a pansa pjena, ke... ve tokerâ la fam! Pêgo per voter, ke adês griñunî saldo töc, senza ñê pensâ a fa kel ke l'ê göst denâc a l'Siñûr: perkê ve tokerâ ñak deentâ ñek e löcâ! E me dispjâs per voter, amô, prope... kuand ke töc i digerâ de oter adoma ke be, e sirî dela banda de kei ke enz semper, e mai de ki ke g'ã 'mbizôñ! S'êi mia fac i müine isë poa i nosc veci, koi so fals profêc? E kom'êi fenic po, kei eci e kei so fals profêc lâ!? A oter ke me skultí e üli eñem dre e 'mparâ, me ve dige isë: oter... g'ï de üliga be a ki ke ve fa de l'mal, e g'ï de fâga de l'be a kei ke ve öl mal. Benedezî kei ke ve maledês, pregi per kei k'i ve 'ngüra de l'mal; e... se ü l'te da ü papinû, te gires adoma, akâ se g'ê mezo de capân ün oter de lâ. Po, se ergü l'te roba a l'mantêl dopo la kamiza, e per lege l'pöderês ñak: te dâga a kel senza maledîl, diga isë ke tat... a l'ge pensa l'Siñûr, a teñet a l'kold! Te dâga semper, dâga a ki ke sirka. E... domândega mia 'ndre a ki ke te roba. Imprâtika, te fâga a ün oter, kompâñ ke t'ölerêset ke lü l'te fes a te, po fâga a nigû kel ke te öreset mia k'i te l'farês a te! Sedenô, ke rasa de pro te n've... po te kambjereset koêê, se te ge fet de l'be adoma a ki ke te fa de l'be... a, te? Fai mia zemô isë akâ i besce e i pok de bu? Se te ge 'mprestet adoma a ki ke te l'set zemô ke l'repaqa benone... ke pro te n'n'ê-

vřět, ke nōitâ sarala? Poa i lader i ge 'mpresta a i lader, finakê i se l'turna, eko! Oter, dokâ, teñi bu a i antepâtek, fi de 'l be e 'mpresti... senza kōntâ de guadeñâga sō l'onga: e jura sě ulterî 'l mond, e 'l vost pro jura sě ke l'sarâ grand, e sirî dei brae scec del Pjō Olt indel cell!él mia isě, lū, e: él mia de bu kōr poa koi dizgrasjâc e kon kei de memorja kōrta per i so benefese? A l'ê lū ol vost modêl! Si dokâ de bu kōr, kompâñ ke l'ê de bu kōr ol vost Pader, ol Dio Siñûr. Ponti mai ol did, e l'sarâ mia pontâd kontra de oter. Tei mai fo negŭ... meti nigŭ a l'inferen, oter... e sirî mia teac fo. Perduni... e sirî a perdunâc. Dî, e ve sarâ dac: dî in buna mezūra, pjena e strepjena... ke, la stesa mezūra ke ivrî dovrâd koi oter, la sarâ dovrada a kon voter!él mia isě ke 'l pader in cel a l'völ... kei k'i se cama i so scec? E l'ê isě, ve l'dige me, ke l'veñerâ po sã 'l nost bel reñ ke m'ge da a 'nsoñâs e a camâ! E l'sarâ kuando ke noter a m'sarâ 'mpo pjō a so figūra e sōmeansa del nost kreadûr e pader, e 'mpo meno figūra e sōmeansa d'i sōmmje!

Ōn'otra olta, a l'g'ã kōntâd sō kele parâbole ke...

— A pōdel diolte ü orbo guidâ o fas guidâ d'ün otr'orbo? O borlerai mia det pōtōst tōc du 'ndela prima bŭza? Po, kel ke (v)a a skōla, sarâl diolte zemō pjō brao lū de kel ke l'fa skōla? Tōtalpjō, l'istâge prima atênt a 'mparâ be: e l'deenterâ a lū ü brao [kompâñ del so] maester. E 'nkemana, po... sirkâ de traga fo la skaja ke ge sarês det indel so ög del to fradêl... intât ke te fe finta de negōt per ol traêl ke te g'ě det te indel to, de ög, a? A ge rierêt diolte te, kon det ü traêl indel to, de ög, a êdega be... e a traga fo la so skaja de l'ög del to fradêl? O fals e trobe! Deslibères fo prima te, dokâ, de 'l to traêl ...e dapo sě, te ge ederêt be asě, de êdega det öna skaja a 'l to fradêl, e de ofrîs per tragla fo, a! ...Pjanta buna, la da mia frōta selvâdega, ñe pjanta selvâdega la da mai frōta göstuza. Ol bu d'öna pjanta, te l'vedet de la so frōta: te tōet mia zo, defati, i fig sō i ürtige... ñe s'regoi l'öa d'i spi. Isě, ol om bu a l'ê bu de tra fo l'or del so kōr car; ma l'om katîv, invece, l'tra fo adoma la fel, de 'l so kōr fosk e 'nvelenâd! A me camî “maester de ke, maester de lâ”... e po fi kel ke g'n'ï oja oter, e mia kel ke ve dige me! Ve fo ed me adês, a ki ke l'ge sōmea kel ke l'me e dre a me e l'me skolta e l'fa komê ge

dige me. A l'ê kompâñ d'ü kapmaster... ke l's'ê metîd dre a fa sô la ka: l'ă skaâd zo bel fond e sota la kantina l'ă pugâd zo i so bei fondamênc indè' preda ia: g'ê riâd zo la pje-na del sere, l'ê eñîd fo de svjemensa adôs a kela ka lě, ma i ă adoma bañada, in fi d'i kõnc... tat ke l'éra faca sô be. Ki ke 'nvece l'sent i me parole, ma i a met mia 'n prâti-ka... lü lě l'ge sômea pjötôtst a kel omasî ke l'ă fac sô la so ka lě sô 'l kap, senza fonda-mênc: a l've fo 'mpunî de serjôla, la ge maja vja du gre de terě a i pe... e 'l gran diza-ster a l'ê sigürâd! —.

KO (D'I) SET : KI KE L'Ê OL BATESTA

Oter... Öñ'otra olta, a l's'ê portâd ilâ amô lâ a Kafaren. Lă, ol so servidûr d'ü kapitâ d'i româ l'éra malâd, e anse l'éra dre skuaze a tra i ôltem. E jura, po, a sent a parlâ de 'l Gezû ke l'ê 'ndi paragi... ol kapitâ l'ge manda 'nkontra ü kuak d'i eci d'i Güdë del paîz a pregâl de pasâ de lâ de lü per guariga 'l so servidûr.

Kei lâ, riâc lâ del Gezû, i a pregaa skuaze poa de stöfâl ak: — Áda... kel ke l'me man-da ke de te... a l'mêrita prope ke te te l'vütet! A l'ge ôl be a la nosta zet... l'ê lü ke l'm'ă fac fa sô la ka dela dutrina ke 'n paîz —. E ilura 'l Gezû, senza üli saî se 'l servidûr l'éra almën ü brao ebrě o no, a l's'ê 'nviâd ilâ kon lur.

Manka mia tat a riâ 'lâ e 'l kapitâ l'ge manda 'nkontra amô dei amîz per diga isě: — A, e... destúrbes mia, te, maester! Pretende mia ke te eñet in ka mea; ô ñe kredîd de püdi fas ved me, de te: a l'so ki ke so, me, e l'so ki ke te set te. E l'so ke l'ê asě ke te te diget sô ôna parola de luntâ... e 'l me servidûr a l'ê bel e guarîd! O sedenô, áda. Poa me sto sota ergű e poa me g'ô sota ergű. Me ge dige a ü soldât “vâ lâ, te!” e kel lâ l'va lâ, ge di-ge a ün oter “vé ke, te!”, e l've. E a 'l me servidûr ge dige “fâm kel laûr ke!” e lü l'me l'fa. E isě, dokâ, se te te ôlet ... —.

Kuando ke 'l Gezû l'ă sentîd kel'antîfona ke, l'ê ñak restâd! Alura, l'g'ă dic isě a kei

ke l'g'ïa 'nsema e töc kei ke l'g'ïa dre: — Ve l'dige me ke, 'nfinadês... mai ñe ü ebrë, ñe ü ke l'ê ü, ke aturen... g'ö mia troâd öna fidüca isë granda! —

E i so mesagër del kapitâ, turnâc indrë, a i ä troâd lâ 'l so servidûr bel e guarîd!

Ön'otra olta, l'ê pasâd ilâ 'nvers a Naîm, e l'g'ïa dre 'nsem i so amîz e poa de l'otra zet de lâ 'n gir. Ęrei mia dre a portâ a sotrâ ü mort, sul iscët de mader êdoa? Ol Gezû... kuando ke l'ï'ä esta de izî, la g'ä fac asë kompassjû. E ilura, a l'g'ä dic issë, a le:

— Dâi, pjânz mia isë, po! —. Po, riâd in banda a 'l trespört a la toka, e kei lâ i se ferma, e lu l'fa: — Zuenët, sènt kozê te dige me. Me te dige de leâ sö de l'ê! —

E 'l mort a l's'ê met a setû, e l'parla! E isë i ge l'mena lâ amô iv a la so mader. A i ê ñak restâc töc a boka erta!, e 'ntra spaënt e kontënt i ge daa glôrea a 'l Dio Grand e i se dizia isë: — A, prope, ge n'ê amô, de gran profëc... e ün otr'Elî l'ê prope ke 'ndelmêz a noter! Ol Dio Sant... a l've zo amô a troâ la so zet! Alura... m'se salva amô... —

E la nœa de töc kei bei laûr ke la se spandia fo per töt ol teritore.

Isë, i so amîz del Batesta i g'i ä köntâc sö ak a lü, lâ 'n prezû...

Jura, ü bel de, ol Goân a g'n'ä mandâd ilâ du a 'l Gezû, a domandaga: — Set te po, kel ke l'g'ä de riâ... o m'g'äi de spetâ amô ergüdoter? —. E isë i fa, kei du lâ: i ge l'domanda precîz a 'l Gezû. Ke... l'éra gösto dre a guarîn ü de sä infirem, ü de lâ invazâd, ü orbo... E 'lura, a l'fa oter ke respöndega:

— Buna. Indi lâ de 'l me küzî 'l Goân, oter... e riferîga kel ke iv vest e sentîd ke aturen: orbi ke ge ed be... sop ke kamina drec... lebrûz senza pjö pjage... surc ke i ge sent... e poa morc ke salta impë. Se l'ê mia kesta ke, la buna nœa per töc i poerëc... E dizîga poa isë “beâd lü kel ke l'se fa mia skândol de me!”. Lü l'kapererâ —.

[...Amô per kela storja lâ de ü ke l'dezüna e l'oter ke l'majuna?] E, partîc i so du amîz del Goân, ol Gezû... l's'ê metîd dre a parlağa del Goân a la zet ke g'éra lâ:

— Dizîm impö, oter. Si 'ndac lâ a ed kozê, po, fo 'ndel dezêrt e dre a 'l Zordâ... e? Öna kana zbatida de 'l vent in mez a i otre? O v'él istâc inviâd insä ki, dokâ? Ü figürî a la moda, quanc e kapël de komandâ? Ma kei ke porta quanc e kapei e mantei i sta 'ndi

palâs d'i re... e i da fo mance, e i vend i so pjasër... sê o no? E jura, siv indâc fo a ed kozê, po? Aa... ü profêt. Sê, ve l'dige me, e anse, sê: ü bel tok de pjö d'ü profêt kompâñ d'i oter. Ôna kana... sê: l'ôltema tromba pacêfeka del Dio Pacefek prima ke l'ge dage fo l'urden a i so trombe del arkangel dela guera: e i sunerâ mia itorja per noter, istaolta, se prima m'se konvertês mia töc! A l'ê be de lü ke g'ê skriîd zo det inde Bibja “âdel ke, l' me 'mbasadûr! A l'mande fo inâc prima de te e l'te paregerâ la strada denâc a te”. Ve l'dige me, prope: ol Goân... a l'ê l' pjö grand om nasîd de dona! [*E perô, me ve dige a ergôt d'oter: ol pjö picên ke g'ê ke a l'mond, kuand ke l'ê det indel reñ del cel, a l'ê a kel grand kompâñ de lü, denâc a l'Dio Re.*] E lü, ol Goân... uramai, a i ã sentîd töc: poa kei k'i ge sentia mia tat d'i orege: e i s'ê zbasâc zo denâc a l'Grand Siñûr, po i s'ê fac batezâ de l'Goân, koma ke l'éra göst. Ma kei koi orege nete invece, i farezê e i duturû, lur no, lur i s'ê refudâc: ke isê ol Dio Siñûr l'ã laorâd per ol pernegôt, kon lur, oter ke Goân! Indüini 'mpo oter, a kei lê, ki ke ge paserâ denâc... indel reñ ke l'ria! E l'ura, i paragneroi a ki po, kela rasa de zet lê, e? Gé sömeerai a ki, dokâ!? I ge sömea a kei scetorlôc semper lâ 'n pjasa a dindâ sentâc zo sö l'müradêl o sö la spigor-sa... ke mê diga “ü de, a m'v'ã sunâd ol pifer a festa, e iv ñe balâd; ün oter de m'ã sunâd de mort, e i ñe dezmetîd de griñotâ! Si prope semper de oje a l'inkuntrare, oter!”. A g'ê eñîd insã ol Batesta, ün om ke no l'maja pa ñe l'biv vi: e i ge diz isê ke l'g'ã det ü demone, e l'istâ be 'n prezû. Gé n'ê ke ün oter... iscêd de om ke maja e biv kompâñ d'i oter: e i me diz “âdel po lê, ol majû e l'beû, ke l'ê amîz de kei d'i tase e d'i pok de bu!”. Oê... ke m'se salva pjö negû! I se salva adoma lur: ma, a ardaga pjö tat a kel k'i diz... koñ'a kel ki fa. Dizim impö, dokâ, se kela lê l'ê sapjensa, o se la sapjensa la stamia de ka d'ön'otra banda e, a camâs i so scec... a i ê po bu de rekoñosila!? Ma la so sapjensa del Siñûr, kela... a i a testimoñerâ po be i so fedei gösc, me dige —.

Ü d'i farezê, ôna ôlta, l'invida alistês ol Gezû a majâ 'n ka soa. Lü l'va de det, e l'se senta zo a tâola. Ôna dona, ôna de malafare del paîz... saîd ke l'Gezû l'ê lê 'n ka de kel lê, la ge ria de det kondû vazetî de ôle pröfömâd, la se met zo 'n tera lê 'n banda a l'

Gezû, la ge baña sô i so pe kondöna bela pjanzida, po... g'i süga zo koi so kiei long e g'i baza sô e g'i onz sô kol öle pröfömâd! A ed kei laûr lë, ol farezë padrû de ka... a l'pensa sô: — A... se kesto ke l'éra delbû ü profët... a l'se lasaa mia tokâ d'öna donasa de tal risma! — Ol Gezû manimâ l'ge fa, prope a lü:

— Simû... g'ö ergöt de div, me —. E 'l padrû de ka: — A, dim pör sô, maester —.

— Afura. Ü sjour a l'g'ïa du... ke l'g'ïa de sköd de töc du: de ü, l'ge n'veñia siksënt bele karte, e de kel oter sinkuanta. Ma sikome ke ñe ü ñe l'oter i g'ïa i palanke de salda-ga l'könt... a i ä kundunâc töc du. Ki ke g'avrâl pjö tat de diga grasje, e, segönd vu? —

E 'l padrû de ka: — Kel... ke l'g'ä kundunâd de pjö, me dige! —.

E 'l Gezû: — Brao a u! İv gödekâd göst! —. E po, ultâd invêrs a la dona:

— Edî kela dona ke? A so eñîd det in ka osta... e m'ï ñe portâd ke l'akua de laâs zo i pe. E le... m'ï ä laâc zo del so e del so m'ï ä a sügâc zo. U, m'ïv mia bazâd sô de benve-ñîd, le l'ê dre amô a bazâm sô i pe. U m'ï mia onzîd sô 'l ko kol öle... kompân ke s'fa kuand ke l'ria 'n ka ergü ke könta: le la me pröföma i pe. Afura, ve l'dige me: le, i g'ê perdunâd töc i so pekâc. E g'ïa rezû: i sarâ mia ñe pok e i a l'sa ak. Ma le la sta 'ndre ñe kol amûr, ke la öl vês perdunada, e la diz a grasje prima! A l'ê kei k'i se 'nkrêd de ĩga pok o negöt de fas perdunâ, k'i se kred mai in doër de di grasje, e i se 'nkômoda ñak —. Po l'ge diz isë a la dona: — I to pekâc i t'ê perdunâc töc, inkö! —.

A tâola... i skomensaa amô turna a siñâs intrade lur e tontoñâ de sä e de lä:

— Öö! Adês po! Ma ki se 'nkredel de ês ki po, lü ke... ke l'se permêt de perdunâ poa i pekâc!? —. Ma 'l Gezû l'salüda isë la dona:

— Vâ in paz, te. Amûr e fidüca... t'ët troâd la to riseta gösta, e te se salvet amô —.

Kuat a fomne, mê a di ke, kuand ke l'indaa 'n gir per sitâ e paîz a predikâ fo la so buna nöa del reñ del Dio, l'g'ïa dre së i so dudz e po dei otr'amîz: ma poa öna kuak done, intrâ parete so de lü e fomne guaride de kuak mal e demone: prezempe öna Marjana Madelena, ke la g'ïa adôs ü set djâoi, prima, e öna Goana moër del Kûza, fatûr del Eröd, öna Süzana, e poa dei otre... ke i a teñia 'mpo nec e i ge faa mia mankâ 'l nese-

sare, de 'l so de lure k'i g'ja 'n sostanse; e kuak völte s'püdia êdele a fa cirkol insêm a dei otre done del post, mia tat de lonz de 'l muntû dela zet indokê l'parlaa 'l Gezû. A êdei töc insema... diolte s'sia mia kozê pensâ: öna kombrîkola de pötvêg (fo ke ü per, ne), po, a distansa de sigüresa... öna kombrîkola de fomne, spuzade e mia, töc vaga-bönc aturen per ol païs... i se spetaa po kozê, kele lä, kisapo! E oter...

KO (D'I) OT : SOMNA — BORASKA — GAÏR

Ü bel de, êkola, ge s'ê fac aturen ü bel muntû de zet, e lü l'g'ã köntâd sö kela parâ-bola ke: — Ü de, ol masër a l'ê 'ndac fo a somnâ la so braa somesa. E, 'ntat ke i a span-dia fo... öna part la fenia zo sö 'l sentër, la eñia pestada... e i ozei a i a bekaa sö. Ön'o-tra part, la fenia 'ntramêz a i plok muntunâc sö 'nfonta a 'l kap, e la bötaa apena, po la sekaa ak. Öna part amô la fenia det intrê i spi dela seza d'i bande... e la seza i a sofegaa göst apena spontada sö. Öna part, po, cêrtoza, la 'ndaa a fenî det indela tera buna: e læ i gre i bötaa sö e i spontaa fo, e i kresia, e læ i daa akâ 'l sento per ü. İv sentîd be? Jura, dokâ, ki ke öl sêntega... 'l ge sente po miga adoma d'i orege! —

Ma i so i éra zemô dre a domandaga ke storja ërela, po, kela læ.

E alura, a lur a l'g'ã respondîd isë:

— Va be: kon voter... a s'pöl vês a 'mpo pjö car. Koi oter, invece, mê 'nda lä adoma a la larga, per sömeanse; tat... a g'él mia skriîd zo bel car det inde Bibja “i arda ma i ved miga, i sent po i skolta ñak!”? Adé ke se ge 'nteresa a ergü, de 'nda ü falî a fond indei laûr... Atura, ol sügo dela storja l'ê kesto ke. La somesa... a l'ê kel ke l'diz ol Sant Si-ñûr. I gre redolâc sö la strada a l'völ di ki ke skolta, ma l'ria 'l djaol e i parole bune g'i lapa vja lü, mia ke djolte i ge krede delbû, e isë i se salve... Kei fenîc intramêz a i plok a l'völ di ke i skolta a ontera lur, e kontêc: ma i ge lasa mia fa i raîz a i parole göste; i a te bune ü momênt, perô a la so proa d'i fati... i ê dei otre i parole ke könta, per lur. Kei

borlâc det indi spi, l'völ di kei ke i ä skoltâd, lur, sê... ma po, kamina kamina... i se lasa capâ de tôte i so preokupasjû, d'i solc, d'i pjasêr, e isê 'l fröt bu a l'ria pjö. Per fûrtüna, o... g'ê poa i gre k'i se 'mpjenta det indela tera buna, e l'völ di kei ke skolta kol kör net e deêrt, e i gre dela so parola del Siñûr a i a te a bu in tera grasa, e i ge sta dre, e i porta fröc a kaañe. Mê mêtela det indela so tera, la somesa, e det indel kör la parola! A l'ê kompân dela lüz. A g'ê negû in nivalög a post de ko, ke l'impia sö öna löserna, e l'la kuarca zo kondû vaz o l'la kasa sota a l'lec, me dige! Ma i a meterâ pjötôtst bela tekada vja, sö a l'volt asê de faga lüz a ki ke g'ê de det, e a ki ke e de det, o no!? Êkola, staolta v'l'ö spjegâd söbet me: ma l'sarâ mia semper isê. Perô üiga mia pura: ke negöt a l'resterâ per trop tep senza spjegasjû, e kon voter g'ö mia de segrêc, me. A l'veñerâ 'l so tep, ke l've sarâ car prope töt. E jura, dokâ stîm po atênc be, a kel ke sentî, perkê ü bel domâ... a kel ke se regorderâ ge deenterâ car tace laûr, ma a kel de poka memorja ge deenterâ fosk poa kel pukî ke l'g'ävrâ amô 'ndi orege e poa 'ndi ögl!— A l'ê forsâk istâc amô kela olta lê, ke g'ê riâd iîâ a troâl la so mader e amô erqû d'i so: ma, de tata zet ke g'éra lâ, i ge rîaa prope mia a eñiga izî. Añura i ge fa riâ lâ la uz “âda ke g'ê lâ de fo la to mader po amô erqû d'i to de ka... k'i ölerês vedet e parlât”. E lü: — A n'n'ö a pjasêr. Perô, me g'ö ke pje de zet k'i völ vedem e de pjö amô skoltâm: e ve dige me, ke töt kei k'i ölerâ met in prâtika ergöt de kel k'i sent ke... a i ê poa lur me mader e me fradei e me parêc, eko! — E oter.

Ün oter de, l'ê saltâd sö 'n barka koi so amîz e l'g'ä dic “indêm de lâ, sönkel'otra ria del lag!”. E i s'ê 'nviâc iîâ. E 'ntat k'i rema, lü, strak koma l'éra kela sira lâ, l'se 'ndörmenta ak. Te riel mia sö 'l vent, e bel fort? La barka la fa akua de bröt, e isê i ê a 'n perikol, lâ 'ndelmêz a l'lag. E jura i a dezda fo “oê, te maestro... ke la marka prope mal... a m'se salva pjö ñek'a fa i pes!”. E lü l'se dezda fo, po l'ge uza dre impö a l'vent e a i onde töt in gir, e... laûr ñe de kred: de bot a l'ê kalma pjata! E a lur a l'ge diz isê:

— Indoéla po, oter... tötâ 'sta fidüca ke dizî isê de üga... e?! —

E kei lâ, töt ismörç, senza skuaze bofâ i se dizia ü ko' l'oter: — Öla, te! Ma él ki po

delbû, lü ke: ke, l'ge komanda akâ a l'arja e a l'akua... e i ge öbedës ak?! Kompân de l' mar ke l's'ê dervîd fo a l' so urden del Mozê! —

E isë, i ê riâc lâ a la ria d'i pagâ Gerazë, in front a la Gâlelea.

A l'éra apena saltâd zo de la barka, ke l'ge ria 'nkontra de l' paîz ü poerêt indjaolâd, ke l'éra de tat ke l'kampaa töt bjôt in gir per i cemetera. Kuando ke l'ã est ol Gezû... l'ge s'ê bôtâd zo a i pe, e l'daa fo de mat, e l'vuzaa sö a presapök isë: — Koze g'ët po te de pjö de me, a... Gezû, scet del Pjö Olt indel cel? A te skongüre: tormètem pjö! —

Ol Gezû l'éra zemô dre a urdenaga a l' demone de lasâ sta kel poer om lâ, e de teala fo öna olta buna de faga de l' mal (ke ge tokaa ligâl sö koi kadene, e l'ge rîaa a spakâ poa kele e g'éra ñe lökêc de teñel, l'éra semper aturen selvadeg e solitare).

Ol Gezû l'ge domanda: — Se camet komê, te, a? —

E kel lâ l'ge respönd “Batafû, a l'ê l' me nom!”: de tace ke n'n'ïa adôs! E i ge domanda de ês mia sfratâc... de ês mia neentâc. Va a kapî! Kelkelê, sö s'ö 'ndü spontü a pik dre a l' lag a g'éra lâ öna möca de porsei: i demone i ge s'ê metîc in korp a kei, e isë... g'ê capâd a töc ol ko... e i s'ê a bôtâc zo töc de korsa det indel lag! Per negâ töc, cêrtosa, lur e i so brae 'nküilî... po de sigür de fal malêdî e kasâ vja, lü, d'i so padrû d'i porsei, dopo! I so guardjâ k'i ge staa dre lâ de sura a ed ü laür isë i ê skapâc ivjâ de karjera a kontâl sö 'n paîz. La zet l'ê eñîda zo de l' paîz per ved impö: e riâc ilâ del Gezû, i ã troâd lâ kuacâd zo, estîd sö e bel köët, in banda a lü... kel poerêt lâ d'i demone. A lura i s'ê ñak ispaentâc: e a sent amô a köntâ sö de kei ke i ã est i fati komê ke i éra 'ndac, i g'ã domandâd a l' Gezû a nom de töta la regû, de lasai 'n paz e faga l' pjasër de kambj â arja, e se magare l'ge okoria o l'vulia ergöt de lur, per indâ vja: “ta ma set zemô kostâd kar asë, profët güdê!”. Kel lâ ke l'éra stac desliberâd fo d'i so djâoi a l'g'ã domandâd de püdi 'ndaga dre: ma l' Gezû i ã saludâd, po l'g'ã dic de turnâ a ka soa, e de köntaga semper sö a töc kel ke l' Dio Grand a l'g'ïa fac de be 'nkö. Ke isë, a la so manera, l'ê po stac ol prim “misjunare”, lâ, senza ês ña ebrë.

E lura, po, ol Gezû koi so amîz a i ê saltâc sö amô 'n barka e i ê turnâc indrë. E poa

lă, sô 'n kela ria de lă, g'éra lă ü muntû de zet a spetâl. A l's'ê fac înac ü tal Gaîr, ke l'éra a 'l kapo dela dutrina, lă. E, inzenôcâd zo denâc a 'l Gezû, a i a pregaa kol kör im-mâ (indimâ, in ma) ke l'ge 'ndes idrê a ka soa, ke g'éra lă la so ôneka sceta de dude-zâñ ke l'éra dre a mœrega... E 'ntat k'i 'ndaa 'lă la zet a i a skisaa sô de sâ e de lă, tace ke ge n'éra dre. G'éra lă a ôna pôera funnî ke d'ôna donzêna de añ la patia de perd ol sang... e negû l'g'ïa mai riâd a guarila. La ge s'ê portada lă vizî a 'l Gezû, la g'ă tokâd apena apena la franza del so mantêl (kela olta lă l'g'ïa sô a lü ü mantêl kola so braa franza ritôâl)... akâ se la ge sia a benone de “kontaminâl” poa lü, ma de pjö a kred ke lü l'éra mia ü kompâñ de töc: e... la s'ê po troada guarida!

In kel, ol Gezû l'fa, a olta uz: — Ki ke m'ă tokâd, ke, e? —. E negû l'éra stac. Alura l'ê po 'l Pjero a diga isê: — Ma maester... se te set ke skisâd det indelmêz a ü muntû de zet ...a dreca e mansina, denâc po dedrê! —. E 'l Gezû a lü: — Me perô ô sentîd ke ergû l'm'ă tokâd det, e l'm'ă portâd ivjâ ergöt! —. Alura, kela pôera dona lă, tötta erquñûza de ês iskoprida isê... la ge s'ê bôtâda zo deante, e la tremaa, e la köntaa sô a olta uz denâc a töc ol so mal, e komekê, êkola, la s'éra askada a tokâl (guai, koi so legi de lur!, ôna fonna kon kel mal lă!) e l'éra zemô a guarida. Ol Gezû 'n buna fi l'g'ă dic isê: — A te, sceta del Isdraël, la to gran fidüca la t'ă a guarîd: vâ pör in paz, adês, po sâlves! —.

E 'ntat, a l'ria aladê ü de la ka del kapo dela dutrina, e l'ge diz isê: — La to sceta l'ê a morta, uramai. Te pö a lasâ sta de destürbâ... ol to maestro, ke —. Ma 'l Gezû l'ă sentîd töt, e l'g'ă dic a 'l Gaîr: — Te íga mia pura, dokâ! Íga adoma buna fidüca amô, e t'ede-rêr ke l'ê salva! —. E dapo, riâc lă a la so ka de lü, l'ă ülid negû de det insema, fo ke 'l Pjero, ol Gakom e 'l Goân, e i so genitûr de le. De fo, töc i löcaa e i faa lamênt per la morta. Lü invece l'dizia, indel indâ de det: — Pjanzi mia, ke l'ê mia morta, la dorma adoma! —. E kei lă i ge daa a de 'l mat. Ma lü, 'ndac de det, a l'g'ă capâd indimâ la so manina, e l'g'ă dic sô bel volt: — Lèa sô, a te, pekurina! —. E... la sceta l'ê leada sô! A l'g'ă dac urden a i so de daqa ergöt de majâ. I so genitûr... a i ê ñak restâc izbalurdîc: perô lü l'g'ă rekomandâd de köntâga sô negöt a negû [fin ke l'éra 'mpo luntâ del paîz].

KO NÖV : MISJÛ — PA E PES — TRASFIGÛRASJÛ

Û de, ol Gezû l'ă trac insêm i so didez per inviai fo aturen a predikâ 'l reñ del Dio, e l'g'ă dic isě de das de fa a kasâ vja diâoi, e i so mai d'i persune k'i 'nkontraa, ke djâoi e maladie i sarês isparîc, a i so urdeñ de lur. E l'g'ă dic isě:

— Tüi dre negõt per ol vjas, ñe bastû ñe bursî ñe pa e ñe do kamize per ü. La prima ka ke i ve capa 'n ka, 'ndü paîz, stî lă finakê kambî paîz. Se 'ndü paîz i ve öl negű... fi oter ke zbat zo la so pulver d'i osc sândai, e oter; po... negõt de maledisjû [ma la so tera de lur lă l'ê mia de sigű tera santa... i se la ederâ po kon ki ke l'me manda me 'n' nac a lü e l've manda oter innâc a me] —. E jura i ê partîc, e i pasaa fo paîz per paîz e i portaa fo despertõt la buna nõa, e i ge guaria i so malâc.

In kel tep lă, ol Eröd a l'ê eñîd a saî töc kei laür ke, e l'sia mia kozê pensân, perkê g'éra a de kei k'i dizia isě ke 'l Goân a l'éra resüsität, e de kei ke dizia ke g'éra turnâd indrê amô ol Elî, e kei ke dizia ke de sigű a g'éra 'n gir amô ü profêt dapo tat tep, memomâl. Ma l'Eröd i a l'sia be, lü, ke 'l Goân a l'îa apena kopâd fo lü e l'îa est ol so ko teâd zo; e de morc a resüsität... a n'n'éra gran pok del parěr... perô s'se sa mai: e dokâ, l'se domandaa püdiel ês kî, lü lě... ke n'ne sentia a kõntâ sô tace laür. E l'vülia edel, de saî se l'g'îa po dre delbû tata zet, êkola.

A 'l so de, i apôstoi i ê turnâc a troâs kol Gezû, e i ge kõntaa sô töt kel k'i g'îa riâd a fa. Lü... l's'i ê trac idrê, po l's'ê ritirâd lă apröf a 'l paîz de Bezâeda. Ma g'ê stac negõt de fa: poa lă g'éra zemô riâd lă i uz d'i nõitâ... e la zet la se traa 'nsem, e la ge staa inkolada adôs. G'ê restâd adoma ke capai ontera e predikâ fo sôbet poa lă 'l reñ del Dio, a guariga ki ke n'n'îa imbizôñ e fidüca. Invêrs a sira, i ge se fa apröv i so didez e i ge diz isě: — Lâsela po 'nda, tötâ 'sta zet, te... mândei vja: k'i 'ndage a tös vergota de majâ, e i troe de dörmî ke 'n gir: perkê... ke isě g'ê ñe prope negõt de negota, de tra domâ!

Ma 'l Gezû l'ge diz: — A i m'ê eñîc dre a noter kon fidüca: me tokerês mia a noter... de daga ergõt de majâ, mia adoma câkole, e? Sö... de brae, dokâ: diga fo oter de majâ!

(Ergű... g'ê parîd a de sent “dis fo oter, de majâ, fîs majâ oter”: e i ă pensâd “gösto:

amô 'mpo... e i me maja delbû, se m'va aante a cicarâ, ke!') I ge respõnd: — Ma... se m'g'ã ke 'n tõt sik pa e du pes! T'õlerët mia ke m'indage noter a krompâ impõ de roba... e? Per tõtã kela zet ke... set bu de kõntai, te? —

Ma lü l'ge diz amô: — Dài, de sae: fii sentâ zo impõ læ, sinkuanta a sinkuanta —

— Kozê?! A, be... Oë, buna zet: sentis zo impõ sò 'l prat, e, a sinkuantene, læ —

E 'l Gezû l'capa 'ndi ma i sik pa e i du pes, a l'varsa sò i õg a 'l cel, a l'ge diz sò õna benedisjû, i a scepa sò a tokei... po g'i da 'ndimâ a i so amîz... per dagen fo a la zet.

Oë: i n'n'ã majâd tõi asê... e n'n'ã a portâd vjâ ü dudez seste de kel ke g'ê ansâd!

[...Nooter ke ge see det a ü falinî de ezagerasjû a fi de be, indel regordâs, a? Per me kõnt de me, l'sarês zemô asê ke negû d'i dudez l'ê restâd sensa roba de da vja de majâ e l'ê turnâd indrê kon vergõt indimâ de met sota i dec poa lü. Perô, se ge n'ê ansâd delbû isê tat... me, me fa problêm põtõt i seste, læ sò 'l prat. Metêm ke ge sees læ de la zet in vjas per deluntâ be, de e de... Ma oter, êkola.]

Õna sira ke 'l Gezû l'istaa impõ 'lã izolâd a pregå, i ge s'ê fac læ 'n banda i so dudez amîz, e jura isê a brüzapël a l'g'ã domandâd:

— In fi d'i kõnc, ki sarês ki po me... per la zet, ke, e? —

I g'ã respondid ke per ergû l'éra amô 'l poer Batesta, per vergüdoter l'éra amô ol Elí mai ñe mort, e per tace d'oter l'éra amô ü profët de kei d'õna õlta, turnâd indrê, êkola ...magare aderitûra 'l Mozê. Hura, l'g'ã domandâd amô a 'l gul:

— A, mia adoma Elí o Elizê, dokâ. E oter, koze siv bu de di ke soi ki, me... a? —

E 'l Pjero l'g'ã dic isê per tõi: — Te, per noter... te set ol inviâd del Sifûr, ol re per noter: e dokâ noter a m'te sta dre a te —

Ol Gezû l'g'ã dic ñe brao ñe scao, kela õlta læ, ma apena de kõntagel sò a negû, perkê l'éra uramai skuaze ura per lü de ñga de patîn ü sfrak, e de ês kondanâd d'i pjõ gran prec e duturû, e anse poa de ês sotrâd... fina perô a resüsità a 'l so ters de.

A i éra mia tat aleger, a kel parlâ læ isê skür; e l'ê po 'ndac inâc isê:

— E ki ke õl veñem dre a me [e poa lü a 'l so tep restâ iv kon me]... a l'g'ã adoma de

tös sö la so braa [part de] fadiga de per de, lasâ 'ndre i so bei progêc... e stam a i kôstole. Ki ke ölerâ salvâs lü per i so dizêñ e persokönt... a l'böterâ vja la so eta. A l'se salverâ delbû, invece, ki ke per me l'sarâ bu de desmentegâs... e de perdes idrë a me. Pensiga sö be: ke pro ge n've a ü, ke l'guadeñe akâ 'l mond intrêg... se a la finfî l'se perd lü medezem e l'se rüina lü, e? Regordis be, jura: ki ke se fiderâ mia, ma l'se ergoñerâ de me e po d'i me parole adês ke... dapo sorö me a koñosel mia, a 'l momênt del me triöñf e dela glôrea kol Pader in cel e i so ângei. Po ve dige söbet ke adês: isku aze töc voter ke si ke adês, a mörerî mia prima de îga est det bel car [...a s'fa komê a 'ndaga det] indel reñ ke dige me —.

Ü set o ot de dapo kei diskörs ke, ol Gezû l'se tö dre adoma ke Pjero Gakom e Goân e l'se porta sö sö 'l mut a pregâ. E 'ntat ke lü l'prega, la so faca la se kambja e la so tônega la deenta d'ü bjank ezagerâd, ke berlüz. Po, âda lê du d'oter a parlâ 'nsem kon lü!éi mia... ol Mozê e l'Elî in persuna, komparîc lê 'ndel so splendûr? E i parla de lü ke l'g'â de part, ke l'sarês po 'ndac ivjâ de Gerüzalêm. A ardaga a l'ura e a la strakesja ...ol Pjero e i oter du i kroderês zo del song; ma i ge ria a sta desc amô ü falî, infina ke l'Elî e 'l Mozê i fa per part. Jura, 'l Pjero l'ge diz isê:

— Ke bel... maestro! Se te ölet... fâi sta ke amô, ke noter a m'fa sö ergöt de sta a 'l ripâr de 'l freg e de la brina poa oter tri: e... domammatîna [domâ de/in matina]... —. (I a l'sa po be ñe lü kel ke l'könta sö, a di la eritâ, e l'ge pensa mia certo a i do tende ke l'â fac sö 'l Mozê a turnâ zo de 'l mut Sînai). E göst inkel momênt a l'ria lê ü neolôt ke i a 'nturca det töc. A la pura de fenî det indü neol... zûntega öna uz ke la truna fo isê: “Ma skultil, po... ol me scet preferîd!”. E... fenida la uz, pasâd a 'l neol e skomparîc a i du soci del Gezû! Ke isê po... i â püdîd a dormî ü falî.

De kel fato lê perô (k'i âbe po pensâd, dapo, de îl diolte 'nsoñâd? Ma... in tri?) a i â pjö deskütîd ñe i â köntâd sö negöt a negŭ [fina a ü bel tok dapo “ol fato” de Paskua, kuand ke i â po tekâd a kapiğa det vergöt de pjö, e a daga ü sens a töt kel ke manmâ i se regordaa. E a propozet de regordâs: me pense ke l'ê magare stac dapo kel fato ke

d'i pa e pes a oja... ke 'l Gezû l's'ê ritirâd ü kuak de indel dezêrt, k'i ülia fal sô re; e prope jura l'g'ă ũd i so brae tentasjû! Apena batezâd, invece, me digerês... l'éra stac lâ 'mpo kol so kûzî. Sto mia ostinâd, e! Po, oter.]

La matina dapo, turnâc zo del mut, ge e 'nkontra ü bel karê de zet. E de 'ntramês a 'l muntû la se arsa sô ôna uz de om: — Maestro, te prege: impjasêr, dâga te ön'ögada a 'l me sul iscêt ke g'ö. A g'l'ö domandâd a i to amîz ke, de mandâm vja 'sto bröt demone ...ma i g'ê mia riâc —. E 'l Gezû l'g'ă respondîd isê:

— Aa, santa pasensja... generasjû malfideta e pervertîda! Me tökel amô tat... de edev e suportâv, voter? —. [Gê parlael magare sô 'l müz a i djâoi? O, üli pensâ... a i so apô-stoi!? Me dige ke l'éra lü lâ... a îga mia fidüca asê, kompân del kapitâ d'i româ invece per ol so servo...]. — Sâ, pôrtemel ke a me 'l to scet, dokâ! —.

Intât k'i ge l'portaa lâ, o' speret purkû i a zbatia zo 'n tera, e l'ge eñia i konvülsjû. Finakê 'l Gezû l'g'ă bajâd dre asê a kel bröt demone... e kel g'ă tokâd lasâl liber, ke isê g'l'ă dac amô a 'l so pader, kon töc lâ prima zbalurdîc a boka erta, a edî e a sentî, e dapo a kantâ e lodâ la grandesa del so Dio Siñûr.

Kei lâ i éra amô lâ töc aleger per kel fato lâ, e 'l Gezû l'ge fa a i so amîz:

— Stîm po atênc be a kel ke ve dige adês, oter. Ol vost iscêt de om mesia... inkö i a porta 'n cel, ma 'ndomâ... i ê uramai pronc a dagel indimâ a serto zet! —.

Gê entrerâl kozê, po... E, natürâl, i ge kapia det ñe negota, intrâ ke i éra do parole 'n kruz bötade lâ... intrâ k'i g'ïa pura a domandaga de spjegâs, e 'ntra k'i laur i 'ndaa a benone asê, invece, intât. Anse: de tat k'i ge kapia det göst... i s'ê a metîc dre a begâ, per decidî... ki ke l'éra 'l pjö importânt, intrâ de lur.

Îhura ol Gezû, kapîd a fond kel k'i g'ïa det indel kono, l'ă camâd lâ ü scetî, se l'ê tirâd vizî, e l's'ê fac sent be de töc a di prope isê: — Sâ ke de me, oter lê, zuenôc de bele speranse... Ve forö ed me, ki ke l'ê 'l pjö importânt, per me. Edî be kel iscetî ke? Êkola: ki ke l'ê bu de stam aprö v isê kompân de lü... a l'ê kel, ol pjö grand de töc, eko. E poa ki ke l'ê bu de teñes in banda ü scetî isê... l'ê lü, ke l'ê bu de teñem det a me: e

ki ke me teñ det me a l'teñ de la so banda ki ke m'ă nviâd ke me. E isě... se ũlî kapiga det vergöt dokâ, kapila! Ol pjö pikol intrâ de oter... a l'sarâ a l' pjö grand —.

[Ke ergŭ i ă po 'ntendida isě: ke l' Goanî l'sarês iskampâd pjö tat de töc. Per din sö ke sul ke öna d'i tate... ne. Defati, äda te...]

Ol Goân, ke l'éra l' pjö zuen, ma forse prope mia semper ol pjö atênt, a l'salta sö de pal in fraska: — Te, maestro... Öna olta, m'ă est ü ke l'kasaa vja i demone in to nom de te, ke m'l'ia mai vest ñe sö l' takuî. M'ăi fac be a proebiga de fal... se l've mia kon noter, a? —. E l' Gezû a lü: — Ma no... ma no! Regordis ol Mozê koi so brae setanta, lâ 'ndel dezêrt... e kei oter du k'i profetaa be, senza ês de kei setanta lâ... Adoma perkê l'ê mia ke kon noter, a l'völ mia di ke l'ê per forsa kontra, se l'fa de l' be! Proebiga negöt a negŭ, oter. Teñi bu ke ki 'n kosjensa l've fa mia kontra... l'ê zemô de la nosta banda, in prâtika... pjö tat de ki ke l'laura kuntra de noter, ke —.

KO DEZ : MISJÛ IN 72 — SAMARETÂ BU

E segönd ol dizêñ ke l'preedia l' kömpîs del so tep, e la so departida de l' mond, ol Gezû l's'ê po fac forsa: l's'ê decidid a 'nviâs ilâ per Gerüzalêm, e l'ă mandâd innante a preparâ l' terê. Kei lâ, partîc per prim, a i ê pasâc det indŭ paîz dela Samarea, e l'ê i ge prepara la strada a lü, per fal troâ be kuand ke l'riaa. Ma i samaretâ... a saî k'i éra 'n vjas per Gerüzalêm e mia per ol so de lur, de dom, e ke l'disia de ês lü ol mesia (lur i se 'nkredia ke l'g'éra de nas inde' Samarea...) i ă mia ũlîd saigen, de lur. Kuand ke g'ê eñîd la uz de kel fato l'ê a l' Gakomî e a l' Goanî... ke isě ge tokaa de pasâ fo la noc defô a i stele... i du fradei i g'ă dic isě a l' Gezû: — Ölet ke m'ge came zo fög e fjame de l' cel e k'i brüze töc insemâ... kompâñ ke l'ă fac ol Elî koi prec d'i îdoi? A i éra be a dic ol batezadûr, o no, ke la zgür l'ê a la raîs! —. Ma l' Gezû i ă a capada a mal, e l'g'ă uzâd dre asě “m'î po capâd per ki, oter, me, e!?”.

E de jura, a i du fradei kei oter i g'ă metîd de suernôm “i du... atênc ke l'truna!”, per no esagerâ ko' “i du fômegadûr”... du Elî d'oter amô.

Po, i s'ê 'nviâc îlâ per ün'oter paîz. A l'ge a 'nkontra ü de lâ, e l'ge fa “me te eñerô dre despertôt indokê te 'nderêt te, me!”, e l'se sent a respônd: — Te g'ê adoma de saî ke i bolp i g'ă ôna tana, i ozei ol so ni... ma g'ê mia [semper] ü küsî per me de pugâ zo 'l ko, e ñe per kei k'i me e dre a me! — Kel laûr ke l'ne fa eñ in ment ün oter, ke kuand ol Gezû l'g'îa dic isê “a be, g'ê post: é kon me, te!”... kel lâ l'g'îa sirkâd ol permês de 'nda prima a sotrâ so pader érel po appena mort, o ñemô mia] e 'l Gezû l'g'ă respôndîd: — Ge n'ê zemô asê de zet ke ge pensa, a i morc e a i fônerai. Te, se t'ôt dam a tra a me, à lâ a te de 'l to pader, se l'ê suertera; salûdel (...ô sotrâd a me 'l me poer pader)... po tó sô tônega e bastû, e per sira é vja kon me a predikâ fo 'l reñ a i viv [per la eta] —. E ün oter ke l'g'îa dic isê “Sê, me oi ak, eñet dre. Ma, lâsem appena 'nda lâ a saludâ i me, ke m's'ê gôst indî paragi per kuak de”... e 'l Gezû a lû: — A, kompâñ de l'Elizê, sê; perô kompâñ de lû regôrdes ke ki ke l'preferês indâ aante a arâ 'l so kap... a l'ê mia fac per lû, ol ôfese del reñ —. E oter.

A i éra tep d'or (dizém isê): ü muntû de zueñ a i éra pronc a metes dre a lû: e 'l Gezû n'n'ă sirkâd fo amô setantadû fidâc (mia i so brae dudez, e: kei i a teñfc dre lû) e i â mandâc inâc, per tace paîz ke dapo l'g'îa de pasâ fo lû de persuna.

A l'ge dizia...: — Formêt de teâ, a n'n'ê 'nfinamai: ma de laorc a n'n'ê amô prope pukî: pregi 'l padrû del kap, dokâ, ke l'mande ke impô de operare a regoi. E intât purtis inâc voter! Êkola: ve mande fo me... kompâñ de tace añelî a sfidâ tace lûf ke g'ê 'n gir. Purti dre ñe saka, ñe mantêl, ñe sândai de skorta. Kamini semper drec, e stî mia lê a saludâ a dreca e a mansina, o tate ceremoñe. Kuanke po 'ndirî det indôna ka... prim laûr dizîga isê “pas in kela ka ke?”. E se ge sarâ lâ ergû ke l'ê per la pas, la osta pas la sarâ a la so. Sedenô... komê ñe dic. Resti pör in kela ka lê, mai e biî kel k'i maja lur e k'i ve darâ ontera: ke, l'operare l'g'ă derito a 'l so pa. Capî kel k'i ve darâ, de majâ e de biv, indei paîz indokê ergû i ve fa post per fermâs. Giroagi mia d'ôna ka a l'otra, a

sirkâ sô. Guari i malâc ke truî, e dizîga isê ke 'l reñ a l'ê ke, uramai... Se 'nvece 'ndirî det indû paîz ke negû i ve ôl ñe i ve ferma, a firî oter ke diga isê fo 'n pjasa: “M’ ve la sa ke poa la pulver d’i pe, ke l’ê la osta e la kasa vja 'l Siñûr! Però poa oter g’î de saîl alistês, ke 'l reñ a l’ria... isê e isê!”. Ve l’dige me, ke a 'l so de del gödese i sitadî de Sôdoma i g’âvrâ ü tratamênt men dÛr d’i paizâ de kel paîz lê. E guai a te, te Korazîn, po guai a te Bezâeda! Ke, se i mirâkoi ke g’ê stac fac in mez a ôtre i éra stâc fac a Tir e Sidû... zemô de tat kei sitadî lâ i se sarês konvertîc a sak indôs e sender in ko. E 'tura, êkola, indêl gödese, kel de lâ i sitadî de Tir e de Sidû i g’âvrâ ü tratamênt de pjasêr, konfrônt a 'l vost! E te Kafaren, te se 'nkredet diolte de deentâ ol cel, te... ma te spre-fonderêt a l’inferen, te 'nderêt a fascaâ te kon tîc i to bei palâs... te, ke te skoltet adoma i merkânc k’i e ke a krompâ 'l to pes... e i te fa mia pensâ a 'l pez per te ke ria. Per-kê... “kei ke skolta i me mesagêr, i me skolta me, e ki ke kasa vja i me 'mbasadûr i me refûda me... a i se met kontra de kel ke ô mandâd inâc me” —.

Pasâd fo ol so tep ke i éra dekorde de turnâ a reünîs kol Gezû, i setantadû (72: kompâñ d’i eci kapi d’Isdraêl d’ôna olta, e kompâñ d’i nasjû pagane koñoside) a i ê turnâc indrê tîc kontêc: — I me ôbedia poa i demone... sul ke a nôminât te! —.

E 'l Gezû a lur: — G’él mia skriîd zo gösto “Ede ol djaol kapo a sprefondâ zo de 'l cel kompâñ d’ü fôlmen”... po “Me ve lase pestulâ sô i serpênc e sô i skurpjû senza perikol e desfâ sô oñe potensa de aersare: pjô negôt a l’pöderâ fav de 'l mal, a oter”, e? Buna. Ma oter però g’î de ês kontêc mia per ol fato k’i ve ôbedês i demone... ma pôtôt per-kê 'l vost nom a l’ê skriîd zo sô 'ndel cel per ol reñ —.

E sôbet dapo, ol Gezû, pje de sant isperet e santa kontentesa, a l’ã pregâd isê:

— Grâsje a te, Pader Sant, Re Padrû del cel e dela tera! Te ôle be, e te dige grâsje ke te ge skondet kei bei laûr ke a sapjênc e fÛrbi e sjarâs... intât ke te g’i fet saî isê be a tace d’oter d’i to brae servidûr, ñe kôntâbei ñe filôsöfe. Él mia ira, Pader... ke te pjae isê? Sê, prope. E ak a me te m’êt fac koñôs töt, isê ke negû l’te koñôs te, Pader, isê be kompâñ de me... kompâñ ke sul ü scet a l’pöl koñôs adoma lü 'l so pader, e kompâñ ke

sul ü pader a l'koñôs ol so scet —. E po, turnâd a ardaga 'n faca a i so amîz, e trâcesei tîc pjô izî: — A, sê: beâc i ost ög per töt kel k'i ed! Ve dige me ke 'n tace, profêc e re, i ävrês vülfd ved kel ke edî oter, e i g'ä sperâd tat... ma a 'l so tep ñe i ä püdfid ed ñe i ä püdfid sent kel ke a oter fürtünâc a l'v'ê stac regalâd —.

Ü bel de, ü duturû de Bibja l'ä ülfid met a la proa 'l Gezû, e l'ê saltâd sô a diga isê:

— Sênt impö, maestro: g'ävrês de fa kozê po, me, per vîga 'sta “eta ke fenês pjô” komâ te prêdiket te, e mia 'nvece mör po fenida lê, o pego amô turnâ a kampâ kastigâd, me, e? —. E 'l Gezû a lü: — Dimel te a me g'ê skriid det kozê inde Bibja, te ke t'la læzet sô be asê, mia ira? —. E kel lâ: — A, sê. Dokâ: “Te ge ölerê be a 'l Siñûr ol to Dio Sant kon töt ol to kör, kon töt ol to fjat, kon tôte i to forse e kon töt ol to ko”. Po... “te ge ölerê be a 'l to fradêl, sômeansa del Siñûr, kompâñ ke te se ölet be a te medezem, sômeansa del Siñûr”. Êkola... me me par —.

E 'l Gezû a lü: — Êkola, brao, te! T'êt respondîd prope be. Fâ isê... e te g'ëvrêt la to bela eta per semper —.

Ol duturû, perô, mia kontêt, l'ä ülfid indâ 'n'nâc amô a met a la proa 'l Gezû: — Sê, a be... kesto ke i a diz zemô a la nostra santa lege; ma g'öi de teñ ki, po, per “ol me fradêl”, me, e, se prezempe n'n'ö mia, de fradei, me, e? —

E 'l'ura, 'l Gezû l'ê partîd kondöna storja (...mpo a stramba; se mai pjô normâl indela Samarea, indoke lâ i éra delbû mia tat sigûr i vjazadûr güdê).

— G'éra ün om, ke de Gerüzalêm a l'veñia zo a Gerek, e l'g'ê borlâd indi samfe a i brigânc. Ke i g'ä portâd ivjâ töt, a i ä pestâd sô per be, po i ä lasâd lâ sô la strada, mez mort. A l'pasa fo de lâ per kömbinaşjû ü pret, e i a ed ak, töt ispakâd sô, ma... l'istreersa fo la strada, e l'tira 'n'nante: a l'g'ä de 'nda a öfecâ a 'l Dom, lü, a l'pöl mia sporkâs sô i ma! Dapo, l'pasa fo a ü segrestâ: poa lü i a ed in ke stato, e poa lü i a skia e l'vulta i tak, istremîd asê... diolte k'i brigânc i sie amô le 'nturen. Dapo amô, l'pasa fo de lâ ü de kei antipatek forestêr samaretâ eretek e spelörs, ke l'éra 'n vjas per i afare so: a l'se sköt de dôs la pura ke ge toke poa lü la stesa leanda, l'ge ria lê 'n banda, e n'n'ä a

kompaŝjû: a l'ge laa zo i so feride kol vi e kol ôle, i a fasa sô, i a karga sô sô 'l so azen ...po i a porta lâ finâ a 'l prim post ke l'troa de fermâs a 'l sigûr. Insoma, l'fa prope de töt per vütâl. E 'l de dapo, ke l'g'ã prope de partî... a l'ge ulta lâ do bele palankine de pjö a l'ostër e l'ge diz isë: “Se po te spendet amô de pjö, mia pura: g'ö de pasâ de ke per turnâ 'ndre, e te pagerö me, te”. Buna. Dimel te a me adês: koël, de kei tri omeñ lë, él istâc ü fradêl, per kel poer dizgrasjâd lâ, e? Ki ke l'g'ã ülid be: i du brae ebrë, a? —
 — Ee: 'nde to storja... kel oter lâ, ke l'ge n'ã üd a kompaŝjû, me digerês; e poa l'ostër, se l'se fida —. — E brao amô öna ölta, te: prope kei, i ã oservâd ol komandamênt! Vâ poa te in paz, dokâ, e fâ isë poa te. Atênt be perô, ne: poa se 'l malkapitâd... pötöst ke amîz o izî... a l'ê magare forestër... e po eretek —. [...'Nda po a saî 'nkemanera îga isë 'nde mânega i samaretâ... dapo ke...: ma, tat a l'ê, ol Gezû l'éra fac sô isë.]

Ün oter de intât ke i ê 'n vjas i va det indÿ paizêt, e öna tal Marta i a capa det indê so ka. So sorela, la Maria, la se senta zo lâ denâc a 'l Gezû, e la sta lâ a skoltâl. La Marta invece l'ê tötâ capada de 'l servî, e dokâ la reklama kol predikadûr: — U, maestro: edî po mia, ke la me sorela la me pjenta ke spermë a servî? Dizîga isë, po, de fav unûr poa le, e dam öna ma, dokâ: ke g'ê ke a 'mpo de zet, me me par! —.

Ma 'l Gezû l'ge respönd: — Ma, kara a te la nosta Marta... Te ge set zemô ke te, a das de fa e a preokupâs de töt... infin'a de trop. Kuanke 'l necesare 'nvece l'ê isë pok! La Maria, le, l'ã sirkâd fo ü defã ke te te ge robereset ñe mai, ne? [Dâm a tra a me: éla mia pjö fûrba le de te? Dâi, ke t'ë bel e paregâd zo asë. Stâ ke a te 'mpo kon noter.] —

KO ÖNDES : PADER NOST — GONA

Oter. Ün oter de amô, l'ê lâ ritirâd a pregâ. E, kuando ke l'turna 'ndre, ü d'i so amîz a l'ge domanda de faga imparâ poa lur a pregâ, prezempe kompâñ ke poa 'l poer Batesta l'g'ïa fac imparâ lü a i so amîz, ekol. Ìhura ol Gezû l'ge diz isê:

— Oter, kuand ke ülf pregâ töc insema... mê tras fo d'i afare ü bel momênt, po parole mia tate; äda: püdü di sö isê kom'a fo me, prezempe, ke g'ê za det bel e töt. “O Pader nost in cel, fâ te semper e sul Sant ol to nom in töt ol mond. Árda de dam de per de 'l nost tok de pa... finakê ta ma derêt prest ol to per semper; po äda de perdunâm i nosc pekâc, ke isê poa noter a m'varda de perdunâs; e mêttem po mia trop a la proa... intât ke l've sã 'l tep de reñâ te ke 'n tera kom'a sö 'n cel”—.

E dapo... l'ê 'ndac inâc a diga sö isê: — Ki él de oter ke, se ün amîz a l've lë de noc a div “te, amîz: imprêstem tri pa... ke g'ê riâd insã ü amîz a l'impreesta e g'ö 'n ka negôt de daga”, e oter ge respondi “te rekomande! A pöde prope mia. G'ê bel e zo i stremasî koi scec a treêrs deante a l'ös isprangâd fo”... e lü lâ invece l've cama amô e po amô: ki él de oter, ke l'lea mia sö a daga 'sti benedêc pa: dige mia perkê si amîz, ma per fa po fenî fo la leanda? E isê ve dige me, êkola: domandi e oteñeri, sirki e troeri, pikî a la porta e ve sarâ dervîd fo. Ve dige me ke oñû ke l'sirka l'troa... e a ki ke pika a la porta ge sarâ dervîd fo. Adé po adoma a 'ntra de oter: kuaél ol pader, ke 'l so scet a l'ge sirka ü pes, e lü, brao scet o mia... l'ge n'darâ ü elenûz, e... o se l'ge sirka ün öv a l'ge [n']darâ ü [marüd de] skurpjû, a? E se 'nfin'a oter dokâ, ke sigev a katív be, si a semper bu de daga ergota de bu a i ost iscêc... kuate olte de pjö sarâl bu ol vost Pader indel cel... de daga kel ke de bu i ge sirkerâ i so, de brae scec, a? —.

Öna ölta 'l Gezû l'éra dre a kasâ vja ü demone ke l'ïa fac deentâ möt ün om. E kel om lâ, apena guarîd, a l's'é metîd dre a parlâ, e la zet l'ê ñak restada. Perô, ergü i dizia “a l'ê 'nde so mânega del kapo d'i djâoi: eko perkê l'pöl kasâ vja i so kolegi...” Po, dei oter invece, per faga det ü bel tranêl, i ge domandaa de faga ed ü señâl del cel, ü mi-

rakol zo del volt o sô de 'l terĉ. (Perkê... fa parlâ ü môt, i ê bu tōc, ne?)

Ol Gezû, ke l'éra bambo ñe 'mpo, ihura l'g'ă dic isĉ:

— Oñe reâm ke l'se frasjuna 'n du o tri altarî... a l'se rüina persokönt: e guere, e ka ke brüza e kroda zo. [Mia ira ke me n'sa ergöt akâ noter, del reâm del Gûda kol reâm del Ezdraël?] Ol so kapo d'i djâoi ke l'ge pasa 'l bastû a ün oter d'i so, e kesto ke l'desfa sô kel ke lü lâ l'fa... dürerâl tat, a fa 'l kapo? [Sarĉs dre me 'hura a deentâ 'l kapo d'i djâoi?] Po sentî a kesta ke. Se üli prope di ke me kase vja i djâoi kol so permês del djaol... kei d'i osc iscĉc k'i fa stes laür... kol permês de ki i l'lo fai, e? Stî atĉnc, ke ge tokerâ diolte prope a lur de güdikâv voter... se parlî a vânvêra o delbû. Ma, se 'nvece me kase vja djâoi kola so ma del Siñûr sô 'l me ko, kompân ke l'guidaa lü la so ma del Mozê deante a 'l re Faraû... alura, po: é l mia ke a per voter ol so reâm del Siñûr, e? A m'séi mia dre 'nsem a êdei... i mirâkoi ke sirkî? E dokâ, fi a oter kompân de l'om fort e bel armâd, ke l'fa la guardja a la so ka e isĉ tōc i so be i sta a 'l sigûr. Perkê, se m'sĉ mia tōc dekorde... a l'ria ke de sigûr ergû pjö fort e decîz de noter... e l'me lasa ke bjoc [oter ke fidüca 'ndi leber e 'ndi deosjû: e kel ke l'éra nost unûr e (v)ant, a l'deenta so de tōc, fo ke nost de noter.] A püdi ês kon me... o kontra de me: ve sta a oter. Ma, ki ke se 'nkred de regoi a me dan... i so ma i ê büze e 'l so bursî pje de ent. Po stim atĉnc poa oter ke v'ö mandâd vjâ guarĉc, perkê... ü diaol ke l'ê stac kasâd ivjâ d'ün om... a l'donda de sâ e de lâ per pugâs in vergilög: e se l'troa mia ü post pjö bel, a l'fa ol djaol a kuater per riaga a turnâ lâ amô 'ndela so ka de prima. E se i a troa lâ bela neta e urdenada... a 'l cama 'lâ ü set o ot dela so risma, pjö purkû de lü, e tōc insem a sfonda zo l'ös, e i turna a faga det gurgina; ke isĉ 'l poerĉt, se l'ê mia stac atĉnt asĉ, l'istâ a pez de prima! Sarala mia öna generasjû katia e malfideta, kesta ke!/? A i ge da a pretĉnd ü señâl mirakulûz. Perkê kel k'i ed... l'ê paĉa frösta! A l've sarâ dac sigûr, ü señâl, sĉ: kel del Gona: se regordîv? E isĉ... kompân ke 'l Gona l'ê stac ol señâl per kei lâ de Niniv a 'l so tep, isĉ amô ü scet de om a l'sarâ 'l señâl per i omeñ del de de 'nkö k'i ölerâ derv fo i so ög. Sedenô, la regina del Meridjû la leerâ sô 'mpe, a 'l de del gödese, per kon-

danâ kela generasjû ke. Le, ke l'éra eñida 'nsö d'i pjö luntane regû del mond, per iskoltâ la so gran sapjensa del Salumû: epör, in mez a oter a ge n'ê eñîd fo ü a pjö grand del Salumû! E poa i omeñ de Niniv i salterâ sö, a 'l de del gödese, per kondanâ kela generasjû ke! Lur defati i s'ê po konvertîc, a la so predikasjû del Gona. E i ge digerâ isë a kela bröta rasa ke “e së, ke oter a g'ï üd lë oter ke 'l vost brao Gona, per konvertîs!” — [...Ke i pjö atênc e 'nteresâc i g'âbe pensâd amô a 'l poer Batesta?]

A l'ria lâ ergû a riferiga 'l fâto de kei Gâlelë lâ, ke 'l Pelât l'ia fac masâ prope 'ntat ke i ofria i so sakrefese. E lü l'diz isë, ekol:

— Se 'nkrederî mia diolte ke a kei poerêc lâ g'ă tokâd fa kela fi lâ perkê i éra pjö pok de bu de töc i oter Gâlelë, ne! Ve l'dige me... ke l'ê ñe 'mpo isë. Koperâl ergû prope lü, 'l Siñûr, prope de det indela so ka de lü? Però ve dige a kesto ke, me, pensiga sö be: konvertîs mia, oter... e adi po oter, ke fi se guadeñerî! E, poa kei deaðôt poer dizgrasjâc lâ... ke g'ê treekâd adôs ke l'ê mia tat töta la tor de Sêloe: töta zet normâl, kompâñ de noter, pasada fo lâ sota a 'l momênt izbalâd, ke la g'éra de borlâ zo! Pötöst, ve dige me ke ke, se m'kambjerâ mia ela 'n tep... pensiga sö be, me borlerâl adôs kozê a töc noter ke, a 'l so tep göst! —. Po, oter.

Intramêz a töta la zet ke l'g'ia aturen a l'salta sö öna uz de fomna, e skuaze la kanta:

— Beada kela ke la t'ă portâd, te... e ke la t'ă dac ü lac del cel, a te! —.

Ma 'l Gezû söbet, indel gran sito ke l'se faa: — Së, prope. Po... ve l'dige me, ki ke l'ê beåd delbû: fürtünâd e kontët lü ki ke skolta ol Siñûr Sant, e l'met in prâtika i so parole töta öna eta. Mia kompâñ de kei k'i 'mpia sö öna löm... po i a met sota ü sedêl, o i l'a skond in vergilög; ma sê kompâñ de ki ke i a met sö sö 'l lampadare, ke isë la ge fage car a töc kei ke e de det in ka. E... la to löm de te, a l'ê 'l to ög: se ol to ög a l'ê net, se l'ê bu... ałura te se net a te, te ge edet be, e te set car indel kör. Ma se 'l to ög a l'ê trobe, se l'seña malâd... ałura... te set malâd poa te, te set mia car, te feneset a 'l fosk. Áda be, dokâ, ke la to löm la see 'mpiada e la fage car: sedenô te ste a 'l fosk. E 'l fosk koma 'l fôm a l'va mia be, 'ndi ög ñe 'ndel kör. Te stâ a 'l car, e töt a l'te sarâ car —.

E dapo ke l'ŷa fenîd de kôntâ sô kei ezempe ke, ü tal farežë i ä 'nvidâd lâ a majâ in ka soa. E 'l Gezû l'ê 'ndac lâ, po l's'ê metîd a tâola. Ol padrû de ka a la fi del past a l'g'ã fac kapî ke l'se merveaa ü falî ke lü, ü maestro isë brao... a l'se laês mia zo prima e dapo de majâ, segönd ol ritüâl; e 'l Gezû l'g'ã dic isë, jura:

— A, be, va be. Perô, za ke m'ge s'ê... Oter farežë... se preoküpî a trop de netâ zo ol tond e 'l bicër de fo... ma de det, indel vost, de bicër e de tond, a ge ardî po mia tat de fi... lë 'ndi mai a tra zo i kröste. A... poer löz a oter! Äl mia diolte kreâd semper o' stes Dio Sant, ol de fo e po 'l de det del om? Lai zo i ma dokâ, e 'l tond, e poa i dec: ma g'ê a ergöt d'oter pjö importânt de laê zo, se prope g'î la pasjû de netâ: lai zo la lengua, i parole e i pensër del kör. Po, kel ke g'ê det, indi osc tonc e bicër de sjor... dîn vja ü tantî a kei ke g'ã fam e sit: e jura së, êkola, ke la osta part la sarâ neta, per voter. Sedenô, guai a oter farežë, ke pagî la tasa a 'l Dom sô l'osmanî e sô la salvja e sön töce i erbe... po ma lasî 'ndre i laür pjö gösc e nesasare: l'amûr e la gôstesja. Kei granc laür ke, mê fa prima, e dapo i valerâ ergota a kei laurâi lë! Po amô guai a oter, eko... ke ve pjâz isë tat i prim posc indo' g'ê de sentâs zo be... e tace kômplimênc fo per i pjase, a! Guai, perkê... si kompân d'i tombe, ke poa kele mê zbjankale a kalsina e respetale... ma tra vja drec a la svelta, tapâ 'l naz e... tokâ fer! —

Ü duturû, a sto pont, a l'ge fa: — Ma, maestro: isë... te me ofendet akâ noter, ke m'te de kônt la lege e m'la fa oservâ. Te parel mia de ezagerâ 'mpo, ne, te? —

E 'nvece 'l Gezû l'ê 'ndac det amô senza guanc:

— Ee? A së, e! Alura, guai akâ oter duturû, êkola, ke ge kargî adôs a i poerôm ü ros de piz de tra dre... perô oter [i] müf ñe [kond]ü did. Guai a oter, prope, ke ge fi sô öna bela tomba a i profëc ke i osc pader a i ä kopâd. E isë, a fi gösto per koi vosc brae pader, eko: lur a kopâ, e oter a sotrà 'n pompa. Po, l'ê ñemô mia fenida! G'él mia skriîd det inde Sapiensa “me ge manderö lâ dei profëc e dei apôstoi... e lur i farâ oter ke bastunai sô e kopai zo”? Prope, êkola: a zet isë, ge eñerâ ezebîd ol kônt del sang de töc i profëc... de 'l prenepe del mond, fin'a jer: de 'l poer Abël, a 'l Zakarea poer marter,

k'i so zgeri del re kanker ol Goas a i ă fac fo aderetūra 'ntre altâr e tabernakol; po, i ê dre amô a laâ sô 'l paimênt per ol nost poer batezadûr... ke 'l Siñûr a l'ge dage 'l so premjo. Prope, ve l'dige amô ôna ôlta: a zet isě ge sarâ mandâd ol kônt. Po, guai amô a oter iskriâ... ke g'iv indi oste ma geluze la cav del saî, e ñe î dervîd fo la porta per voter, ñe la dervî fo per kei ke ôlerês siñâ det e 'nda de det! —

Ge ôl mia tat a kapî 'nkemanera, de kuand ke l'ă fac kei diskörs ke 'n kela ka lâ de ü de lur... farezê duturû skriâ tîc insema i s'ê metîc dre a ardağa pjö mal amô... e a tratâl kon tata rabja de pjö, e a fal parlâ de töt sura laûr d'ône sort, isě de metel in trâpola a kuak manere, e capâl in kasteña ... E oter.

KO DUDES : PROIDENSA — SPETÂ

Ôna olta, amô sura kel fato lě... in mez a donzene de persune muntunade sô lâ aturen a lur, ol Gezû l'g'ă dic car e net a i so amîz: — Prim laûr... oter ardis be de 'l leât d'i farezê, de 'l so arsâ semper sô la gresta koi oter, ke l'ê sul ke ipokrezea. Ma, mal per lur, ve dige me ke negôt de kamöfâd a l'resterâ semper in mâskera, e negôt de skundîd a l'resterâ segrêt. Töt kel k'i ävrâ dic in gran segrêt o de noc... a l'sarâ skoltâd de tîc a mezdê fo 'n pjasa, e töt kel ke i se sarâ bezbeâd indi orege det in ka a l'sarâ uzâd sô fo sô i terâs. E, cêrtoza, a l'val poa per voter. E a oter, a i me amîz, me ve dige amô isě: îiga mia pura de kei k'i pöl a kopâ zo i osc kuar'os... ma ñe negôt de pjö. Ve l'dige me, de ki mê îga pura delbû: de ki ke, senza magare sotrâv lü, l'pöl perô treekâv zo ânema e korp indela (v)al de l'inferen... oter ke aleta dela römata! Teñi be a met, oter: se êndele mia per du solc infina a sik pâsere? Po, g'ê a ki ke lasa mia mör de fam ñe lure, ne?! E ve dige isě me... ñe ü sul de kei paserî lě l'ê dezmentegâd de 'l Dio Grand, ekol. Isě, infin'a i kiei del vost ko, sô 'n cel a se n'teñ ol kônt [prope: in cel a s'te 'l kônt d'i kaei manmâ ke oter i perdi! E dokâ... îiga mia pura, oter: alerî a ü bel tok de pjö de tace paserî, me dige... tata o poka pjöma k'i se tire dre! —

Û tal, intramêz a la zet, a l'ge diz isě: — Maestro: diga isě te a 'l me fradêl ke, de spar-ti sô kon me i be del nost poer pader... adês ke l'ê mort —. E 'l Gezû l'ge respönd isě:

— Oě, amîz: te sömeel ke fo 'l noděr o 'l pretûr o 'l sensâl, me, a? —. E po, a töc:

— Teñi deluntâ be la oja de ĩga trop e töt, oter! Ke, poa se ü l'ê sĵor asě... la so eta... la dipênd mia de kel ke l'g'ă. Senti impö ke prezempe. Ün om, i so terě i g'ïa frötâd öna buna anada, e l'ragunaa isě persokönt: “A g'ö pjö ñe 'ndo met det la roba, foroi komê, po, me? Va be: böterö zo i magaî eg k'i ê strec e pje pjenênc, apena ke n'n'ovrö fac fa sô de pjö granc, ke isě ge starâ det töt ol formêt e po 'l fe e poa töt ol rest. E dapo, me se digerö: mêtes læ köët e beäd, te, ke t'ët fac sô i to bele skorte per kuak añ... e pósa, mäjâ, biv e diertes”. E l'ïă mia dic, perô i a pensaa: “i oter... a, be: me toka mia a me de pensaga!”. Ma 'l Padrû de sura l'éra d'ün oter avîz, e per kela noc læ l'g'ïa fisâd la so skadensa [e l'g'ă mandâd la so bela kartolina precêt]. E dokâ... mort lü, ke l'éra la so ura... 'nda a saî ge sarâl indâc a ki töt kel bendedio trac insêm: senza ñe benedîn ol Padrû de sura ke da fö töt... e 'l padrû eg sotatera, po, men amô; ke l'sarâ mort dispe-râd, se l'g'ăvrâ üd ol tep de rinkorses ke l'möria. Prope isě, êkola, ge söcêd kompâñ de lü a ki ke fa sô e tra 'nsem tata roba adoma per lü, e... a riaga læ denâc a 'l Dio Sant Si-ñûr... a l'g'ă alistês negöt de tö dre —.

E dapo l'ê 'ndac inâc isě, koi so amîz: — E 'lura, me ve dige isě: preoküpîs miga trop ...kozê g'ïvrî 'mbizôñ de majâ per kampâ e ñe de kaâ sô per kuarcâs zo. La al de pjö la eta de 'l majâ, e 'l korp de 'l vestît! E... g'ï mia forsâk üd in regâl e eta e korp: o ergü s'i ê dac lü, kol so defâ!/? Po, ardi i krov: ñe i somna ñe i regoi, i g'ă ñe magaî ñe skorte preentiade, e nigü de oter ge pensî oter, a kei bröc ozelâs læ: epör... ol Padrû de sura i a mantě. Alerî po ü tok de pjö d'i ozei, oter per lü, sě o no!/? E d'altronde, 'ntra de oter... per tat ke l'brige, él bu ki de zuntaga læ öñ'ura sula a la so eta, o ü gel a la so stadüra, e... mia a i so tak!/? E se, dokâ, si bu de fa ñe kel falinî ke... se 'nkrederî mia diolte delbû ke töt ol rest a l'depende adoma de oter, a!/? Ardiga mo i ĵili fo 'ndel gardî: ñe i zgoba, ñe i fa i sertûr. E me ve dige ke ñe 'l re Salumû, kon töt ol so or e

töce i so serture... a l'g'ă mai vüd sô ü estîf e ü pröfôm isě bel! Se 'l Dio G'rand Siñûr, dokâ, a l'ge da dei estîc isě bei a i so fjur del kap... ke 'nkö i g'ê e domâ i ê ranzâc sô o sekâc fo... a rigûr, a l've darâ 'l vost brao estidî akâ a oter, o no... zet de poka fidüca! E 'lura, stîm po mia lě semper in ampja 'ndel sirkâ kozê maerî o kozê bierî! De töc kei laûr lě i se preöküpa zemô a trop i oter... k'i koñôs mia 'l nost brao Dio Siñûr. Oter in-vece ga l'si, ke g'ïv in lü ü Pader, ke l'sa be semper lü g'ïv imbizôn de kozê. Oter sirkî dokâ ol reñ del Dio Pader: e töt ol rest a l've eñerâ dac per zonta. Îiga mai pura, oter, i me bei besotî: ke a 'l nost Pader g'ê pjazîd de dav a oter ol so reñ. Isě, oter, endi fo töt kel ke g'ï... e dil vjâ in lemôzina. Po fis sô dei bursî [büsine] k'i se könsöme mai, tiris insêm ü tesör sigûr indel cel, indokê ñe lader roba ñe teña o rözen könsöma. E... indokê ge sarâ 'l vost tesör, lâ ge 'ndarâ dre a 'l vost kör. E amô ü laûr, za ke m'ge s'ê. Stî ke semper pronc, kola sentüra ke te sô 'l vestîf de tera, e kola löm impiada per vêdega be, e de tö dre. G'ï de ês kompâñ de kei servidûr k'i speta ol so padrû kuand ke l'ria 'ndre dela festa de spuze, per vês lě pronc a dêrvega fo apena ke l'ria e l'pika. ...Aa sě! Beâc kei servidûr, ke 'l so padrû kuand ke l'ria i a troa amô desc. Ve l'dige me: l'se meterâ sô lü la bigaröla, i a farâ sentâ zo a tâola, e l'se meterâ dre lü a servii lur. Sě, prope: beâc kei servidûr lě, se 'l so padrû l'ria akâ 'ndelmêz a la noc e i a troa lâ amô bei desc. Perkê la 'ndarâ a fenî prope isě: ol padrû l'rierâ, ardampö, kompâñ d'ü lader, senza izâ, kompâñ se l'g'ês de skasinâ fo la ka, e 'nvece l'völ adoma ed se i so servidûr i dorma piger. Isě, prope, teñîs semper pronc poa oter, perkê... scet de om ke ge toka... a l'rierâ a sirkâv kuando ke oter men l'ispeterî —.

[Ke l'völês dil zemô a per “dapo”... ke l'sarês turnâd... dapo la so kruz?]

A sto pont ol Pjero l'ge fa: — Éla adoma per kei ke komanda e i g'ă de teñ de könt la nasjû, 'sta parâbola ke... o l'ê poa per noter amîz de te, e? —.

Ma 'l Gezû l'tra drec isě: — Ki él, dokâ, ol servidûr feděl e sapjênt, e? Ol so padrû, ve dige, i a meterâ a kapo de töc i so servidûr, ke a 'l so tep a l'ge dage a oññ la so bela rasjû de majâ. Beâd kel servidûr lâ ke 'l padrû a riâ a i a troerâ dre a fa 'l so mestër: ve

dige me... ke l'ge darâ 'ndi ma a lü töta la facenda de töc i so trafeg e könc. Metém, adês, per di, ke kel servidûr læ... ön'otra olta a l'sa pense 'ntra de lü "tat, ol padrû... per impö amô l'ria mia!" e l'se mete dre a maltratâ kei oter servi e serve, a majâ e biv lü e 'ncoketâs sö... Ol so padrû l'rierâ prope 'ndel momênt ke lü i a speta mia, indön'ura fo del normâl, kel de e kel'ura ke meno i a speta: e i a kastigerâ ñak a la granda, e i a me-terâ lâ a la kadena koi servidûr bastârc! Sě, prope: ol servidûr ke l'sa kel ke 'l padrû l'völ de lü, ma po i a fa mia kon sveltezja, a l'sarâ oter ke kastigâd; kel servidûr invece ke l'se porterâ 'n manera de zbalâ, ma sensa saî de precîz kel ke 'l padrû l'völ... kel ma-gare l'sarês kastigâd de meno de kel oter. Isě ke... ki ke ã riseîd pjö tat a l'renderâ könt de pjö tat, perkê pjö tat ü l'ã riseîd, tat de pjö l'ge sarâ sirkâd indrě —.

Po l'dizia amô a isě: — Adě ke me so eñîd a portâ zo ü fög, ke sö la tera: ü fög... ke l'me pjazerês ke l'sarês zemô impiâd sö e bel viv. Per kel... g'ovrö de ês batezâd poa me 'ndel fög, e strempje ak, a sto mal indi pañ, a pensaga sö be. Ma me krederî mia ke, ne, oter... per portaga a töc adoma de 'l botěp, e, djolte! Prope no, ve l'sigüre me. La 'nda-râ a fenî ke porterö deskösjû, separasjû, divizjû. De öna famea de sik persune, do d'ö-na banda e tre de kel'otra, tre de sã e do de lâ. Anse: pader kontra scet e scet kontra pader, mader kontra sceta e sceta kontra mader... spuza kontra madona e madona kontra spuza: isě la söcederâ —. E po, l'köntaa sö amô:

— Si mia semper dre a preedî 'l tep... oter, e? Kuand ke edî ü neol ke e sö de po-nênt, oter dizî söbet, ne, "dekě mia tat a l'pjöv!"... e isě l'söcěd. E kuand ke po 'l vent a l'sofja de 'l meridjû... dizî isě "l'g'ã de eñ ol kold!"... mia ira? E jura, o zet dopja! Si bu de preedî ke tep a l'farâ, adoma a ardâ 'n(n')arja, in figüra del tep ke l'ã zemô fac tate olte: e kom'êla po ke si mia bu de di ke tep a l'fa, ke tep a l'ê de fa kozê, adês? Ke-manera, dokâ, decidî mia a la stesa manera... kel ke l'ê göst de fa ke adês? —. E oter.

KO TREDES : FIG' — LEÁT — PORTA STRECA
--

Po l'ã köntâd sô a kela parâbola ke. — Ün om... a l'g'ïa ü fig, pjentâd zo 'ndel so terë a it. Ma, indâc lâ per tō zo i so fig, a n'n'ã mia troâd. Ifura l'g'ã dic isë a 'l so laorët “a l'ê kel d'i tri añ, ke eñe ke per katâ zo kuak fjure de kela pjanta ke... ma n'ne troe ñe mai. Tèemel fo, dokâ, òna olta buna. G'äl de portâm vja a fa la tera... per ol pernegöt?”. Ma 'l so laorët a l'g'ã dic isë “lasél zo amô per ün an, sjûr padrû. Oi sapaga be aturen e daga 'l rüt. Pöl das... lankjê l'böterâ fo i so brae fig. Sedenô, dapo... teémel po fo, cêtoza!”.

Êkola: me v'l'õ dic amô òna olta, a: l'an ke e... l've adês —.

Òna olta... l'éra sabat, e l'éra dre a predikâ in sala dutrina. A g'éra lâ a òna dona, ke de dezdôt añ ü bröt isperet katív a i a teñia 'nfirma: l'éra tat inkürvada innâc, ke g'éra mia manera de fala sta sô 'mpe dreca. Ol Gezû i ã esta, i ã camada lë, e senza ke la der-vês ñe boka le (la g'ïa ñemô mia idea ki ke l'éra, lü lâ ke i a camaa) a l'g'ã stendîd sura i so ma e l'g'ã dic isë: — Fomna: per la so glorja del Siñûr, te set guarida de la to maladia! —. E le l'ê leada sô dreca, e la ge kantaa tate bele lode a 'l Dio Siñûr.

Ma 'l kapo dela dutrina lâ, ñek asë kê 'l Gezû l'ïa guarida prope a 'l sabat (e certo l'éra a tata 'nvidja!) a l'g'ã uzâd sô a la zet: — A g'ï ses de... ses, per laorâ! Fil po laorâ per guarîv in kei ses de lë, dokâ, e mia a 'l sabat! —.

Semper la stesa sunada: la festa de santefikâ a fas ved a fa negota, fo ke a pregâ.

Ma 'l Gezû invece l'g'ã dic isë, lâ denâc a töc: — Á lâ, dokâ... face de tola! A deslegî mia fo töc ol vost azen e 'l vost bö per portai de fo a biv, a 'l sabat, e? E kela sceta ke del Abrâm ligada sô de 'l djaol per dezdôt añ, la g'ïa mia de ês dezligada fo inkö... per-kê l'ê festa? Sarâl mia pjô festa amô per töc, adês, êkola? O magare...él adoma 'l vost azen o 'l vost iscêta a meritâ ergöt, a 'l sabat? —

E 'ntat ke lü l'ga dizia sô bel car kei laür ke, k'i faa kolp sura la zet... töc i so aersare i éra ñak morei de ergoña, e po de nervûz! La zet invece l'éra tōta konteta, po i a daa a ed ...per töc i laür fo del normâl ke lü l'faa per lur a gratis.

Oter. E lü l'köntaa sö a kesta ke: — Gê sömeerâl a kozê, dokâ, ol reñ del me Dio? Ve l'paragunerö a kozê, po? A l'ge sömea, ekol, a ü de kei gre ke de somesa tat pisêñ... ke ün om i a tö sö e i a sotra zo 'ndel so ortizêl. Kel gre ke l'kres, po l'deenta a ü arböst ke l've zo a i ozeli a pugâs sö sö i so rameli... oter ke tate d'otre pjantele del ort koi so somese a pjö bele grose. A kozê ve l'paraguneroi amô... ol me reñ del Dio? Buna. A l'ê kompân d'ü kügâ de leât ke öna fomna l'ã töld fo e i ã impastâd det kon tri sködelôc de farina. E l' falî de leât... l'ã fermentâd töta la pasta. Êkola: a l' so reñ del Siñûr ge okör gösto somesa e leât: e püdf ês voter, insêm a me —.

E l'ge daa a predikâ, a treêrs a paîz e sitâ, e 'ntat a l'se portaa 'là vers a Gerüzalêm.

Per la strada, ü de, ü tal a l'g'ã domandâd: — Maestro: éi tace... o pok, kei k'i se salvarê... kei k'i 'mbrokerâ la porta del reñ? — A l'g'ã respondîd isê:

— Aa: te, te 'nteressa kuace. A s'diz, me me par, e: “ki skamperâ ederâ”; e dokâ ki ge 'ndarâ det, a l'könterâ, po. Ve dige me perô, ke nisû l'indarâ de det a gratis... e l'ê ñe porta per karose, ñe portantine ñe procesjû, ñe per skarsele o borsî o bursû sguf! Oter, isfursis de pasâ det per la purtina streca isê kom'a l'ê, perkê, ve sigüre me: tace i proerâ apena apena a pasaga det, ma i ge rierâ mia tat kon fresa, e i digerâ “oter, ederö po ön'otra olta stankjê!”. Ma, dapo ke l' padrû de ka l'sarâ leâd sö lü a serâ fo l'ös... in tace sa meterî dre a pikâ, lâ de fo, e a diga “dêrvem po fo, a te, Siñûr... ke staolta pase det a me!”. E lü l've responderâ “a ve koñose ñak, me: de ke banda eñî, po, oter, a?”. E oter a lü “ma... se m'ã majâd e biîd denâc a te, e te te set pasâd de ke tate olte in mez a noter!”. E a fala kôrta, ekol, lü l've digerâ “me l'so prope mia de ke banda si, oter. Sti luntâ de me, dokâ... ke g'ï a la cera de kei ke i ã mia fac be komê k'i g'ïa de fa”. Ve l'dige me ke... lâ de fo, oter löcerî asê “a, poerêc a noter... a m'se salva prope pjö, staolta!”, e pateserî ñak asê, a ed de det ol Abrâm ol Izâk e l' Gakôb, e töc i brae profêc, det indel reñ del Dio Sant, e oter de fo! Po leâi sö be oter, a: “a n'ne eñerâ det de ponênt e de orjênt, de l' setentjû e de l' meridjû”: e i ederî töc sentâc zo a banketâ, det indel reñ, ävrai fac komê, kisâ po... e oter de fo! E prope isê, êkola... g'ê ke de kei ke

'nkö ke i ê i öltem e i teac fo, e lâ de det i sarâ i prim; e invece... tace ke ke 'nkö i ê i prim, kei ke kônta... 'hura lâ i sarâ i öltem, i sarâ lur i teac fo de 'l reñ. Tace, camac per prim... i perderâ a 'l post —

Öna ölta, i ge e læ izî dei farezê mia ñemô 'nvidjûz de lü (o senô magare 'nviac insâ de 'l re a faga 'mpo pura e fal iskapâ vja...) k'i ge diz isê: — Skâpa vja de ke, te, pârta a la svelta, ke ol Erôd a l'völ fat tö fo — E lü l'ge respönd isê, a lur:

— Grâsje! Ke pura! Oter, perô, dizîga isê... a kel gulpî lâ, de ïga mia fresa (*ke g'ö mia fresa, me*). A g'ö amô du de, me, de skuâ vja djâoi e guarî e fa del be: e a kel d'i tri rie-rô 'ndokê g'ö de riâ. Ma i ê amô tri de de strada, per me, se oi riâ lâ a Gerüzalêm specializada in kopaprofêc. Aa... te, Gerüzalêm, Gerüzalêm, üzada a masâ i profêc e lapidâ i mesagër k'i te e mandac ke de 'l cel... Ol padrû del polêr uramai a l'diz isê: “kuate olte, finadês, ò ülfid tra 'nsêm i to, kompân de tace pülzî sota i me ale!” Ma oter ï mai ülfid, eko. Oter! Pego per voter, ve l'dige me: ol polêr a l'sarâ desfâd sô. E me, me me ederî ñe pjö, finakê g'ïvrî pjö ñe uz per vuzâ sô “benedêt kel ke ria ke a so nom del Siñûr! Siñûr, vé ke amô te de noter... a salvâm!”

KO KUATORDEZ : BANKÊC— PREENTÏV

Ü de... l'éra dre per indâ det indela so ka d'ü d'i kapi d'i farezê per majâ ü bukû... e i a teñia de ög. Prope lâ denac a lü, g'él mia lâ ü, malâd de ritensjû? Ol Gezû, 'hura, l'g'â fac a i farezê e a i duturû ke g'éra lâ:

— Él lecet o mia... fa guarî ergû a 'l sabat, e, oter? Perô, i ge respondia negû. E lü l'â capâd sald per i ma 'l malâd, a i â guarîd, po i â salüdâd. Po l'g'â domandâd amô a kei oter lâ: — Ki ke de oter, a... se l'ge borla det indel pos o' scet o l'azen, i a tra mia fo a be ke l'ê sabat, e? — Ma ñe staolta i g'â respöndid ñe sê ñe no, po ñe negû i lodaa 'l Sinûr kompân de 'nvece tate otre ölte a olta us.

Dapo, a ed ke tace i sirkaa fo i posc pjö bei a tâola, l'g'ă köntâd sô sta storja ke:

— Kuando ke te se 'nvidâd a spuze de ergü, te... bôtes mia sôbet sô 'l prim post liber in sima: diolte ke ge see 'n gir sensa post ü invidâd pjö importânt de te: e jura ge tokerâ a ki ke t'ă 'nvidâd de dit de lasaga te 'l post a lü lâ: e a te, ke ergoña, te tokerâ kalâ zo zo infina a i ôltem posc vöc. Invece, te mètes a l'ôltem post: e 'l to amîz ke l't'ă 'nvidâd a l'te digerâ a de tras insö pjö izî, indü post pjö bel. E te te serë unurâd de töc. Regordis, dokâ: kel ke l'se arsa sô persokönt a l'veñerâ zbasâd zo a so skorno; e kel ke sta zo a 'l bas... a l'veñerâ camâd sô a 'l volt —.

E dapo l'g'ă dic amô, a kel lâ ke l'Ïa 'nvidâd: — E te, kuand ke te fet ü diznâ o ôna sena per tace, invida mia adoma fradei e parëc e amîz e sjourâs... kei ke a so törno i te 'nviderâ poa te, e isë la partida l'ê 'mpatada. Te pötöst, kuand ke te det ü bankêt invida poa poerêc e sop e orbi e gob: e 'lura sê beâd te, ke kei lë... g'ê mia mezo k'i te repa-ge, e isë te serët repagâd asë kola to bela eta per semper, a 'l gödese del Re Dio Grand ol so protetûr d'i poerêc —. ...Ke l'indaa be a per kel lâ del past in ka soa: de spetâs po mia la so braa paga 'n gurnada.

Ü d'i 'nvidâc l'ê saltâd fo a di sô, bel fort: — Beâd lü, prope... kel ke l'sarâ 'nvidâd a kel bankêt lë del reñ ke te diget te, eko —. E 'l Gezû l's'ê 'nviâd lâ amô:

— Ün om... l'ă dac ü gran bankêt, e l'ă 'nvidâd ü muntû de zet. A 'l so urare del diznâ, l'ă mandâd fo ü servidûr a diga isë a i so 'nvidâc “eñî sä... ke g'ê töt bel paregâd”. Ma, âda po te, ü dapo l'oter a i ä tirâd fo töc ü muntû de sküze: “e me... ö töld ü kap, ke prope adês i me speta lâ a edel: isküzem, vâ”; e “me... ö töld sik per de bö e so dre a 'nda lâ a proai... pota, sküzem, a te”; e “me ö gösto töld moër, e per istaolta la me lasa prope mia eñ, êkola... te me sküzerët”. Turnâd indrë de 'l so padrû, ol servidûr a l'g'ă riferid per fil e per señ. E 'lura 'l padrû de ka, deentâd ñak ñek... a l'g'ă dic isë a 'l so servidûr: “Kór a la zvelta fo per i vja e i pjase del paîz e pórtem ke poerêc, gob e orbi e sop”. E dapo ke 'l servidûr a l'ă fac kompâñ ke l'g'ă komandâd ol so padrû, a l'g'ă dic isë ke g'éra post amô. E 'l padrû: “Buna: te à fo per i sentër e dre a i seze d'i kap,

po trâmen ke skuaze a kola forsa... ke me oi la me bela tâola pjena de zet". A la finfî... ve l'dige me: negũ d'i prim invidâc i g'ăvrâ grasja de god de kel bankêt ke ô dic... ñe diznâ ñe sena —. Po, oter.

A l'g'ya semper dre despertôt û muntû de zet, uramai.

Ôna olta, a l'ge diz isê a kei ke l'g'ya dre kel de lê:

— Adé, oter. Se û l'me e dre a me û de o du, e ün oter de l'g'ă de pensaga a mantêñ so pader, e l' de dapo a kûrâ so mader, e ôna ôlta a spuzâ i scec, ôn'otra a daga ôna ma indei afare a fradei e sorele... po l'g'ă semper pura de fa mia kontêt vergũ... aa: û isê... a l'põl prope mia eñem dre delbû. Eñem dre a me per la nôa dol [*d'ól = de 'l'*] reñ ke g'ô de portâ fo me... l'ê zemô asê ol defâ ke ga do me, dre a me... e ge anserâ ñe mai l' tep per fa d'oter! Po [kel ke ôl tra 'mpe ôna tor... se senterâl mia prima zo a fa sô du kõnc, se l'g'ă palanke asê de riâ 'n sima? Mia ke l'söcede de bôtâ zo i so brae fondamênc... po de restâ a l'verd. E la zet, k'i ê mia orbi, i ge griñerês dre asê “a l's'ê metîd idrê a fa sô... e âda po te l'ă ñe fenîd de komensâ”! O sedenô... kua' él ol re ke l'va 'n guera kontra ün oter re... sensa kalkulâ prima be se lû koi so dezmeta soldâc a l'põl têtnega ko a kel lâ ke ria koi so intemela, de soldâc? Se po l'ved ke l'ê ñe pusibel (posibol), êkola... intât ke kei lâ i ê amô deluntâ, l'ge manda 'là dei mesagër, per domandaga i so kondisjû per la paz...o no? E isê, dokâ, firî a oter...] Ki ke fa kõnt sura ergôt d'oter d'i so impêñ kon me... ki ke te a kõr tace doër e afare e pjasêr d'oter... lû lê, l'ê prope mia fac per istâ [l'n gir] kon me... l'ă prope mia fac sô be i so kõnc —.

Ol so fort a i éra semper i paragû, i so parâbole.

— A l'ê presjuza, la sal. Ma se, 'mbrombeta de skorje, la sa pjô de negota ñe le... m'ge darai komê saür... de savrî l'majâ? A l'ê pjô buna per negôt d'oter, ñe per ol rüt: l'ê adoma römata. E ki ke g'ă orege... l'ge sente ak —.

KO KÛINDEZ : PEGRA PERDIDA —
SCEC LAATÏV E RAÑÎ DE PADER ISJÔR

Kei ke sködia i tase, e i pok de bu, e i bu a negöt... i ge staa aturen, per sent ergota de bel poa per lur. E dokâ i farezê e i duturû i barbotaa, e i se diaia: — Adé lë... ke l'tira i pok de bu kompâñ de la... mel i muskû —; e lü l'ge daa bota isê:

— Ki de oter, ke l'g'ã sento besôc, a... se n'ne perd ü, a l'ge lasa mia lã a i so ka e a i so scec kei oter noantanövv... per turnâ fo 'ndel dezêrt ke l'ïa streersâd fo, a sirkâ kel ke l's'ê perdîd, bel gras o mager, finakê i a troa amô, e? E kuand ke i ã troâd, a l'se l'kargerâ mia sô 'n gropa per turnâ a ka... e camerâl mia lã lã i so amîz e izî per fa festa 'nsem kon lü, perkê “ô troâd amô la me pôera besca ke la s'éra perdîda, e isê g'i ô po ke amô tôte”: él mia ü gran bel laûr, de fa festa, e? ÉL mia ira ke fi prope töc isê, e? Poa oter ke se perdî ñe mai, oter, ne... ve pjâzela? E isê, êkola, ve l'dige me: ge sarâ pjö tata festa 'n cel... per ü pok de bu troâd amô e guarîd... koñê per nonantanövv k'i pastüra lë a pansa pjena e i se 'nkred a l' sigûr, lur. O amô: koéla kela braa fomna ke la g'ã vja dez foi de [*sento*]mela... la se rinkörz ke g'ne manka ü de sento [*de mela*], e la fa mia car in töc i kantû dela ka, e la skua mia fo de fi despertöt, finakê i a troa amô? E dapo ke i ã troâd, camerala mia lë i so amize e izine de ka, e ge digerala mia “sã ke tôte kon me a fa festa... ke ô troâd amô 'l me bel foi presjûz, ke l'ïe perdîd”... e? Fale mia prope isê a tôte i oste brae fomne,ne? E prope isê êkola, ve l'dige me... ol Siñûr e i so ângei 'n cel i fa festû per oñe pok de bu troâd e konvertîd sô la strada gösta —.

Po l'köntaa sô amô: — Ün om, a l'g'ïa sul ke du scec. Ü de... 'l pjö zuen a l'ge diz isê a 'l so pader: “Pader, ðim ke söbet a me la me part ke la me toka!”. E 'l so pader (faresev kozê, oter, e?) a l'fa sô la spartisjû, e a 'l pjö zuen a l'ge da söbet la so part... Pasa fo kuak de, e [o'] scet pjö zuen, töld sô töt kel ke l'ê so, a l'part per ün oter paîz bel deluntâ, vja de la so zet e de la so religû... e po 'lã lã l'maja fo a töt a kampâ de sjorasû. E kuand ke l'ã majâd fo a i brage... in kel paîz lã te borlel mia fo ôna karestea porka!, e lü l'fenês per vïga imbizôñ a d'i brage e de 'l pa. Añura... l'va lã de ü de kei de lã e l'se

met a i so dependense de lü... k'i a manda po fo a pastüraga i porsei 'ndi so kap. De la fam... a l'völerês majâ poa lü e tâkole e gande d'i sunî: ma g'ê ñe mezo de ãgen asê! E jura, po, turnâd a seña, a l'se diz isê: "lã 'nka del me pader... fin'a i so servidûr i maja semper asê. E me, l' so scet... ke krepe de fam. A sê, po: turnerö 'ndre lã de l' me pader, e ge digerö isê ke me mêrite ñe pjö de ês ol so scet... ke g'l'ö faca det grosa: isê ge rierö po a fas tratâ amô kompân d'ü d'i so laorêc: almên lü l'ê ü brao padrû". Oter. Pênsaga sô 'nkö pênsaga sô 'ndomâ, ü de l'se 'nvia 'lã per turnâ lã de l' so pader. L'ê ñemô mia izî a la ka, ke l' so pader a i a figüra, e... (faresev kozê, oter, e? Töc pader e mader del brao Tobjöl, voter?) e ge se möv sô 'l kör. A l'ge kor inkontra e l'ge se böta a l' kol e i a 'mbrasa fo e i a baza sô. Jura, o' scet a l'teka: "O pader... oi di, sküzém: padrû, a v'l'ö ñak kômbinada grosa, a u e a l' cel, me. A mêrite prope pjö...". Ma l' so pader intât ke lü l'barbota l'ge fa: "Brao scet! E adês fã 'mpo sito, te, ke l'ê de tat ke ülie parlâ me!"... po l'g'ã zemö urdenâd a i servidûr "Dâi, dokâ. Purtim ke ol vestîd pjö bel dela festa e metigel sô, po l'anêl a l' did e i sândai a i pe: ke ke l'ê scet de padrû, lü, e mia servidûr! Po, bankêt e festa granda. Kol vedêl pjö bel in tâola. Ke, êkola, ol me scet a l'éra mort ...e adês l'ê ke iv, a l'êra perdîd, e adês l'ê turnâd a ka". Dic e fac, a l'ê festû. ...O' scet pjö grand, ke l'ê stac fo per i kap a laorâ, a l'ria ñe 'n ka, ke l'sent a sunâ e kantâ. A l'cama de fo ü servidûr e l'ge domanda koze söcedel po, lã de det... e kel lã l'ge kônta sô "g'ê turnâd a ka ol vost fradêl... e l' vost pader a l'fa met in tâola ol vedêl gros, de tat ke l'ê kontêt". E lü lã l'capa ñak ol nervûz, e l'völ pjö ñe 'nda dedêt in ka. E l'jura, a l've defö l' so pader a sirkâ de 'mbunîl sô... ma lü l'da fo "ãda ke, kuat a l'ê ke me ve servese, e ö mai ñe lasâd istâ de fa kel ke m'ï dic u... e u, êkola, m'ï ñe mai regalâd ü kavri, ü ke l'ê ü, de fa festa koi me amîz! Adês invece ke l'ria ke... kel vost brao scêt lã, dapo ke l'v'ã majâd fo töt koi donase... ãda ke: a fi kopâ per lü ol nost vedêl gras! E magare, me tokerâ a spartî sô ön'otra olta"... Ma l' so pader a l'ge a dre koi bune isê: "Sigÿr: ol nost vedêl! Ma, kar a te l' me scet! Te te se semper istâc ke kon me, te... e te set ñe rinkorâid ke töt kel ke l'éra roba mea l'éra akâ roba to? A g'ê

ñe 'mbizôñ de dim impjasër! Ma inkõ mê prope fa festa, e sta sô aleger, dài dokâ: ke, ol to fradêl a l'éra mort, e m'g'l'ã ke amô iv, a l's'éra skancelád zo de 'l taküi, e l'ê amô ü de noter! Soi po mia semper pader per töc voter du, me, a??. Ne... ke ävresev fac isë poa oter, a? E ki ke tontoña poa lü, ke... a l'ge pense sô be, ki ke l'ê kel brao fradêl ke! —

KO SEDEZ : FATÛR — SJOR E POERÊT

Ön'otra bela asë, po, a n'n'ã köntâd sô a i so amîz...

— Ün om a l'g'ïa ü fatûr: e i g'ã metîd indi orege ke l'ge majaa fo de 'l so. Ol padrû, dokâ, i ã camâd lâ e l'g'ã domandâd könt, se l'éra ira töt kel k'i köntaa sô... e de met a l'urden töt, de lasaga 'l post a ün oter. E 'l fatûr l'ã ragunâd sô isë: “Koze foroi kozê po me... adês ke so lisensjâd? Forsa de sapâ sâltem adôs, ke n'n'õ mia; sirkâ la karitâ, me duna mia, deente a ros. Buna: l'so me kel ke g'õ de fa adês, de ïga ki ke dapo i ge pense impõ lur ak a me?... L'ã camâd lâ ü per ü kei ke l'g'ïa dei kredec de sköd, e... a ü, l'g'ã fac la firma per ü sinkuanta brente de öle a 'l post de otanta, a kel oter a l'g'ã fac figurâ otanta ster de formët a 'l post de sento... e po aante isë, ekol. De manera ke 'nfin a 'l so padrû, a senza daga de premi a lasâl a ka... g'ã tokâd leaga tat de kapêl... kuat ke l'éra stac drito, 'ndi so, de afare. Impari ergöt poa oter, dokâ: ke, kei ke fa i so komoc e i so trafeg a 'l mond... a i ê tate olte ü tok pjö fûrbi de kei k'i se 'mpenserês de trafegâ per ol be e per ol cel. E, ve l'dige amô me: entrî po sô, fîs per tep dei amiüz gösc kola roba... akâ kela mia gösta: de manera ke kuand ke de roba n'n'ïvrî pjö, kei lâ i ve derve fo 'ndi so ka i so, de tesör, ke isë ñe oter resterî mai a ma öde. E teñi bu a kesto ke ke ve dige amô: ki ke l'ê fedêl indel pok e 'ndel facel, a l'ê fedêl akâ 'ndel tat e indel deficel; ma... ki ke l'ê dizonêst indel so pukî... a l'ê dizonêst akâ 'ndêl tat. E jura, dokâ, se sirî stâc mia onêsc e po ñe fûrbi kola roba ke al isë isë... ki ke ölerâ mai dav indimâ sô la fidüca tata roba ke al ü muntû de pjö!? E se sirîv istâc bu ñe de dovrâ

be la roba d'i oter... ki ke ölerâl po fav deentâ padrû de ergõt!? Ve l'dige me: g'ê mia servidûr, ke l'ge rie a serviga be asê a du padrû 'nsema; ke... ü l'ge sirka dei laûr kuntrare a keloter: kompâñ ke l'ge söcêd a ergû de noter ke: o l'ge ölerâ gran be a ü, e a kel oter sê po no... o ü i a desprezerâ aderitûra, e kel oter i a 'ndorerâ. Buna: merâ ke sirkigev fo 'ntra sold in tera e Olt in cel, voter! Ke... lü l'soportâ prope mia de eñ de dre a ergû o ergõt d'oter, afare, kapitai, karjere parêc... Po, l'sarês kompâñ de ülfî sta 'n gropa a du kaai, o de tra do frece kon du arki a stes tep — [mia ke kond'ü l'see po pjö tat belfâ, ne...].

Figürâs farezê e sadüsê a sent kei laûr ke, ke tace de lur de solc i se ne 'ntendia, e i ge n'ïa asê... se i te l'tüia mia 'n gir ["te serê mia 'mpo kampâd in arja, djolte, a te 'l nost poer maestro kon ñe ü iskarsela? Vê zo d'i nêoi: a ês isjôr... l'ê gran regâl del cel!"]...

Ma lü l'ge dizia isê: — A g'ï isê oja oter beatû, a fas ved "a post" denâc a töc. Ma g'ê sö lä ergû ke s'pöl mia 'mbrojâ: ke, lü l've ed be de det indel kör. E kel ke ke l'sömea or ke berlüz... per lü l'ê kel ke l'ê: römeta, eko! Mia bilêt d'entrada a l'reñ — ...Oter.

Ü de, l'g'â dic isê a kei k'i se 'mpjenia sö la boka adoma de legi sante, e a kei ke i so, de legi, i vülia fâsele sö lur... oter ke Bibja: — Legi sante e profêc... ol so tep a l'ê ska-dîd kol Batesta, e isê i resterâ fisade 'nde storja. De 'l Batesta a eñ e a 'nda 'n'nac... kel ke prima l'éra adoma figürâd e preparâd... adês a l'ê ke: ol reñ a l've adês, e töc a i a ed e töc a ge sta a lur de sforsâs de fan part... e mia eñ bötâc fò a la manera de kei k'i ge fa kontra. Fürtünâc, dokâ, kei k'i ed e ke kapês kel ke söcêd in kel tep ke, kompâñ ke m'â po semper isperâd! Perô... ve dige me ke l'ê pjö belfâ e meno perikol a bötâ fo öna stela de 'l cel, koñê tö fo de la Bibja e de la eta öna d'i so legi delbû del Dio Sant. Prezempe: ki ke kasa vja la moër de ka po n'ne spuza ön'otra, l'ê semper fo d'i legi sante e poa del reñ. E isê poa kela ke spuza ün om robâd a ön'otra, ke l'éra 'l so om —.

Ke, i so amîz a i ä storzîd ol naz finâ a lur; ma... diga kozê: l'ê mia ü ke l'kambja parlâ per fa kontêc töc, lü! Ol bel a l'ê, ke... ñe i fomne (a 'l solet a skoltâ lä 'mpo 'mbanda) a i ê stace mia töte persüaze ñe lure.

Ön'otra olta, l'ă köntâd sô kel ezempe ke.

— A g'éra öna ölta ü sÿor, töt sida e pes, e töc i de l'faa festa e l'banketaa; e ü poerêt, töt istrasët e pÿagët, l'istaa lä sentâd zo de fo dela so ka de 'sto sÿor, a spetâ ke i portês de fo i ansaröi, dapo netâd sô, per troâ det vergöt de majâ, insêm a i ka, k'i a lekaa sô a lü: ma lä de det i ge pensaa mia, ke... se l'éra poerêt, a l'éra ol Sinûr k'i a kasti-gaa. Oter. Ü de... ol poerêt a l'ê mort, e i ângei a i ä portâd vÿâ, sô insêm a l'Abrâm. A l'mör akâ ol sÿor festû e majû... e dapo i a soterâ, e i a porta vÿa i dÿâoi. A forsa de smicâ sô disperâd, te edel mia sô, la 'n sima, ol Abrâm... e ol so poerêt, sô lä 'nsem kon lü? Aÿura, l'g'ă uza sô isë: “A te, pader Abrâm, iga pÿetâ de me, e mândem zo ke kel poerêt lë kola so ponta del did bañada per inömedîm sô la me lengua a me... ke brüze ñak töt, in kel fög ke”. Ma l'Abrâm a l'g'ă diä isë: “A te, scet... regördes: uramai, la to part de be te t'ÿët bel e gudida 'n veta. Lü ke, 'nvece, in veta l'ă patîd asë la so, de part. E isë adês, per lü g'ê la so part de konsolasÿû, e per te la to part de tormênt. Ke la te pare gôsta, o mia... mê prope ke te se kontentet isë. Ke, 'ntra de noter ke de sura e oter lë de sota... a g'ê be oter ke ü burû a sprefönd... e g'ê mia prope mezo ñe de eñ sô oter, e ñe de eñ zo noter!”. E kel lä “ÿura... te prege adoma, pader Abrâm... de mandamel îlä a ka del me pader. A g'ö lä amô sik fredei, e l'me pÿazerês tat ke l'm'i a konvincerês a bor-lâ mia ke poa lur in kel tormênt ke!”. Ma l'Abrâm amô a lü: “Ee! I g'ă zemô lä tat de Mozê e profëc, lur: basta k'i ge dage skolt a kei, o no!?”. E kel lä amô: “Ma no, ma no, o pader Abrâm. Forse adoma se ü mort a l'me a lä a fâmei stremî 'mpo a la granda ...i me kambjerâ eta, kei lä”. E l'Abrâm l'ă po teâd fo kört isë: “Aa... se i skolta ñe Mozê ñe profëc, ke i parla zemô car asë... a g'ö prope pura ke poa me e te... m'leerês sô iv a parlaga per ol pernegöt: ke, i ge sent prope pukî. E, dokâ, adio!”—

KO DESSÊT : SKÂNDOI — FI DEL MOND

Ôna olta, l'g'ă dic isě a i so: — Ke l'şöcede dei skândoi... a s'pöderâ ñe mai skiâl del-tôt. A l'sarês kompâñ se ga födês mai plok sö i strade. Ma... guai a kel ke i a kumbina, ve dige! Ve dige me, ke l'sarês mei per lü k'i ge 'nfilserês det ol ko indöna bela preda de müli po i a böterês zo det indel mar... pötôt de ĩga de skandalizâ ü scefi e öna buna persuna! Oter dokâ, ardi be de skandalizâ negŭ! Po, perduniga a ki ke ve da skandol... kompâñ ke g'ĩ de perdunaga a ki ke se skandaliza de oter senza rezû... e l'ê amô e semper ü fradêl, per voter. E po oter, in suerpjô, ge perdunerî akâ set volte a 'l de a ki ke l've ofënd, se l've ofenderâ set volte indŭ de... e tat de pjô se l've domanderâ a sküza —

Alura i ê i so k'i ge diz isě: — Ee: toka po isě damen, de fidüca, se la g'ă de 'nda isě! Siñûr... pödet mia rinforsâm impö 'ndela nosta fidüca, te, e? — E 'l Gezû:

— Ee... a oter! Se g'ăvresev tata fidüca isě, kuata ke n'ne sta det indŭ grenî de some-sa... ge digeresev a kel murû ke “trâ fo i to raiz de ke, te... e vâ lâ a 'mpjentâs zo det indel mar!?”: e kel murû ke l've skolterês! [Defati, adé ke kele pjante ke, ke sö la ria: se i staa lê a pensaga sö, ke ke l'sarês riäd l'akua olta, i sarês ñe spontade!] E kuat a fidüca e premi de fidüca, skoltim a me adês. Oter, se g'ăvresev fo ü laorêt a arâv sö 'l kap o a menâv fo ol armênt, a... apena ke l'turna indrě de 'l kap o de 'l prat ge digeresev söbet, diolte: “vé sã, te, po sêntes zo a majâ!”, e? O digeresev mia pötôt isě, prima: “Adês parêgem zo de sena a me, trà sö i mâneg e servêsem a tâola, finakê ö fenid de majâ e de biv me. E dapo te maerêt e te bierêt a te”... e? G'ăvrâl diolte ‘l padrû dei debec kol so servidûr, adoma perkê 'l servidûr l'ă fac kel ke l'g'ia de fa? [E 'l servidûr ge digerâl magare a 'l so padrû “dâm ü premjo, fäs vŭli be” oñe ölta ke l'fa 'l so doěr?] Isě l'ê akâ per voter: abekê ĩgev fac a pontî töt kel ke l'v'ê stac komandâd... [inkredis po mia de deentâ kompâñ del padrû, ma] teñis semper amô per servidûr e basta, k'i ä fac ol so doěr: negöt de pjô... o de deriti specai! — [Ke se si po mia onêsc e laorentû, okorî ñak, oter, ñe maerî mia per tat a öfo, oter! A 'l rest... ge toka a 'l padrû de sura, de pensaga, premi o mia premi de da fo.]

A l'ia streersâd fo zemô tota la Samarea, e adês l'istreersaa fo la G'alelea. Denâc a ü paîz, ge se fa 'nkontra dez lebrûz, i se ferma ü falî ilâ e i ge uza sô isê... 'ntat k'i fa sunâ i so kampanelî: — A te Gezû profêt: de 'l volt de 'l to post ke 'l ta toka... îga bu kör poa per noter, poerêc a noter! O poa te sterêt a la largâ e ta ma kaserêt vja, e? Serêt mia te pôtôtst per noter kome 'l profêt Elizê per ol Naman ol serjâ? —

A l'ge arda be, po l'ge diz: — Gösta, fradei! Korago, oter: ke 'l Siñûr l'istâ de la osta banda e l've l'manda ke Lü 'nkô 'l so profêt! Îiga fidüca oter: e i osc prec... — — Aa, kei... de sigûr a i ê mia lâ a spetâm noter! — — Però, oter de brae indi lâ e sa fi ed de lur per ol vost brao certifikât... perkê ve l'dige me ke sirî a guarîc! —

Po, salüdâc, i a lasa lâ. E kei lâ... perkê proâ mia a fidâs, ôna olta? Negôt de pêrdega... E 'ntât k'i va 'lâ [... magare a domandâga a i prec “l'ă dic isê 'l Gezû de guarîm!”] i ge kred... e i se troa a bel e guarîc delbû! Ałura, ü de lur, apena ke l'se troa guarîd, a l'ge pensa ñe pjô a i prec, ma l'turna 'ndre de 'l Gezû, a l'kanta töt kontêt ü salm in glôrea po l'ge se böta zo deante a diga grasje: érel mia ü samaretâ, ñak!?! [A m's'éra gösto sô i konfî, e i so, de prec, se mai i éra pôtôtst deluntâ: dokâ, za ke l'éra lě...] E 'l Gezû:

— Me l'so ke i guarîc a i ê 'n dez: e i oter növ... indo éi, a? A n'ne e ke ü sul, e ü forestêr, ak, a kantâga grassje kon noter a 'l Dio Siñûr? La a semper a finî isê: töc i de a pregâ 'l Siñûr a câkole, i cama 'l so brao mesia: e kuando ke i a lîbera... a l'ge ansa: se 'nkredî magare k'i ndarâ lâ a diga grasje?! — Po, a lü lâ l'ge diz isê: — Lèa sô, e và in paz. La to fidüca la t'ă guarîd: tènhen semper tata, te, e la te salva! — Oter.

Dei farezê ôna olta i g'ă domandâd: — Eñel po kuande... 'sto reñ del Dio Sant, e? —

E l'g'ă respondid isê: — A l'ê mia ü laür... ke se l'capa 'ndi ma kompâñ de ergota... per di “âdel ke ke g'l'ô ke me!” o “adêl lâ, dêm lâ a töl sô!”, o sedenô “l'ê 'n cel”, e isê l'ê per i ozei... o “l'ê 'ndel mar”, per i pes! Ol reñ del Dio... m'ge s'ê zemô det töt ke adês, a ülîl! Ma, in tace... m'ge nega det, invece de nodâga o de gulâ, ekol! —

Po l'g'ă dic isê, a i so töt penserûs lâ aturen:

— A l'rierâ dei tep... ke ölerêsev tat ved amô, ak adoma per ôna gornada, akâ per

l'öltema olta... kel ke g'ă de eñî, o' scet de om mesia... e tace i ve digeră "l'ê ke, a l'ê ke!" e tace d'oter "adél lâ, l'ê lâ!" e po "ol Dio... ol Dio! A l'me manda ke lü me, per... ol Dio l've komanda de...": ma oter, perô, 'ndiga mia dre! Perkê 'l so de del mesia a l'sarâ kompâñ d'ü sômêlêk: inôtel kõrega dre o skapaga; l'ge pensa lü a scarî töt de să e de lâ del cel indün amen... e kel a l'sarâ 'l so de! Ma prima... scet de om a l'g'ă de patîn asê e l'g'ă de ês tead fo d'i omeñ de kela bröta generasjû ke! Kompâñ de 'l Noê: per vês salvâd... g'ê tokâd ês trac fo de töt. Se regordî a i so tep del Noê? I majaa, i biia, i tüia moër e i se maridaa infina a l'öltem, fin'ak a 'l de ke 'l Noê l'ê 'ndac de det indel'arka! E po l'ê stac delövjâd, e i ä skuac ivjâ töt! E se regordî a i so tep del Lod? I majaa i biia, i endia i krompaa e i somnaa e i faa sö i ka. Po... ol de ke 'l Lod a l's'ê 'nviâd fo de sitâ, g'ê pjüüd zo a trekasete solfer e fög... e i ä lasâd lâ adoma ke sender! E isê l'sarâ ak a 'l so de del mesia ke l'se farâ koñôs a töt... a l'sarâ propja kompâñ de 'l de del Noê e 'l de del Lod! Afura, kel de lâ, ki ke l'sarâ sö sö 'l terasî... l'indage mia zo a töt sö i so laür de töt dre, e ki ke sarâ fo 'ndel kap a l'turne mia a ka! Regordis de la so pöera moër del Lod, e ultis ñe 'ndre! Isê, ki ke 'lura sirkerâ de tra 'nsem vergöt per iskampâ... kel lâ l'sarâ a fregâd... e l'iskamperâ ki ke pjenterâ lâ töt! Aa, sê... ve l'dige me: kela olta lě, prim amô de leâ 'l sul... du i sarâ dre amô a dörmî, indöna ka: ü l'leerâ sö e ü no; e do i sarâ za dre a maznâ 'l formêt insem: öna la masnerâ amô, dapo, e öna la maznerâ ñe pjö; du i parterâ a 'ndâ 'nde stês kap: ü per iskampâ, kel oter per restâ lâ stekîd! — I so i ge fa: — Indoê isê po, maestro, e? — Ma lü l'ê 'ndac inâc: — E ilura, i g'ăvrâ 'l so bel defâ i ka e i ozei del cel ispasî del terê: ke l'mankerâ prope mia i kadaer! Ma, ol post... kel, ñekâ dil... a s'ge krederâ adoma dapo ke l'ê söcedîd: e, dokâ... meti ke l'ê despertöt... e l'ê ke —

KO DEŽDÔT : SCEC — CEKO DE GEREK

Öna olta, a l'g'ă köntâd sô kela parâbola ke...

— Kesta ke l'î za sentida, ne? Indôna sitâ, g'éra lâ ü de kei ke fa i sentense 'n trebünâl; ma, per malaskôdesja e pura ñe del Siñûr ñe del djaol, a l'faa mia 'l so doër, se g'éra mia de met in skarsela. In kela sitâ læ g'éra lâ a ôna pôera êdoa, e l'ê 'ndaca lâ de lü lâ a diga isě “fâ kel ke l'ê göst kontra kel tal lâ... ke l'me fa de 'l dan a me!”... Oter. Per împö de olte, ol kapo i ä lasada tontoñâ senza möv ü did; ma a la fi l'ă dic isě: “Mia per ol cel e ñe per i omeñ, ne... ma perkê isě la me rompe pjö i skâtole, staolta forö 'l me mestêr, per le!”. Sigûr: î sentîd be: a l'g'ă fac la so gösta sentensa, lü, ol ingöst e lendenû, e la so fidüca de le l'ê mia 'ndaca a öd, e kel ke l'éra göst a l'ê stac! E oter... üli ke l'ge fage mia kel ke l'ê göst a i so scec k'i a unura e i a prega de e noc... ol Dio Ğrand indel cel: lü, ke l'güđika a töc i aokâc del mond!? Ve dige me, ke l'ê semper drě a faga göstesja, adoma k'i se fide e i g'äbe 'mpo de pasensja. Ma, prope, êkola: ge sarâl po semper ergü... ke l'g'ăvrâ amô fidüca de 'l Dio del reñ, e de 'l reñ del Dio... de üli e sirkâ kela göstesja læ... infin'a kuand ke 'l mond a l'sarâ gödikâd? —

E delě 'mpo, amô sô i aokâc de 'sto mond, l'ă dic a isě : — Te, perô, kuand ke te 'ndet lâ a 'l to procês, te sirket amô a per strada de metes dekorde kol to kontendênt, de fenî mia denâc a 'l güdikânt e po de 'l bank in prezû: mia ira?! De lâ... se te l'set mia te l'dige me: te eñereset pjö fo, prima d'î pagâd infina a l'öltem gel! —

E poa kesta ke l'ê ön'otra d'i so parâbole.

— Ü de, a... i ê 'ndac sô 'n du a 'l Dom, a pregâ: ü farezě, e ü de kei d'i tase. Ol farezě, ü de kei töc isgûf de 'l so fjat e de 'l so unûr k'i kalkula töc i oter tace mizerâbei pok de bu... a l'va lâ denâc, lü, bel drec a ko olt, impalâd de dre a 'l so naz e a 'l so butû 'lla pansa, pötöst ke deante a 'l cel... po l'prega isě: “A, Dio Ğrand nost de noter: él mia ira, e meno mal, ke me so mia kompâñ d'i oter... ispörk lader katîv mezâ e koi kôreñ... e so ñe kompâñ de kel dizgrasjâd læ, servidûr d'i româ?! Me, fo semper be töte i me brae la-

ande e deosjû, i me dezû... mia òna: do olte a la settimâna, me; po, ge page semper a 'l Dom la me braa tangenta sura tîc i me be ke g'ô, me, anse: page de pjô per kei ke paga negôt e ke roba, kompâñ de kel lě. Mètem a la proa, te... e te fo ed me! Me sě, ke prepare 'l reñ de l'Isdraël, me!'" Kel d'i tase, invece, l'istâ zo 'nfonta, a l'varsa sô ñe 'l müz e l'se bat ol kör... intât ke l'diz sô "Ardém po mia trop mal, a me, Siñûr Dio Sant: so ü pok de bu, l'ê ira: ütém impö U a konvertís... po mandi zo ergû a salvâ la osta zet ...e isě po troerö a me ön'otra manera de majâ!'" Buna. Ve dige me ke kesto ke l'ê tur-nâd a ka soa perdunâd, ma kel oter no: kala pok... ke l'gê bajês dre lü a 'l Siñûr perkê l'soportata tata bröta zet! Ma, ve l'dige me: ol paû l'perderâ i so pjöme... ki ke a 'n söper-bja l'sarâ 'nkornâd, e ki ke sta a 'l so post a l'sarâ 'nkurunâd... a diskresjû del Töt Sant! Sti 'ndi ost brae pañ gösc, oter: sul ke a sta manera ke sirî a delbû trac sô, ekol—.

Tate olte i ge portaa lă tace scetî, a fâgei karensâ, djolte per fai sta be o per fağa fa i brae: ma i so amîz i a edia mia ontera, e i ge uzaa dre poa a i so mader. Jura, ol Gezû òna òlta i ä po recamâc isě: — Lasii veñ ke kon me i scetî, oter, kasimei mia vja! Ve l'dige me: ol reñ del Dio Grand a l'ê prope adoma per zet kompâñ de lur... ke se met in bras a 'l Siñûr, senza bizôñ k'i stödje tat o i parle fi! Iskultim be, kozê ve dige me e l'ê ira: ol reñ... o êñega prezentâc e capâl isě kompâñ de kei scec ke, o... 'nsoñâs ñak de fan part, ekol —. Po, oter.

Öna olta ü d'i kapurjû i ä 'nterpelâd isě: — A, te, maestro sant: koze g'öi po de fa kozê me adês... per guadeñâ 'l me brao post indel reñ ke te diget te, e? —. E 'l Gezû:

— Càmem maestro, se te par, ma mia sant. De Sant a ge n'ê ü sul, e sô 'ndel cel! Te, po... te g'i set poa te, tîc i nosc bei komandamênc, ne? Să ke m'i dis sô 'nsema òna olta, me e te —.

— Ma certo maestro. Alura... "Me So, So Me" l'ê ol so dio de l'Isdraël, e l'Isdraël l'iskolte be: a l'sa farâ mai sô ñe figüre, ñe mâskere, ñe dei oter nom, per ol so padrû! L'adorerâ ñe mai ergû o ergôt d'oter, ñe mai l'nominerâ ol so Dio a vânvêra, po ñe kon kuak nom senza rispêc e senza bizôñ... se l'völ la so benedişjû! —.

— Indêl me de, ke t'ô dac me de festa, te ferêt mai dei laûr mia sanc, po ñe dei laorâ per quadêñ... se te ôt la so benedisjû —.

— Ta dizunurerêt mai to pader ñe to mader, e t'i pjenterêt mai lâ, ñe malâc ñe 'ndel so bizôn k'i g'âvrâ lur, se ta ôt la so benedisjû —.

— Te koperêt ñe mai, ñe in ôde, ñe per vendikâs, ñe per vîga 'l to pro kontra ki ke l'ê kompân de te deante a 'l Siñûr, se te ôt la so benedisjû —.

— Ta farêt mai negota, te, per portaga vja a 'l to izî la so ka, la so dona, ol so kap, ol so azen, la so koerta, i so arnêz e 'l so pro del so laorâ, se ta ôt la so benedisjû —.

— Te digerêt mai sô 'l fals in gödese e meno amô gürâ a dan del to izî, se te ôt la so benedisjû —.

— Ta 'ndarêt mia 'nsema kola so dona d'i oter, te, ta farêt mai de ac fo de l'urden de la to nadüra, ta enderêt ñe mai 'l to korp e la to libertâ ke 'l Siñûr a l't'â dac, ñe a ün oter ta ga kromperêt o ta ga roberêt ol so korp e la so libertâ, ke 'l Siñûr a l'g'â dac, se ta ôlet la so benedisjû —.

— Prope. Se te ôlet ke l'te benedese, te po i to scec, per i generasjû senza fi, per ol so bu kör e la so glörja, ol so Dio del Izdraël, ol benedêt per i mela sêkoi e po amô mela. E dokâ, fâ isê poa te, e poa te l'te benedeserâ —.

— Sigûr maestro. Me fo zemô isê: de pos ke so bu de ragunâ i m'â be fac imparâ isê!

E jura 'l Gezû l'g'â dic isê amô: — A... e brao, te! Te mankerês adoma ü laûr amô: te ...ènd fo töt kel ke te g'êt in roba ...e i solc ke te capet dâgei fo a i poerêc: e dapo sê te g'evrê ü tesör bel e bu, teñîd in banda 'ndel cel! E isê te serê pront a eñem dre a me —.

Ma kel lâ, perinviâ ke l'éra sjør mia de skers e dokâ l'sa 'nkredia za in benedisjû de 'l cel, lü... bu isê per ol reñ (“kisâ kozê m'sarâ bu de fa... me koi me solc, e te koi to mirâkoi”), l'âvrâ pensâd)... a l'â a kambjâd cera, e l'ê restâd lâ ñek.

Ol Gezû l'se n'ê be a rinkoraîd söbet... e turnâd per la so strada l'dizia isê:

— Ee, sê, prope. A l'ê gran deficel per ü sjør... a pasâ det indela porta streca del reñ! A l'ê pjö belfâ a 'ngogâ det òna goga kondöna kua de kamêl o kondöna korda de basti-

mênt... koñê 'nfilaga det indel reñ ü ke l'g'ă del so, eko! —

E kei k'i a skoltaa i ge diaia: — Aa... cêrtoza! Alura sê, ke m'se salva pjô! Ki ke pa-serâl po det... a?! — E l'g'ă respondîd isê:

— A penserî mia ke 'l Dio l'komande dei laür imposîbei... o sê? Gê sarâl imposibol de fa pasâ det vergü, a lü? Ergü, ne, perô; mia... la roba de ergü: e l'ê po semper bu, lü, de destekâ fo töc, de kel k'i g'ă o mia. —

E l' Pjero: — Te... e noter? Áda ke: m'ă lasâd indrê töt de töt... po m'te s'ê eñic idrê a te! — E 'l Gezû a lur: — A oter, ve l'dige me: g'ê negü ke l'ăbe lasâd indrê töt per sirkâ fo 'l reñ... ke l'g'ăvrâ mia 'n kambe ü bel tok de pjô zemô de adês... e po a so tep la [so braa] eta sensa fi! — Po, oter. E dapo, trâc insêm i so dudez, a l'g'ă dic isê:

— Sö pronc, oter! Adês, a m'va 'lâ a Gerüzalêm. E adês sê, ke l'veñerâ a ko töt kel ke del krist a l'ê stac iskrîid zo d'i profêc. A l'ge eñerâ metîd indimâ a i pagâ, l'sarâ 'nsöl-tâd e ofendîd e spüdâd, e dapo fröstâd a sang a i a koperâ ak! Figüres ke nôiât, per ü profêt... a Gerüzalêm! Ma staölta, a 'l so ters de... l'sarâ iv amô [töt intrêg!] —

Kei lâ, normâl... i g'ă kapîd det ôna aka, negöt de negota: töt kel diskorsî lâ l'g'ê re-stâd sô sô 'l goz, e i ge riaa prope mia a digerîl, a kapiğa det vergöt de sügo...

A i éra skuaze riâc lâ a Gerek, in procesjû de zet e de pelegri 'nkontrâc... e g'éra lâ ü orbo sentâd zo 'n banda a la vja, ke l'sirkaa la karitâ. Sentîd a pasâ de lâ ü ros de zet fo del normâl, a l'domandaa kozê g'éra de bel: e i g'ă dic isê ke l'pasaa fo 'l Gezû ol Naza-rê. E jura l's'ê metîd dre a uzâ sô: — A te, Gezû, scet del David... fâm vergöt de be ak a me! — Tace i ge uzaa dre, de faga fa sito... ma lü l'vuzaa sô pjô fort amô: — A te scet, del David: ârdem ke po a me, e iga kör! — [L'ïa sensoter saîd de kuak orbi zemô stac guarîc...] Ol Gezû alura l's'ê fermâd, l'ă dic isê de traga aladê kel om lâ, po kuand ke l'g'ê stac viâ l'g'ă domandâd: — Koz'ôlereset ke farês kozê per te, me, e? —

E lü lâ: — Fâ in manera ke me ge ede... e te ede, profêt! —

E 'l Gezû l'g'ă dic isê, prope: — A be. E te... èdem, dokâ! La to fidüca la te resana e, se te ôlerêt, la te salva! —

E a l'ato a l'g'ã est [amô], e l'ge 'ndaa dre... a ringrasjâ(ndo) 'l so Dio Grand.

Isê kompân ke l'ã po fac a la zet aturen a edî töt; e normâl, dapo, n'ne köntaa sö ontera, e i uz i cirkulaa a la zvelta.

KO DEZŃOV : ŽAKĚ — BANKE — PALME

Indâc det a Gerek dokâ, a l'la streersaa fo töta. E ü tal ŽakĚ, kapo de kei d'i tase per i româ (...oter ke camâs “ol pür”), sĵor asĉ, a l'vülia ed istö Gezû: ma l'ge ríaa mia, ke l'éra prope bas de stadüra (e ña 'l Gezû l'éra po mia öna stanga... de tös fo pjö olt de mez a la zet)... e te fal kozê, dokâ? A l'kor inâc ü falí po, ütâd d'ü 'mpjegâd ke l'ge fa skaleta, a l'salta sö söndü pjantü, ke 'l Gezû l'g'ïa per forsa de pasâ de lâ. Defati, a l'pasa de lâ, a l'varsa sö 'l ko e l'ge fa: — Sâlta zo zvelt de lê, te, ŽakĚ! Ke 'nkö g'ö prope oja de fermâs ke 'mpo a ka toa! —.

A l'ê saltâd zo töt kontĕt ke l'gülaa, e i ã po spetâd lâ a ka soa. E ĵura, tace i barbo-taa “âda ke: kon töt i bei posc de majâ ke m'g'ã ke 'n sitâ... prope a ka del pjö bastârd d'i pok de bu ke m'g'ã ke... lü l'va lâ prope de lü!”; e poa ergü d'i so amis de lü i éra mia tat kontĕc. A tâola... ol ŽakĚ l'salta sö 'mpe, e l'ge diz isĉ a 'l Gezû:

— Áda maestro: per te... 'nkö ge do vja a i poerêc la metâ de kel ke g'ö det indel bur-sî; e se ergü ke l'me fa ed ke g'ö robâd... a ge do 'ndre kuater völte tat, a rêgola de lege d'i româ, êkola, mia 'doma ü kuart de pjö, e ñe a 'l dope! E me g'ö mai ñe robâd öna pegra a nisü, so mia obligâd, me! —. E 'l Gezû l'ge da bota: — Brao, te! Inkö sĉ ke te se salvet; e ke 'nde to ka, mia a Gerüzalêm! Isĉ, t'ö po troâd akâ te, dokâ... ü scet del Abrâm a te, de kei ke g'ïe de guarî, ekol! —. ...Û ssĵorasû de kei, ne! E oter: isĉ, de pos de ĵura, ol ŽakĚ l'ê stac ü brao ebrĕ, ak a sköd onêst i tase per i româ.

Öna olta ke g'éra lâ împö de zet a skoltâl, ol Gezû l'g'ã köntâd sö a kel ezempe ke.

A l'éra uramai vizî a Gerüzalêm, e lur i se 'nkredia ke l'éra roba de kuak de ol mo-

mênt del so triöñf, del so famûz reñ del Dio komekê i se l'ispetaa lur...

E lü l'ã köntâd sö... — Ün om de gran kazada... l'ê partîd per ü post deluntâ, a tö 'n ko la kuruna de re... ke po l'sarês turnâd a ka 'nkurunâd sö. Hlura... l'ã camâd lâ dez d'i so servidûr, l'g'ã dac dez bele palankune dore e l'g'ã dic isê de fale po frötâ be per dapo, kuand ke l'sarês turnâd a ka. Komela, po, kom'êla mia... i so paizâ, perô, i ge ülia mal asê, a kel om lê, e i ävrês pjö ñe ülid ke l'turnês indrê, e men ke mai a komandâ de re! Ma, tat a l'ê, lü re l'ê deentâd, e 'ndre kola so braa kuruna l'ê turnâd. E dokâ, l'ã mandâd a camâ i so servidûr d'i dez palanke, per ved impö kuat k'i g'ia rendid. Ol prim a l'g'ã fac ved: “Áda ke: te m'êt dac ü... te fo ed dez!”. E l's'ê sentid a respönd “Brao servidûr, te, e be fac. Te set istâc brao 'ndel pok, e te g'evrêt dez bei paiz de ministrâ!”. Po, eñid aladê 'l segönd, a l'g'ã dic isê a 'l so re: “Áda ke, padrû: la to palanka l'ê deentada sik!”. E po a lü g'ê tokâd sik [e forsâk a dez] paiz... Infî, g'ê riâd lâ ü servidûr ke l'g'ã dic isê adoma “Ádela ke... la to bela palankina ke te m'ê afidâd, e me l'ö teñida skundida per benî det indê stremâs: g'ïe pura de pêrdetla, ke l'so ke te te set ün om dÿr, e te pretendet kel ke t'êt mia imprestâd vja... e te töet sö a kel ke t'êt mia somnâd fo te, te!”. E jura 'l re a lü: “A sêe, e? E me... d'i to parole te gÿdike, bröta rasa de servidûr malfidêt! Te l'siet ak, ke oi sköd a kel ke ö mia imprestâd, e regoi a kel ke ö mia pjentâd zo me: e kemanera, dokâ, set mia kurid almên in banka a met zo la me palanka, ke adês me g'avrês ol me bel pro, e? Ma te, magare... te speraet pötöst ke me turnês pjö ñe 'ndre, ne, te!?”. Po l'g'ã dic isê a kei oter lâ: “Purtiga vja a kela palanka lê, e digla a kel ke n'n'ã dez!”. E kei lâ i g'ã oservâd “Ma... se g'n'ã zemô a dez... lü lâ!”. Prope, êkola! Ve l'dige me, la fenês komê, la storja: ki ke g'ã asê, l'g'avrâ amô de pjö, e ki ke g'ã mia asê... ge sarâ töld ivjâ a kel pukî ke l'g'ã [se i ã mia fac frötâ!]. E dapo g'ê tokâd a kei k'i a ülia mia de re: s'i ê fac portâ lâ töc, e a stropade i ã 'ndresâc fo ü per ü sota i so ög. Po amen —. [— *Ve l'dige me: oñe ü ke l'avrâ laorâd e frötâd, a l'veñerâ teñid in könt e premjâd; ma kel ke l'avrâ mia guadeñâd kol so impêñ... kel, a l'ge eñerâ töld vja oñe be e öfese! —]*

A l'kalaa prope pok, adês, a riâ lâ a la kapitâl, a la so sitâ del re David e del Salumû e del Dom... e d'i so dezgrasje per i profëc. E riâd ilâ a Betaña, izî a 'l muntizêl k'i i ge dizia “ol mut d'i ülie”, l'ă mandâd inâc du d'i so e l'g'ă dic isê:

— Indî det lê 'ndel paizê, oter... e troerî lê ün aznî ligâd, ke g'ê ñemô mia saltâd sô sura mai negû: dezlegil fo e purtîl ke. E s'i ve domanda “fi kozê po, oter?”, oter dizîga isê ke n'n'ă 'mbizôn ol Siñûr! —

Kei lâ i ê 'ndac lâ... e i ă troâd lâ prope kompân ke l'g'ya dic lü. Intât k'i dezligaa fo l'aznî, i so padrû dela besca... domândega kozê fai, po, e lur... diga ke l'g'n'ă 'mbizôn ol Gezû. E jura i g'l'ă po portâd lâ a 'l Gezû, i g'ă mefîd sô 'l so mantêl in gropa, e 'l Gezû l'ê saltâd sô, ütâd de lur. E manmâ ke l'ažen kol Gezû sura l'veñia 'nnac, i so i ge destendia zo i so mantei sô la vja. E lâ 'ndokê la vja la tekaa a 'nda zo de 'l mut d'i ülie vers la sitâ, tîc insemâ i so e kei ke l'g'ya dre i s'ê po a ü falî ezaltâc... e i s'ê 'nviâc fo a lodâ a gran vuz ol Dio Grand per tîc i mirâkoi k'i se regordaa, de 'l Noê a l'Abrâm a 'l Mozê a 'l David... fin'a kei del Gezû lê 'n gir in kei de lê. E in tace i vuzaa sô isê: “Benedê, kel ke ria sâ a so nom del Dio Siñûr: l'ê lü... ol nost re! Pas sota 'l cel, e de ke fin sura 'ndel cel pjö olt, glôrea de ângei!” [kompân k'i faa de solet a la so festa d'i tabjôc: tîta roba de Bibja, ne, poa ol re pacîfek sô l'aznî, mia sô 'l kaâl de guera].

Ałura, dei farezê k'i se troaa lâ 'ndelmêz a la zet... i ge dizia isê a lü: — Ma, maestro: i sentet po mia, ke sprepozec!? Fâga fa sito, dokâ, a te! Áda ke sô lâ, de la tor... i ê dre k'i me te (teñ) de ôg i soldâc! — E 'l Gezû l'g'ă respondîd isê:

— Ve dige me ke se i taz zo lur ke adês... i se met dre a uzâ sô i prede 'n tera, ke! [Po, prui oter, ke si brae a komandâ a baketa la zet. Per me könt de me... fi prima a urdenaga a i prede de metes dre a kantâ lure!] — Po, indel ved ormai tîta la sitâ santa lâ sota, denâc a lur... g'ê eñîd a de pjânz:

— Aa, te, sitâ del re... oter ke fermâ amirâc i pas ke deante, a beâs de la to esta! A... se poa te te kapesereset almên adês, kel ke okör per ol to be! E ke rasa de mistêr, invece, ke prope a te l'te see mia car ñemô 'nkö! E isê... te ederê a riâ i to de, ke te sérêt cir-

kondada de büze pjene de soldâc... e i te strengulerâ, i rierâ fo de tôte i bande e i te desferâ sö tota, i te laserâ ñe öna preda in pe dreca söndön'otra! Te se rinkorzerët, ke t'ët mia ülid kapî g'éra de fa kozê a 'l so tep göst: ke te séret a izada, kompâñ de Niniv kol nost brao Gona... te! Epör, prope isë, prope ke, l'ê dre a 'nverâs ol bankêt per töc kol pa noël e 'l vi de 'l cel! — E noter “buna!, alura m'ge s'ê prope...”.

Riada 'lâ a 'l Dom sensa 'ntop la procesjû... ke nisü i éra armâc o i maledia i româ... lü l's'ê metîd dre a kasâ de fo kei k'i endia bescâm e merkansee e kambjaa monede, e l'ge uzaa dre: — A g'él mia skriid zo, e bel car, “la me ka l'ê öna ka per pregâ”? E oter... a m'n'iv fac det öna kaerna de ladrû, prope... êkola! —

E oter. Per kuak de amô, l'g'ã riäd a predikâ skuaze sensa roñe, lä aturen.

KO (V)INTE : IT — SET FRADEI ÖNA MOÉR

Ma i so kapi d'i prec e i duturû... i éra dre a tral a la so fi k'i ge 'ngüraa d'ü bel tok, uramai, e isë poa i kapurjû dela zet. Perô... i sia ñemô mia fa komê de precîz, perkê la zet la ge staa tekada kompâñ d'i moske, a skoltâl. E 'lura, i ä po proäd a la larga; e 'ntat ke lü l'predikaa, i g'ã domandâd lur: — Oë, maestro... dim impö a noter te: ke titol g'ët po de fa kei läur ke, te, e? Ki ke t'ã mandâd ke a so nom, a? —

E 'l Gezû a lur: — Ve forö a me öna domandina a oter, adês. Dizim impö: ol so batêz ke l'faa 'l poer Goân, érel ü läur de 'l cel... o adoma 'mpö de akua e câkole, e? —

Ma kei lä, mia bambi del töt, a i ä ragunâd sö, e i s'ê 'ntendîc intrâ de lur: — Ke... se m'ge diz “del cel”... a l'me digerâ “e jura dokâ kemanera g'ï mia kredîd!”. E se 'nvece m'ge diz “negöt de celêst, êkola”... la zet... la me desfa sö a plokade sö 'l ko: ke, töc i se 'nkred prope ke l'éra ü profët poa lü... figürëmsa! —. Isë... i g'ã po dic ke lur i ga l'sia mia. E 'l Gezû, de sponda: — E 'lura ñe me ve dige negota de me: ve toka a oter de kapîl... ke si oter kei sapijenc... o no? —. Po, a la zet a l'g'ã köntâd sö a kesta ke...

— A g'éra ün om, ke l'ia pjentâd zo öna pjana de it e g'l'ia daca de laorâ a dei kontadî... po l'éra 'ndac ivjâ deluntâ per tat tep. A 'l so momênt, l'â mandâd ilâ de kei kontadî lâ 'l so servidûr, per isköd la so part de öa. Ma kei lâ... i g'â bastunâd sö 'l servidûr e i g'l'â mandâd indrê a ma öde. Ol padrû, l'â mandâd ilâ ün oter servidûr: ma i g'â petâd de bröt po a kel, e i ä kasâd ivjâ. A n'n'â spedîd insö infina a ü ters amô... e lur lâ i g'â malmenâd asê a kel e i ä bötâd de fo. Atura, 'l padrû de la it a l'fa: “Foroi kozê po me adês, e? Ádega... ge mande 'nzo ol me scet: almên de lü i g'âvrâ po respêt!”. E kei kontadî lâ, kome i ä est o' scet del padrû... i s'ê dic isê, a forsura: “Tê, àda ke kel ke l'eredetâ l'ê la so! Sâ ke, ke me l'kopa, e la pjana de it l'ê nosta!”. E... i ä kopâd fo delbû. E adês... kozê ge farâl dokâ, ol padrû de la it, a kela bröta rasa lâ? A l'veñerâ sâ lü ...i a manderâ a bale 'nn'arja töc, po l'ge darâ la so it a ergû d'oter de pjö fidâd —.

E kei lâ, k'i ia kapîd ü falî l'antêfona, a sto pont i dizia sö: — Ke l'kâpîte ñe mai! A m's'ê mia dei kontadî iñorânc, noter! —.

Ma 'l Gezû l'g'â ardâd bel drec indi ög, po l'g'â dic isê:

— Él po mia ira ke g'ê skriîd zo a isê, det inde Bibja: “La preda ke i kapmaster a i ä skartada... l'ê deentada ko de kantû!”? E ki ke l'proa a zbâtega kontra la so krapa, a v'l'isfrakasa, e ki ke la ge borla zo sö 'l gob... kei, a i a sfracela! —.

Duturû e kapi i sirkaa de capâl söbet... ma i g'ia amô pura dela zet. Atura, i g'ê stac amô 'mpö a destansa, e i g'â mandâd apröv dei spiû, k'i sömeês braa zet savja, per capâl in fal indi so diskörs e isê riaga a portagel lâ denâc a 'l goernadûr româ... ke kel a i ävrês saîd lur inkastrâl komê, de faga fa kel k'i ülia lur.

E i spiû, ilura: — Maestro, a l'ê be risaîd ke te parlet mai dope, te... Te ge ardet sö 'l mostâs a negû te, ne... ma te prêdiket semper kel ke öl ol Siñûr. Segönd te dokâ, él po göst, o mia... de pagaga i tase a 'l Cezer, e, notr'ebre? —. Ma ñe 'l Gezû l'éra mia ü bokalû: e l'â mia bokâd. Anse...:

— Fim ved impö öna palanka, oter. Brae, êkola. G'él sö ki, lê sura, e ke nom él, a? —.

I g'â dic isê: — A... kel lê l'ê ol so Cezer de lur —. E lü:

— A, ekol, menomâl: l'ê mia 'l Siñûr, ne? Jura, dokâ, se oter la dovrî ke l'î fabrikada lû, merâ be dagla amô a lû, e mia a 'l Salumû, me dige! Diga dokâ a 'l sjur Cezer kel ke l'ê roba so de lû... e diga perô a 'l Siñûr Dio nost kel ke a lû sul mê daga! Ke l'sarês po mia... de fa fo i profêc manmâ ke m'ne manda! —.

...E ñe kela olta lê i g'â riâd a faga o' zgambêt denâc a töc; po, in pjö, restâc lâ a lur kompân de tace bakalâ per kel ke l'îa dic sô lû, a i â pjö ñe bofâd!

A i s'ê fac inâc, ihura, dei sadüsč, de kei ke diz isč “makê resüresjû e resüregjû!”, e i g'â köntâd sô lur ôna bela parâbola, a sent lûr: — Sènt impö ke, te, maestro. Te l'set be poa te ke 'l Mozê a noter a l'm'â komandâd “se ü l'mör... ke l'lasa ke la so moër senza scec, ol so fradêl de lû l'ge toka spuzâ la êdoa, po daga lû dei scec a 'l so fradêl”. E jura, dokâ... a g'êra ôna olta set fradei. Ol prim... a l's'ê spuzâd, e l'ê a mort senza scec. E dokâ, le i a tö per moër ol segönd fradêl, ke l'fa la so strada del prim: e, per fala kôrta, la leanda la fenês fo kon kel d'i set, adoma perkê fradei a n'n'ê pjö, poereta a le: ke a la finfi l'ê po morta a le e paceamen, a m'digerês. Senokê, 'sta santa dona, kuand ke i morc i... resüsiterês, e... sarêselâ po la so moër de ki, in fi d'i könc, a, te? —.

A i â lasâc tra 'l fjat töc kontêc, po l'ê partîd lû:

— Se po sön kesto g'î dei dôbe, ke resüresjû ge sarâ... indî 'mpo a lezem sô be lâ, 'ndokê 'l Mozê l'â tekâd bega koi spi 'n fjame k'i 'ndaa mia 'n sender... po lâ 'ndokê g'ê skriîd zo car: “ol Siñûr Dio l'ê ol Dio Padrû del Abrâm, ol Dio del Izâk, po ol Dio del Gakôb!” “A l'ê”, mia “a l'êra”: Lû l'ê amô e l'sarâ semper kel; ma poa l'Abrâm “a l'ê”... e poa l'Izâk e 'l Gakôb “a i ê”: mia “poerêc a lur, a i ê stac, a i êra!” Dio de iv, dokâ, êkola, prope, e mia de morc isvanîc, ol nost! Dio de zet ke per la so potensa de Lû la g'ê amô, e prope per vês resüsîtâc a 'l so tep! Dige be, me... o zbałe me e la zbala la Bibja... e oter se camî a vânera “scec de l'Abrâm”: scec de tace morc e negöt de pjö; anse, morc ke kamini, nasîc adoma per fjölâ e per mör, e pader de ki, de kozê, mei ñe d'i sas, a, k'i krepa mia, lur!? Po, se 'ngürî prope de îga pjö negöt a ke fa kol Kreadûr, dapo la osta kômoda spasezada, ne... spuzâc o mia! A, gran Siñûr del Abrâm... pjetâ

de kei sapjentû ke, k'i tō 'n gir mia 'doma 'l Mozê e la so lege... ma la to sapjensa de Kreadûr e ke ta fet töt nōv: adoma perkê i ge ria mia lur a 'ndüinâ te ferêt komê... i te komanda lur a Te, za ke t'ê sbaîâd òna olta a fa sō la dona... i te komanda dapo morc lur basta... de fai pjō griñâ! —

[...A tō moer e a maridâs... l'ê roba adoma de 'sto mond ke isê komê l'ê adês! Ma, ki ke pensa be de 'l mond komê ke l'sarâ dapo la resüresjû d'i morc... a l'kapês a benone ke l'sarâ pjō ñe post ñe tep de met sō famea po ü ês so adoma de kel oter! Gê sarâ pjō de mör dapo... e pjō ñe küestjû de padrû eredetâ gelözee e koreñ e ki ke komanda in ka e ki no... per tōc kei ke 'l Dio Grand a l'sirkerâ fo per la so resüresjû! A l'sarâ a la so manera d'i ângei... e mia d'i sunî o d'i plok! Ma per voter ... "ângei" ...l'ê òn'otra d'i bale del me nono, ne?!]

Kömbinaşjû... g'êra lâ aprōv a dei duturû, ke i se usmaa mia tat koi sadüsê: e g'ê parîd mia ira de kasagla gösta, òna olta tat, a kei brōc eretek lâ: — Brao... te, maestro! A t'êt ñak parlâd be! — E söbet dapo i se sarâ a piâc la lengua. Tat a l'ê, ke negû de kei ke g'êra lâ i g'â pjō üd fidek de faga amô ü kuak tranêl... a so pro de lû!

Senokê, l'sömeaa ke l'g'ês capâd göst lû, adês! E isê l'ge fa, lû:

— Kom'êla, po, ke s'diz isê ke 'l mesia l'ê “ü scet del David”, a... oter? Indel so salm, a l'ê 'l re David in persuna a di sō “ol Dio Sura Töc... a l'g'â dic isê, a 'l me [sjûr] Padrû: sêntes zo ke a la me dreca, te... ke me te meterō sota i to pe kompân d'ü zgabêl tōc i to aersare”... Mia ira? Ol re David dokâ, a l'cama “so padrû”, so siñûr amô, poa ol mesia, e mia adoma 'l Dio Grand del cel... E jura, dokâ, pôderâl vês “so siñûr e padrû” akâ ü d'i so seec de lec... a: ü scet, padrû del so pader? Parlel de ki ol re profêt David indêl so salm? Parlel a fa po... se l'ge sarâ ne pjō, lû, dapo? E 'sto scet, saresel po “padrû”... de tata polver gulada vja? — ...Laûr de 'ndresaga 'mpe i kiei sō 'l ko a i pelâc!

I staa lâ tōc a skoltâl a boka erta. E lû l'g'â dic isê a i so: — Stîm a la larga d'i sapjentû, oter! Kei lê, per î stödjàd ü per de añ i so brae legi e legine, po saile ultâ e pirlâ... ge pjaz trop a spasezâ koi so pedân bei long, i brama de ês rierîc fo 'n pjasa e i posc de-

nâc in sala dutrina e i prim posc a i bankêc... I fa sô tate orasjû pjô fenide, adoma de fas ved, po... 'ntat i ge strepa vja a i êdoe poa kel pukî ke g'ê restâd tekâd de la eta! Zet isê... i sarâ tratâc ñak dÿramênt, indel so de del gôdese del mond! Ve l'dige me —.

Po... oter.

KO (V)INTÛ: MONEDINE — FI DEL MOND

E, 'ndel vardâs aturen, l'â est lâ de kei k'i bôtaa det i so oferte rumuruze 'ndei kasete del Dom, e ôna pôera êdoe ke la ge bôtaa det du kuartrî, 'nde kela d'i oferte lîbere: impô mager, ne, se la ùlia diolte fa ü depozet, de sköd ol so pro: ma le la faa prope oferta de kôr, eko. E 'tura lü l'â dic isê:

— Ve l'dige me, e l'ê ira: kela êdoe lë, poereta kome l'ê, l'â ofrîd de pjô le de töc i oter! Töc kei oter lâ defati i â metîd det de oferta ôna braka de solc de töc kei ke ge ansa zemô... ma kela fumñî lë invece, inde' so mizerja, l'â metîd det kel ke ge okoria amô a le per kampâ. E dokâ, kapila, se si bu: l'ê mia 'l piz del or ke kônta, a daga a 'l Siñûr... ma l'ê 'l piz del kôr! —.

Po, sikome ke tace i kôntaa sô de 'l Dom, e kuat ke l'éra bel, e i so prede ezagerade, e i presjuze “petisjû de grasja” e “grasja riseida” k'i a imbelia sô... a l'g'â dic isê, lü:

— A l'rierâ 'l de, ve dige, ke töt kel isplendûr ke ke amirî... a i a skonkuaserâ sô töt, e l'resterâ ke ñe ôna preda dreca suer l'otra! —. E jura i a 'nterogaa, 'ntre l'istremîs e 'l krêdega mia: — Ö lâ, maestro, ma dà! E saresel kuando... e me l'kapeserâ de kozê po, ke 'l Siñûr a l'laserês söcêd ü laûr del gener... e!? —. E l'g'â respondîd isê:

— Stî atênc, de fas mia imbrojâ, oter! A n'nê eñerâ fo tace asê k'i se farâ inâc kol me nom de me, e i ve digerâ “so amô me, ke v'ÿe dic isê e isê, o no, e adês a l'ê prope ura”. Stî atênc e 'ndiga mia dre, oter! Po... ïiga mia trop pura, oter, kuando ke senterî a di de quere e reölÿsjû. Töc laûr ke g'â de söcêd, ekol: ma... a l'völ mia di oñe olta ke la rie

po sôbet delbû la fî del mond! Per kela, öö... a n'n'ê amô isč, de tep: kela, i a l'sa adoma ol Kreadûr, kuando e komê. Per kela... prima, ôna zet la se reulterâ kontra òn'otra zet e ü reâm kontra ün oter... po ge sarâ teremôc a despertôt e karestea e pest amô ...e tace laûr in cel komê señai, de stremîs asč. E i darâ fo i so señai ol sul e la lûna e po i stele, e in tera terûr de zet izbatide, sõi ke se derv fo e mar ke e fo... e omeñ konsâc lâ senza pjô forse ñe fjat... a spetâ adoma kel ke g'ã de söcêd... kol cel töt iskonkuasâd sô. E ațura sč... i vederâ a riâ zo söndü neolû o' "scet de om" del Dañêl... pje de potensa e de splendûr de banda de 'l Siñûr! Ma, prima de tîc kei laûr lě, oter... i ve brankerâ de svjolensa ü per ü, e i ve malmenerâ, i ve porterâ 'ndi so prezû d'i prec e d'i soldâc... e i ve farâ tace procês in trebünâl denâc a kapi e re. Töt, perkê [isč] porterî aturen ol me nom! E jura sč... ke g'ïvrî aze de testemoñâm, e l'sarâ töt a ost pro deante a 'l Siñûr. Teñî zemô per sigûr, perô: g'ïvrî mai de preokupâs, koze g'ïvrî de kôntâ sô per difen-des: ke me 'n persuna ve dorô lengua e kôr, isč ke i pôderâ ñe kontradîv ñe teñev ko nisû. Sirî tradîc e endîc infina a de pader mader fradei parêc e amîz... e n'ne sarâ ko-pâc fo asč, desprenzâc e maledîc per ol me nom de me k'i se porterâ dre, lur, pjô tat amô de kel del Abrâm! Ma oter a l'si zemô ke ñe ü kiêl a l've sarâ strepâd fo invâ(-no)... ñe ü senza premjo! Perdî mai la osta braa pasjensa e speransa fedêl, oter: e se salverî per la eta! A kel momênt lâ, dresîs impê e arsi sô 'l ko: la osta liberajû la sarâ riada, abekê 'ntre tace bröc laûr de ed! Ma prima perô, kuand ke dokâ ederî la nosta povra Gerüzalêm cirkondada de soldâc e makinare... jura, êkola, kapeserî ke la so marsa mizerja l'ê riada. Ki ke l'ê 'n Gödea, a kel tep lâ l'iskape sô per i muc; ki ke l'ê 'n sitâ l'iskape deluntâ; e ki ke l'ê fo 'ndi kap a l'turne ñe 'ndre: ke, i sarâ de de macêl... finakê l'sarâ söcedîd delbû töt kel ke l'ê stac iskriîd zo per söcêd! Guai a i fomne ke speta, in kei de lâ, e guai a kele ke laca: ke, ôlteme a skapâ, i sarâ i prime a fan det i speze de la rabja bestjâl kontra la nosta zet! I n'ne 'nfilserâ sô a miêr sô i so zbade, i n'ne porterâ vja 'n kadene a servî per töt ol mond... e la Kapitâl, le ke la se 'nkredia la skaña dora e santa del Siñûr del mond... la sarâ pestada sô de tîc i pagâ del mond...

finakê ge sarâ dac ol so tep ak a lur —. E dapo ü momênt long komê la fam, a l'g'ă dic isê a töc lâ amô zbjankâc: — Ardi 'l fig, po töte i otre pjante. Kuand ke edî k'i böta, oter pensî zemô a la stagû d'i so fröc, mia ira? E isê, êkola, kuand ke ederî a söcêd kei laûr lâ... a l'sivrî ke l'ê 'l so tep del Dio de eñ fo in gödese! Ve l'dige me, e l'ê ira: la pa-serâ mia vja töta kela generasjû ke de 'nkö, prima ke töt a l'söcede. Teñi be a met: a l'sarâ skancelâd vja ol cel e poa la tera, pötöst ke i me parole! E 'ntat... stî atênc a negâ mia det indi pjasêr o 'ndi afare o 'ndel vi, ke l've borle mia adôs kel de lâ a l'impreesta. Perkê ve dige, l'sarâ kompân de la so braa mola ke skata det indi trâpole, per töc kei ke g'ê a 'l mond. Stî pronc, dokâ, e pregi tötura, per vîga la grasja de skampaga a töc kei bröc laûr ke g'ă de eñ... e per komparî in bu stato denâc a 'l vost brao gödese —.

Oter, êkola. Deldê l'predikaa 'ndel Dom, e denôc a l'indaa fo de sitâ, a l'arja erta sô sô 'l “mut d'i ülie” 'ndoke i pasaa fo la noc a pregâ e posâ i pelegri poerêc, kei senza mezo de pagâ stanse a fec. Ma zemô de matina bunura l'éra zo a 'l Dom, e g'éra a sô-bet lâ tata zet per iskoltâl, e 'n tace i sirkaa a semper adoma prope lü.

KO (V)INTEDÛ : SENAKOL — ĜAL DE PĜERO

La se faa sota uramai la so festa d'i Pa e dela Paskua, pa del dulûr e dela partensa: i kapi d'i prec e d'i duturû i g'ïa fresa de troâ kome fa fenî fo la so leanda de lü; perô i g'ïa a semper impö pura dela zet. E 'tura, ol djaol kapo... l'ge s'ê metîd in korp a 'l Gü-da, o' Skarjôt, ü d'i dudez! E isê l'ê 'ndac lâ ñe pjö ñe meno a metes dekorde koi kapi e koi so guardje, sô la manera de faga met adôs i ma a 'l Gezû senza perikol. A i ê ñak istâc kontêc, kei lâ, e i ä decidîd akâ de pagâl. G'ê 'ndac be ol so prese, e de jura l'sir-kaa la so buna okazjû per dagel indimâ a lur senza tra de mez la zet.

A l'ria, dokâ, 'nde setimana d'i pa senza leât, pa del dulûr e de partî, ol de kuando ke g'ê de paregâ ol añêl per la Paskua.

Ol Gezû l'manda lâ 'l Gûda a 'l Dom per l'añêl, e l'manda inâc ol Pjero e 'l Goân a troaga ü post de fa de sena. I ge domanda 'ndo l'völ senâ, e lü l'ge diz isê:

— Kom'a rierî det in sitâ, 'ntre tate done kondöna broka de akua sö 'l ko... l've eñerâ 'nkontra ün om kondöna broka 'ndi ma: oter indiga dre, e riâc a kela ka lâ 'ndokê l'in-darâ de det, lâ oter du ge digerî isê a 'l so padrû, ke so za dekorde: “Ol maestro l'völ saî 'ndo te g'êt la stansa per faga majâ l'añêl koi so amîz”. E lü l've farâ ed ü stansû sö de sura, pront per sentâs zo a tâola: lâ oter paregerî a pontî — .

Lur du i va inâc e i troa kompân ke l'ÿa dic lü, e i prepara zo per be de sena.

Isê, kuand ke l'ê sira, i so amîz e lü, riâc insâ per öna stradela men pestulada e men sota guardja, i se met a tâola. E l'se 'nvia a diga sö, lü (a i ê metîc bei komoc: de tat tep oramai la fünsjû l'éra mia pjö “töta in pe”):

— Ö bramâd asê de fa kela sena ke de Paskua kon voter... prima de 'l me patî e de 'l me partî ke me toka... e ve dige ke ñe diznerö ñe senerö pjö, dapo, finakê forö la me, de Paskua, indel reñ! — .

Po, fac fo ü falî de i e leâd ol prim kalez del ceremoñâl... a l'pasa fo de töc, ü per ü, kol fjâsk... po l'rend grasje a 'l cel e l'ge diz isê, a lur:

— Capî 'ndi ma 'l vost bicêr poa töc voter kon me. Ve dige me, ke l'ê l'ölte ma olta ke bie ke ergöt de bu, e ke bierö ñe pjö negöt de la festa, dapo... finakê ovrö fac la me Paskua del reñ! — .

E po, töld sö ü pa, a l'rend grasje, a n'ne tö zo ü torsêl, po l'pasa a dagen ü bukû per ü po a lur: — E [kompân de] kel pa ke l'ê 'l me korp... ke poa me sorö könsömâd töt per voter... e dapo firî isê poa oter: könsömerî 'l pa 'ntra de oter kompân de me adês kon voter... per regordâs de me kom'a s'regorda la Paskua; per regordâs kel ke ö fac me per voter... e regordaga a 'l me pader in cel ki ke si oter per me, e per Lü — .

[Me dige... ke l'â fac akâ riferimênt a kuando ke poa lur i sarês istâc iscepâc sö kompân de 'l pa, a so tep. Po, me krede, de sigÿr l'avrâ a dic “kompân de kel poer añelî ke”: perö, sikome ke skanâ e sakrefikâ animai a l'ê restâd amô per tat abetüdena de

ebrě e de pagâ, e ke l'sarês istâc a ü laür mia bel de sömeâ de fa stes d'i oter, e in pjö, karisjûz per tace poerêc, po skomod per restâ skundíc... i vangelište i ä lasâd fo; ke i prim krestjâ i ä po dezmetíd prest de “fa sakrefese” a kela manera lâ. Karagrassja, ol Gezû l'ä sirkad fo ü majâ e ü biv de pace e de festa, senza pjö kopâ, ñe brüzâ. A be, dà: amô amô, brüzâ l'incêns? Él magare posibol ke l'völês di “maerö pjö añêl ña bie-rö pjö i, dre ai ritöai d'i pader lâ indel Gito; e ñe oter, po: ke adês a 'ndo me a fala... la paskua gösta per la nöitâ del nost brao reñ! E dapo, l'sarâ töt ün oter bankêt”... a?]

E a 'l so momênt de l'öltema d'i libasjû ritüai, de 'l so post, kol kalez arsâd sö, a l'diz isě: — Buna: kon kel öltem kalez ke benedêt, a firme 'l me pato kol Dio Pader Sant per salvâv voter: e per voter a l'bierö, abě ke l'ê 'l me sang. Ke defati... a l'maja e l'biv ke kon me kel ke l'm'â zemô a endíd, a piz de kavri de skanâ... E isě, l'ê ura de part, per o' scet de om mesia, prope kompâñ ke g'ê stac fisâd e l'ê skriíd zo: salm sentedês. Ma... guai a lü, kel poer om... ke l'ê dre a part... per tradî! —

E i dudez ałura a domandâs ki ke l'ävřês mai püdíd fa ü laür del gener... ü de lur magare!, e a gürâ ü per ü “me, ñe mort!”. Po, la desküsjû la s'ê ultada sö 'l parër ki ke de lur a l'sarês istâc ol pjö importânt, a so tep. E 'l Gezû:

— I re e kei ke goerna la zet, i komanda lur... e i se fa camâ a benefatûr! Mia isě per voter, perô! Intrâ de oter, ol pjö importânt... a l'see kompâñ del pjö simplicôt, e kel ke ge toka komandâ a l'see kompâñ de kel ke ge toka e l'ê bu adoma de servî. Sarâl ki ol pjö importânt, e? Kel servîd a tâola... o kel ke i a servês? Mia döbe: kel servîd! E adês ...ardim a me, oter: soi mia ke a me a servîv voter, a tâola, e: öi mia tilíd servîv me? —

[E ke m'se rinkörâ a noter ke la manka la so bela laanda d'i pe e ke l'g'â de ês zemô partíd ol tradidûr.]

E dapo ü momentî: — A sě... oter si kei ke me si restâc amîz in tate proe, finadês. E me, dokâ... so dre prope a preparâv ü post indel reñ, isě kompâñ ke 'l Pader Siñûr Sant a l'l'â preparâd a per me. E ve l'dige me: oter sirî amô sentâc zo isě, a la me tâola per ol reñ senza fi. E sirî sentâc zo 'n tace skrañ dor, per güdikâm a tôte i trebŭ del Eadraěl.

Ma skoltîm be, oter, ke... sirî po tîc prima pasâc 'ndel kriêl kompân de 'l formêt: ke-sto... l'g'ê stac koncedîd a 'l djaol. Ma me ò pregâd tat per voter... akâ per te, Simû, ne ...ke restigev mai senza fidüca! E te, Simû... kuand ke te sérêt amô a seîh... fâga forsa a i to fradei! —

Ol Simû ilura l'ge diz isê: — Aa, me, kon te... so pront akâ a eîh in prezû... e po a fas kopâ, per te, me! — Ma 'l Gezû a lü:

— A... Simû... ke gran bela preda ke te set! E, per fabrikâ... a me me pjâz prope dei prede isê — [O m'völei kê magare l'âbe dic “i ma toka, poerêt a me!”?] — Ma... te dige me ke stanôc istesa a 'l kanterâ mia gal... prima ke te per tre olte te faget aparî ñe de koñosem, me! — E dapo ü momentî, a tîc lâ amô senza fjat:

— V'él mai mankâd vergôt... kele olte ke v'ò mandâd in gir senza bursî, senza sak e senza dope sândai, e? Ira: negôt! Ma staolta, [me l'so ke] ki ke g'â òna borsa i a töerâ dre, e poa 'l borselî; e ki ke l'g'â mia òna zbada, l'venderês fo a l'mantêl per krompân òna. A, sê... l'ê uramai ke per söcedîm prope a me kompân ke g'ê skriîd zo “a i ä kôn-tâd det insêm a i lader e a i bandic!” A m's'ê prope dre a fênila fo... isê komê la me toka — E kei lâ: — Tè, àda ke: ke do zbade, a la bizoña, i g'ê zemô ke, tekade vja! —

Ma lü: — Sê, sê: i ê asê, e n'ne ansa ak, cêrtoza! Kele lë... i me salva de sigür! Dèm... dèm dokâ, adês! — E leâc sö, po eñic de fo, i s'ê 'nviâc a 'l solet insö per ol “mut d'i ülie”, lü kon tîc i so de dre. [Tîc meno ü, ke l'se faa prope mia problêm ñe de tö zbada, ñe de kapî se 'l Gezû l'éra pjö tat sö 'l tö 'mpo 'n gir... o sö la delüzjû... o sö 'l preokupâd... indel regordaga i so bei tep e pensaga a kei ke 'nvece rîaa... Oter.]

Riâd lâ sö 'l post, a l'ge diz: — E adês, pregi poa oter, per vês forc e rezistî —

Isluntanâd de lur ü kuak pas e 'ngünikâd zo, a l'prega: — O Pader... se te te ôlet... tîm vja kel kalez ke de biv, kela proa ke isê düra. Perô ne, mia kel ke ôle me! Te l'set te kome te ôlet, e isê amen, a l'ê 'l nost be! — E... g'ê lâ ün angel de 'l cel... a teñel sö de morâl, ke lü l'va aderitüra in angonea!, e l'prega pjö capâd amô, po l'süda a grondenû, infina a sang, iskuaze tîc ü sang del naz!

[Töc laür dokâ ke ergũ akâ 'ndormët a l'ã est e l'm'ã köntâd sö...]

Po, delê 'mpo a l'lea sö e l'va lã d'i so: e i a troa lã 'ndormentâc, ki pjö ki meno, e per ol majâ e biv de la festa, e per l'ura, e per la pura... ke i ge kapës det negöt de negota, ñe i ed ol bandol, per öna festa de Paskua (ön'otra Paskua, anse, töc isë 'lluntâ de ka, e kon ñe ü [in] skarsela, dapo i speze dela sena, i oferte a 'l Dom e 'mpo de karitâ a ü per de poerêc lã de fo. Ma... oter)! E l'ge diz isë:

— Kozê fi: dörmî, po? Sö bei desc! E pregî... o poerêc a oter, a la proa ke ria! —

L'ê dre amô a parlâ, ke l've 'nsã ü skuadrû de zet. A g'ê denâc a töc ol so Gûda, ü d'i duede (a l'dormia mia, lû: l'éra stac ligër a tâola), e l'ge se fa apröv a 'l Gezû... per bazâl sö! E 'l Gezû a lû: — Aa, Gûda, amîz! Me bazereset sö... per vendem!?! —

E kei otr'öndez apena i ge ria a 'ntûf ergöt... i salta 'mpe e i ge fa: — A... el adês... ke i okör i zbade, e, kapo? —. E ü l'mena lã öna tîga, de pjat menomâl, a l'orega dreca d'ü servidûr del kapo d'i prec, ke se l'éra de tai adio ko sö i spale!

Ma 'l Gezû l'fa pront: — Ma basta, lè! —. Po l'ge toka la so orega a kel lã zo 'n tera... e l'ê in pe bel e guarîd (perô a nisũ l'ge fa ñe 'mpo efêt: laür de töc i de! Oter).

Po, 'l Gezû l'ge fa a i prec e a i so guardje e a kei oter kapi eñic insã a töl:

— A si eñic insã koi zbade e koi bastû... kompân de îga de brakâ ü delinkuênt ke skapa! Ma... s'ére mia lã töc i de 'ndel Dom kon voter? E lã... m'ÿ mia portâd ivjâ, e! Cêrtoza, l'ê gösto kesta ke l'ura gösta per voter: ol fond del fosk... a l've fa forc, prope, eko, oter! —. E jura, dapo ke i l'ã capâd e ligâd sö... a i ã portâd ivjâ, e i ã fac indâ de det indela so ka del kapo d'i prec.

Ol Simû Pjero l'ge 'ndaa dre apena 'mpo deluntâ. Det indela kort, g'éra impiâd sö 'l fög e i ge staa aturen in tace, e poa 'l Pjero l's'ê kucâd zo koi oter. Öna serventa (...se fâela po amô aturen a 'st'ura, in mez a tace omasû, impö a biñc?!) a i ã est, lã 'n banda a 'l fög... la g'ã ardâd be sö 'l müz, po la g'ã dic isë: — Aa... te set a te u de kei lã de kel lã, e!?! —. Ma 'l Pjero... l'g'ã respondîd de no, prope no! E delê 'mpunî, poa ün oter a l'g'ã dic isë, a edel lã: — Ma sê, te set prope ü de kei lã, te! — E 'l Pjero amô “noo, ñe

per insôn, po"! Pasâd fo ün'ureta, ün oter a l'ge da amô: — Per me l'ê ira: kesto ke l'é-ra lâ kon kel lâ... Defati, a l'parla galelë... — E 'l Pjero amô ôna olta: — Oë, a te, ma... set dre a köntâ sô kozê po, te... Me, so prope negôt de kel ke te diget te... me! —

A l'éra dre amô a barbotâ... ke l'ă kantâd ü gal! E 'l Gezû, ke l'éra mia tat deluntâ, a l's'ê ultâd e l'g'ă ardâd ilâ drec a 'l so Pjero: e 'l poer Pjero oter ke preda... l's'ê regor-dâd precîz kel ke 'l Gezû l'g'ia dic “a l'kanterâ mia 'l gal, prima ke te te m'ăbjet ri-negâd tre olte, tel!”: e staolta, skapâd fo de lâ... a 'l s'ê metîd dre a pjanz amâr.

E lâ a dez menûc de strada... poa ün oter a l'fenia de pjanz, indôn'otra manera: tekâd ivjâ, poer diaol a lü (poer krist): djorsâ [dio l'sa] se adoma disperâd, o 'mpo a pentîd e penitênt. Oter. Förtüna... o mei: kara grasja, ol gal a l'kanterâ poa 'l de gôst e benedêt.

Intât, lâ de det, i omeñ k'i ge faa la guardja a 'l Gezû, i a skersaa, i a pikaa, i ge ben-daa sô i ôg po i ge domandaa “indüîna, a: ki ke t'ă pikâd det, e?” ; e zo a insöltâl, in-sêm a ü muntû de fatöade.

Apena ke l's'ê scarîd fo, töc i kapurjû d'i tri klas, polîtika sköla e religû, i s'ê reünîc töc insema e dapo, töc dekorde, a i ă portâd lâ a 'l so trebünâl güdë e i g'ă dic isë:

— Se te set prope te 'l mesia... fâmel kapî ak a noter... de sae! — Ma 'l Gezû:

— Kualsëaze laûr ke ve dige me, oter me kredî mai! E se po ergota ve domande... me respondî ñak. E jura sentî kesto, ke l'ê Bibja, e l'ê dre a kömpîs: “scet de la so potensa del Siñûr, a l'vederî lâ a 'l so post, a ma dreca de la potensa del Siñûr!” — E lur a röda: — E magare te sareset po prope te... kel iscêt lâ del Dio Sant, glôrea a lü, e? —

E jura lü: — A me me par ke fi töt oter a ost komod; po l'ê ñe zbaîfâd, a di isë: e oter adês a l'fi deentâ ira! Adês l'ê pjö ñe tep de câkole, ne? E prope oter ke m'ï apena... no-minâd Dio .

Tat k'i spetaa adoma kel... l'ê stac ol señâl, e i g'ă dac del bestemjadûr isfacâd:

— Ke bizôn a m'g'ăi amô de testemone uramai? M'l'ă sentîd töc be koi noste orege! — [...A i ă sentîd töt kel ke ge barbotaa 'n pansa a lur, mia la so uz de lü! Oter.]

KO (V)INTETRÎ : PELÂT — KALVARE

A i ê saltâc impě töc kompâñ de tate mole... e kon lü ligâd sö i s'ê inviâc ilâ per portagel lâ, a rüzû e zbotû, a 'l Pelât, apena riâd insă de Cezerea... de fala po fenida a rëgola. Lă de 'l Pelât perô, a l'vokoria oter ke ü “scet de Dio”, per faga firmâ (per ol româ l'éra scet de dio akâ 'l so imperadûr Teberjo: gösto kel brao omasêt, sê). E jura... daga a köntâ sö ke i l'ÿa troâd lâ tate olte a skoldâ sö la zet, e a diga de pagâ mia i tase a i româ, e ke 'l re l'éra lü... Ol Pelât a l'g'ă domandâ a 'l Gezû:

— Aa... e isê, omasî, ta sareset a te ü re d'i Güdê, e: de kei ke zboga fo ke kompâñ d'i s fons! Ma, sensa ne 'l föder d'öna zbadâ... ü re? —

E poa lü kom'a i kapi, ol Gezû l'g'ă respondîd: — Me... me par ke te set dre te a dil, kon kei skalmanâc lâ. Perô te te penset ergöt d'oter —

Ol Pelât, ke prope bambo l'éra mia, l'ê 'ndâc de fo, de la zet e d'i kapurjû, e l'g'ă dic isê: — Per me könt de me, me ge troe negöt, a kel omasî ke, de metel a mort —

Ma de lâ i ge daa det de pjö amô: — Àda ke l'te met la zet kontra a predikâ kompâñ de kel Gûda lâ ke trentâñ fa l'se reultaa de la G'alelea infina ke! —

Kuand ke ol Pelât l'ă sentîd isê, a l's'ê 'nfurmâd se l'éra delbû ü galelê; e jura, dato ke l'éra d'i bande 'ndokê l'komandaa ü falinî a l'Erôd, a l'ge l'fa portâ lâ a lü, ke per i feste in kei de l'ă l'éra gösto eñîd insă poa lü de Teberiad a Gerüzalêm.

Ol Erôd, a ed ol Gezû l'ê stac ñak kontêt, tat ke l'g'ÿa oja zemô de impö de edel, per (v)in sentîd a parlâ: e l'isperaa de edel a faga sö kuak mirâkoi, se mai a l'valia ergota de pjö de kel oter batezadûr (...turnâd viv?). E isê, l'g'ă dac det akâ lü, domande sura domande: ma 'l Gezû l'g'ă ñe mai dac de resposte. E 'ntat, kapi e kapeti ke g'éra lâ i g'la menaa amô koi so aküze stantide. Ma l'Erôd, koi so zgeri, l'ă fenîd kol töl adoma 'mpo 'n gir: a l'g'ă metid sö 'l mantêl ke ge 'ndaa be a lü, kel bjank d'i mac, po g'l'ă rispedit ilâ a 'l Pelât [...a töl in gir impö akâ lü “atênt te, ke 'l re so me... e kesto ke l'ê afare to”]: ke lü n'n'ÿa za ũd asê del ko del Goân, per dörmî pjö de noc. Ñe ge pasaa po

per ol so, de ko, de ĩga denâc... ü skampâd a 'l macêl de scetî ke l'ĭa urdenâd ol so pader, prima de mör. Oter]. Po, âda te... kei du lâ ke fin'a jer i se usmaa ñak... k'i se sarês ontera 'nvelenâc intrâ de lur e mandâd lâ la buna nõa a i so kapi de Roma... de jura i ê deentâc ak amîz (a be ke 'l bolpî l'ès mia ülfid töga fo i kasteñe de 'l fög a 'l... so söperjûr; perô l'g'ã teñid perbenî 'l sak poa lü)!

Ol Pelât, dokâ, turnâd a lü 'l balî... l'ã konvokâd amô 'n pĭasa (kuantemai!) zet e kapi de töte i kualetâ, e l'g'ã dic isê: — A m'ĩ portâd ke kel om ke... kompân se l'éra ü reolüsjunare... A l'õ 'ndagâd sota i osc ög... e g'ê rezültâd vira negöt de kel ke ga fi 'ntort. E po ñe 'l nost Eröd, ke m'l'ã mandâd ke amô a me, ñe lü i a troa perikulûz: a l'völ prope di ke l'ã kômbinâd negöt de meritâ de mör! E jura po, kontentiv: ga forö da õna kuak fröstade: se l'v'ã ofendîd... isê l'meterâ a post ol ko; po l'laserö 'nda —.

Per i so feste de Paskua de lur (la memorja de la so braa liberâsjû, õna olta vja de 'l Faraû) l'éra gôsto abitüâd a lasaga 'nda ergü de kei det in prezû. Ma kei lâ... majâd la foja, i s'ê metîc dre a skalmanâs töc insema: — Kesto ke sö 'n kruz... e fo ol Barâb! —.

Ol Barâb a l'éra det perkê l'ĭa kopâd ü, indõna meza rivulüsjû õna olta in sitâ. Ol Pelât perô, mia dekorde... pöntera [pjö o(le)ntera] l'preferia desliberaga fo ol Gezû...

Ma kei lâ amô: — In kruz Sö 'n kruz! —. Ol Pelât, per la tersa olta: — Ma... ke mal v'äl po fac, de mör in kruz!? Me g'õ troâd propjamenta negota... per mandâl a mort. V'õ dic isê ke l'forö fröstâ: ma dopo me toka lasâl indâ! —

Kei lâ de bas perô i uzaa sö semper pjö fort... e adês i faa 'mpo a pura, e i soldâc i se agitaa... Finakê 'l Pelât (ke a töte i manere l'g'ĭa za bel e parezâd, lü, per kei krapû lâ semper pronc a reultâs, tre bele kruz per söbet dapo 'l so festû de lur...) a l'ã cedîd: e l'ã firmâd la so kondana ke i ã pretendîd lur. Isê, per la karõtola (de 'mbunii sö) a l'g'ã lasâd liber ü d'i tri, kel maskalsû metîd det in prezû per revolüsjû e per ĩ kopâd, ñak; e per ol bastû (de fağa po ed be ki ke l'komandaa, lâ)... a l'g'ã mandâd a mör kel ke l'ĭa mai fac det ñe negöt de mal! E isê... 'ntra redikol e kreminâl patentâd, lâesen i ma, a la so manera ritüâl de lur lâ, e fas sö a lü la so braa neca griza 'nde storja [a'l'sa 'nkredia

po d'ĩ salvâd la faca e poa 'l post; mia per tat amô, perô: storja a kela. Oter].

Intât ke i a porta vja, i ferma ü tal Simû de Sirĉ, ke l'turnaa a ka d'i so kap... e i ge karga sô la kruz de portâ de dre a 'l Gezû. A g'ê dre a ü bordêl de zet, e ôna kuak done k'i fa lamênt per lü, e i pjânz [ôna konfratêrnita, o ergöne d'i so k'i l'ĩa sirkâd?]....

E 'l Gezû, ultâd invêrs de lure, l'ge diz isĉ:

— Aa... otre scete de Gerüzalêm... mader isnatürada koi profĉc! Löci mia per me, otre! G'ĩvrĩ asĉ de löcâ per votre e per i osc, de scec! Ke, êkola, a l'ria de kei de, ke s'digerâ isĉ kol profĉt “beade i pötaege, kele ke ñe scec i â fac ñe lac i â dac... per ol macêl!”. Ihura, la zet la digera “koline burlim adôs e muc sotrim!”: perkê se l've tratâd a kela manera ke ol leñ verd... sarâl po tratâd komê kel töt mars, e!? —

Riâc sô sô l'ispontû k'i ge dizia “ol krap, ol kraño, Kalvare”, lâ i â metîd in kruz ol Gezû, e po ü per amô de prezunĉr (du brigânc, ma forsâk impö a patriote: de faga ed a töt), ü a ma dreca, ü a mansina de lü. E 'l Gezû l'pregaa: — Ne, Pader: ârda de perdu-naga, te: ke... i sa po ñak kel k'i ê dre a fa e a fas... e tat de meno kel k'i ê dre a fam a me e a fat a te —. E i soldâc a i â trac a sort ki ke enzia i so du stras: Bibja, salm intedû!

La zet i staa lâ a ed. I kapurjû invece i â skersaa e i se dizia: — Tace d'oter a n'n'â salvâd... a s'sent a di: e adês dokâ se l'ê delbû lü ü meso del Siñûr... a l'se salve po lü, o no! Ke dapo kazomai... a l'me salverâ poa noter, a! —. [E, senza saîl, i lasaa fo del zög “Ergüdoter, sô de sura”... o almeno i rescaa mia de tral in bal trop de persuna, a s'se sa mai! Ma... oter.] Poa kuakdũ d'i soldâc a i a skersaa, e 'ntat i ge daa 'mpo de azît de biv, e i ge dizia: — Per vês ü re d'i Gödĉ... te fe prope mia bel vêd! Forsa dokâ: l'ê adês, ol to momênt... o pjö! —. G'éra sô defati sura 'l so ko ü kartêl, kon skriîd sura “Gezû Nazarĉ Re Güdĉ”. Ü d'i poer diastrasjâc ke i éra lâ 'n kruz a lur... dopo 'l so brao botî de fröstade poa lur... a i a 'ngörjaa akâ lü: — E 'lhura, a te poer djaol! Se te set ergü... ü krist ke al vergöt (ke val ergota)... sâlves te, po sâlvem a noter dokâ, adês: a m'sei [s'úi] mia ke a noter per ĩ laorâd per ol mesia, e? Ma ke m'se salva pjö... ke l'me salva pjö negü... ñe 'n tera ñe 'n cel! —.

I see po stac delbû 'mpõ a patriote, o mia... kel oter perô l'ge bajaa dre: — Sito, te: bestênja mia 'l mesia ke g'ã de riã! Po, se almên a mör te g'ë ü falí de timûr de Dio... préga: mia 'ngörjã ü ke l'ê ke 'n kruz kome te! E me e te, almeno, l'ê a gösta isë, ke per vês kastigãc... m'ã po be fac det vergõt! Ma lü ke, lü... l'ã ñe mai fac ergõt de mal! A, Siñûr Grand: se te capet det kel santôm ke... sèrem mia fo la porta söl müz a me pok de bu ke ge eñe vjadřë —. Po l'g'ã dic a 'l Gezû: — E te, profët... regórdes magare de noter poer dizgrassjãc ke 'nsem a te, a... indel to bêl post ke l'te speta, te! —.

[E dokã l'völ di ke n'n'ia sentíd a di ergõt a lü, de 'l so “reñ” del Gezû. Isë... per ü menüt ol Gezû l'g'ã üd a ü falí pjö car ol valûr de kel ke l'ge söcedia, e ke l'möria prope mia per ol pernegõt.] E 'l Gezû l'g'ã respondíd isë:

— Sigûr, te l'dige me: te te set gösto zemô de ke... in paradíz insêm a me! —.

E l'éra a la so braa resposta 'n finisjû ak a 'l diaol, ke l'sirkaa amô de fa borlã zo la kruz, indêl ved ke l'veñia ñemô mia zo lü. Ma, oter...

L'éra skuaze mezdë, e g'ê eñid fosk töt aturen, sô 'l mond: fin'a i tre t'avreset dic ke g'éra ñe pjö 'l sul in cel! Ol tendû del Dom a l's'ê strasãd sô indelmêz... ke kei de noter k'i sia komã ke l'éra fac i ävrês vest a dervís ol cel ke g'éra pitürãd sô sura... kompãñ se 'l Siñûr a l'veñia de fo (o se l'ga dervia fo l'ös del so tabernakol a ergû! O a töc, a la finfî, kol Gezû ke l'éra dre a riã sô!). Mai ñe söcedíd, prima... ergõt de 'l gener! Ma se l'könta sô amô a 'nkö, de testemone k'i koñôs ñak ol Gezû: öna bela skosa de teremôt l'avrä krepãd la trav indo' l'éra fisãd ol tendû...

Sô la so kruz, ol Gezû kon tötã la so uz l'ã pregãd isë: — O Pader... [me so semper istãc indei to ma... ö fac töt, ö dac töt... a m'g'ã riãd... e] adês so ke amô töt indi to ma! — [Skuaze kompãñ de di sô l'orasjû dela sira, o de salüdã la mama e 'l papã, adoma 'mpo surc. O... ke l'ge fes sentí be a tace surdi, lur lã... ke lü l'pregaa?]

Po, dic isë... l'éra a mort. Feníd de tra 'l fjat, feníd de bat ol kör: fenida la storja, t'avreset dic! [Ma isë po, lü l'turnaa delbû “a la ka del so Pader”... oter ke a 'l tep ke l's'éra fermãd lã a 'l Dom, a i so dudezãñ!]

Ol kapitâ d'i soldâc, a ed dei laûr kompân... a kuak manere ispirâd de 'l cel a lû l'â dic sô: "A, de sigûr... ûn om isê l'éra ûn om del dio!" — (ergû i âvrês po sentîd "a l'éra ü dio!" o almeno "ol so scet d'ü dio!"). Dic isê de ü pagâ... ke i a koñosia ñak, kel ke l'ïa fac in veta!). E poa tace de kei k'i i ña est kei fati lâ, uramai i turnaa a ka zbatîc a la granda, po i se n'dölia a 'mpo, a sirkâs ol perkê e 'l perkome (kuakdû de sigûr i se n'regorderâ po pjö innâc, de konvertîs, a la fi). A öna buna distansa (amô Bibja: salm 38) a i éra lâ a oservâ töt akâ dei so amîz k'i i g'éra 'ndac idrê de izî fin'a mia tat prima, po dei amîze ke g'éra eñide dre de la G'alelea fin'a Gertizalêm per i feste, fina a la so procesjû d'i "ozana!" (sedenô... m'i savrêsei komê töc kei laûr ke, e?); ma nisû e nisöne i sera kozê fa, oramai, e i se askaa ñekâ a 'ndaga lâ apröf a la kruz.

G'éra lâ poa ûn om, tal Gozep, ü del trebünâl söprêm, persuna deña, ke l'éra mia stac dekorde koi oter kapi, kel k'i i ña decidîd e fac. A l'éra de Rematea, öna sitâ d'i Güdê, e l'ispetaa 'l reñ del Dio Sant; e sikome ke l'ïa 'mpo koñosîd ol Gezû, e po kompân de 'l Tobî l'soportaa mia bandunâc i korp d'i santôm... a l'ga s'ê prezentâd lâ de 'l Pelât, po l'g'â sirkâd ol korp del Gezû. Ol proküradûr româ, impö a merveâd ke l'födês ñe ü parêt ñe ü amîz del mort, ma ü a 'mportânt in sitâ... a g'l'â dac.

A i ña trac zo de la so kruz [la sie staca faca sô prope per lû, o za dovrada... a i ña po lasada lâ sô; e la sarâ magare a eñida buna per vergû d'oter]; a i ña ultâd det indû lensö, po i ña metîd det indöna büza skaada det indela preda ia del mut, indokê g'éra ñemô mia stac metîd det negû [ke la see po staca la so, o öna fecada per l'okazjû]. Isê po, âda te: d'i bras del so pader in cel in bras a la so mader, indi bras a 'l so Gûda, imbrâs a la so kruz e de lâ 'mbras amô a so mader e a la so braa tomba; e per semper in bras amô a 'l so pader sô in cel! Ke isê, po, poa noter a m'pöl vîga mia trop terûr de la nosta, de kruz e de tomba, dolo la so de lû, êkola! Oter.

A l'fenia 'l de aante la Paskua, e l'se 'nviaa zemô ol so sabat sant... I fomne eñide 'nsâ de la G'alelea kol Gezû i g'ê 'ndace dre a 'l Gozep, i ña est la büza e i ña est a metî det ol Gezû: i g'â dic grasje a 'l Gozep, po, a büza serada fo be, saludâd e sigürâd k'i sarês

veñide lure pusdomâ a kürâ pjö be 'l korp... a i ê turnade zo 'n sitâ, a preparâ önguênc e pröföm, koi so brae lanterne 'mpiade; tat, impostade sö kol mort, i püdia pjö majâ l'añelî, per kela paskua lä (fo ke i ès fac prima, 'nsem a i so amîz del Gezû det lä 'ndel senakol: ke jura i pensaa “a m'g'ävrâ mia tep per la ceremoña, domâ... e a paskua l'me söcederâ be ergöt de gros, a töc noter!”). Po, kompân ke g'ê preskriid a 'l sabat, a i ä posäd. I s'ê pjö müic negü, perkê l'éra deluntâ, e perkê s'püdia mia fa dei mestër.

D'altronde, i ävrês a troäd lä i guardje.

Ke isê po, fac a pontí töt kel ke l'g'éra stac sirkäd, poa 'l Gezû l'ä posäd.

KO (V)INTEKUATER : A LA TOMBA — ASENSJÛ

Ma... ol prim de indillaûr [*in de de laorâ*] de la so setimana de lur, dapo 'l sabat, söbet matina bunura i s'ê portade 'là a la tomba, koi so laûr k'i ia za preparäd per benî. E... i ä troäd lä zemô spostada la preda ke prima la seraa fo la büza: ma 'ndace de det... a i ä mia troäd lä ol so korp del Gezû! A i éra lä sensa saî koz'i g'ïa de fa... a rendes könt e a das öna rezû... e g'ê komparîd lä du omeñ, koi estíc k'i berlüzia töc. Lure, stremide, i físaä zo 'n tera koi ma denâc a i ög. E jura i du omeñ (de sigür, mai pjö i soldâc de guardja: pöldâs... ol Mozê e l'Elí?) i g'ä po dic issê: — Siñî pör det be, otre, de brae! Koze sigetî a ardâ 'n tera... sirkî a fa, po, ke 'n mez a kei ke dörma, ü ke l'ê bel dezd ön'otra olta? Merâ pjötöst turnâ fo 'n mez a i viv, per sirkâ ü ke l'éra mort! A l'ê pjö ke, lü: l'ê resüsität! Él mia öna eta... ke l've dizia, zemô de 'lura lä 'n Gålelea, “a l'ê necesare ke 'l mesia l'ge eñe metîd indimâ a i farabuti, a l'see metîd sö 'n kruz, e a 'l so ters de l'turne amô iv”!? Sarala öna nöitâ, öna stramberea, adês? —

E i s'ê po regordade, sigür, d'i so parole de lü... e ke l'köntaa sö 'nfin'a ke l'éra nasîd det indöna korna büza; e adês dokâ, d'öna büza l'éra nasîd amô, resüsität!

E turnade zo 'n sitâ, töte kontete i g'ä po köntäd sö töt a i öndez, e a töc i oter k'i se

troaa lă 'nsema. Prope: la Marjana de Mâdela, la Goana, la Mari de Gakom e i otre fomme ke g'éra lă kon lure, i g'l'ă köntâd sô a i apôstoi e a la so mama del Gezû.

Perô, m'se 'nkrederâ mia diolte ke töc i ă po tölda sô per buna, ne, la nôa! Töcimanere, 'l Pjero (ke fin'a mia tat prima l'éra dre amô a löcâ de ergoña) l'ê saltâd sô e l'ê kurîd lă a la tomba, e l'ê 'ndac de det, e l'ă est lă adoma i so bende de lü, töte be a 'l so post del ko e d'i gambe e del böst, ma... öde: i fasaa sô pjö negota! Po, dapo, l'ă giroagâd ü falinî 'nsö e 'nzo per la sitâ, a sent a s'köntaa sô kozê... prima de turnâ lă koi oter amô: e l'ê ñak restâd... per kel ke l'ia est... e per kel ke poa lü l'ia mia est. ...Po, oter.

Kel de lă amô, dapo, du de lur i éra partîc söbet dapo 'ste storje lă de done; e prima de ed a turnâ 'ndre 'l Pjero (ma... spetâl a fa, per kozê, po?) i éra lă per la vja k'i 'ndaa fo a Êmaus, ü paîz lă a sul ke ü per de ure de Gerüzalêm; e i parlaa 'ntra de lur de töt kel ke g'éra söcedîd. E 'ntat k'i deskoria e i deskötia... l'ge s'ê metîd in banda 'l Gezû... e l'kaminaa 'nsem kon lur. Perô, lur a i ă ñe koñosîd: o i g'ia sô do bele kröste sô i ög, o ke lur du i a konosia ñemô mia de persuna, o sedenô lü l'ge sömeaa mia trop amô a kel de prima. Oter.

E lü l'g'ă dic isê: — Si dre a köntâ sô kozê, po, de bel o mia, e? —

Ałura i s'ê fermâc. E ü d'i du, ke l'se camaa ol Kleop, a l'g'ă dic isê:

— To se po isê forêst adoma te... fo ke a la kapetâl, a... de saê miga kel k'a g'ê söcedîd estâ semana, ke? — A l'g'ă domandâd: — E kozê... dokâ? — I g'ă respondîd:

— La storja 'kkel Gezû lă... kel fo 'nNâzaret, k'a l'éra ü profêt fort a parole e a fati... deante a 'l Dio Siñûr e a töt ol mond; e komâ e kapi d'e prec e kei oter kapi e l'l'ă po enzida amô lur a staölta, e e l'l'ă capâd e tradîd, per fal kondanâ a mort, po e l'l'ă a menât iffô e metîd sô sô 'ndöna kruz! Notre... m'ga speraa daldebû k'a l'fös lü kel k'a l'ga tokaa dezleberâ fo ol Ezdraël! Ma 'nkö, l'ê dre a pasâ fo a 'l so brao ters de uramai, dopo k'a l'g'ê kapitâd kei laür lě. Otro ka kel ka l'disia lü diölte “tre de po turne 'ndre”: uramai, kuak ure... po l'sarâ sul ke ö kadaer e basta, e ña 'l Siñûr... 'nfena kazomai a 'l de 'lla al d'ol Gôzefâ... Otro ka câkole 'ffomme! Sê... ö per eddone e m'ă fac

restâ ak: e dez isě k'ê 'ndace 'ffo folâ a la so tomba estamatena bunura, e k'e ä pjö troâd lâ 'l kadaer, e po e m'ă a dec k'e ä est a doi ângei! E kei e g'ăvrês dec essě... ke lü l'éra amô iv! Ma, s'sa po be: fomne, des parole... fati magare pötöst mes, konâ ü! E dopo... ga sarês po 'ndac sössö a ü per d'e nosc amîz, fo lâ a la so tomba, e e ävrês troâd folâ kompâñ k'e ä köntâd sö e done; ma lü... de sigür e l'ă ñamô mia est negű, lü. A... ke m'sa salva pjö ña staolta! L'ă prope zbalâd sö töt akâ lü, poer krest a lü! Ma poa 'l Siñür, ne, pota... lasâl mör essě, po! —. Oter. ...E 'hura, l'ă parlâd lü:

— [A... poer lok a oter, e a rilënt indel kono a krêdega a kel ke i ä a zemô dic i profěc!] Ma, g'ïel mia gösto de patî töt kei laür lâ, ol mesia, e de riâ sö isě 'ndela so glôrea!? —. E a 'nda, 'mpresapök tüzo kei dü lâ a i fomne... l's'ê metîd dre a spjegâga sö de 'l Mozê a töt i profěc, töt kel ke 'nde Bibja a l'predizia de lü, prope.

E, riâc lâ apröf a 'l paîz indokê kei du lâ i se fermaa lâ... lü l'ă fac per tra drec amô (a l'g'ëra prope mia de fermâs lâ, lü). Ma lur i ä po a skuaze öbligâd a fermâs: — Stâ ke ensêm kon notre, dâi... K'a l'ê a tarde uramai, e 'l sul a l'va zo 'ssota — [de sota]: 'ndarët po 'ndoê... a 'l fosk... ka to se ña de 'ste bande, te, po, a?! —.

E jura l'ê 'ndac de det kon lur. E kuando k'i ê stac sentâc zo a tâola... lü l'ă töld sö ü pa, a l'g'ă dic sö la so braa benedişjû, po l'ge n'ă dac ü capêl per ü [e isě (k'i g'ăbe po est det o mia i büz d'i coc indei so ma... ma senza faga tat kazo?) l'g'ă fac ak a lur la so “prima kümiñû”, dopo la so a kei oter lâ indel Senakol... ke lur du i ña sentîd a köntâ sö? Oter.] Po, kasâd zo töt ü bukû... lü kondű pretêst l'ê leâd sö de tâola. E jura... i so ög de lur lâ i ge s'ê dervîc fo, e i l'ă po koñosîd: ma lü... l'éra za bel e skomparîd, e i l'ă pjö est öñ'otra olta! E 'hura, i s'ê dic isě ü kol oter:

— Pota, poer lok a notre, prope! E se, ka... l'ma sa skoldaa sö 'l kör zamô entât k'a m'kamenea e lü l'parlaa e l'espjegaa e profěc! —. Êkola, prope: a i ä rescâd de “ed mia e sent mia” ñe staolta... ög serâc fo e orege stopade, perkê per lur “uramai l'éra za trop tarde” (po... “a ed o a sent ol Siñür... g'ê a mezo de mör sö 'l post”)!

Invece, e tata grasja... saltâc impě a l'ato i ê turnâc lâ söbet a la kapitâl, indoke i ä po

troâd lâ i òndež e kei oter amô d'i so tîc insema, k'i se dizia zemô akâ lur "Ol Gežû l'ê resûsitâd delbû! L'ê bel e persûâz poa 'l Simû, mia 'doma i done!". E isč, poa lur du i â kôntâd sô kel ke g'éra sôcedîd dre a la vja, e k'i l'l'ia po koňosîd adoma 'ndel iscepâ sô 'l pa, a tâola... mei tarde ke mai!

E prope 'ntat ke i éra dre a kôntâs sô tîc kei laûr ke... i s'ê troâc lâ indelmêz... ol Gežû 'n persuna!, ke l'g'â dic isč "Paz a tîc voter, amîž".

Spaentâc asč e zbatîc, i se 'nkredia amô de ed o' speret fantasma d'û mort. Lû perô l'g'â dic isč: — Inkemamera, po, isč purûž? E 'nkemamera, po, tace dôbe 'n kôr? Ardî mo ke i me ma e i me pe: sč... so prope me! Tokîm, po ardi be: û speret... a l'g'âvrês po mia pel ñe os isč komê g'i ô me! — E 'ntat... a l'pesta a zo sô l'impjantîf, e l'batia i ma. E sikome ke i ge rîaa ñemô mia a krêdega delbû e a ês kontčc, tat ke i éra restâc... a l'g'â sirkâd ergôt de majâ! Lur i g'â dac ôna priza de pes röstîd, e lû l'l'â capâd indimâ... e l'l'â a majâd, prope, lâ denâc a lur, e l'â ûlîd a ergôt de biv! Po, l'g'â dic isč ak a lur, tîc insema: — Él mia kel ke ve dizie a prima? Ve dizie mia prope ke bizoña ke l'sôcedês tîc kel ke g'éra skriîd zo de me det indi leber del Mozê, d'i Profčc, e po d'i Salm, e? — E isč l'g'â spalankâd fo la ment a kapî tîta la Bibja, kompâñ de prima kon kei du lâ dre a la vja. E l'g'â dic isč amô: — Isč g'éra zo niger sô bjank! Ke 'l krist a l'g'ia de patî po de turnâ 'ndre iv a 'l so ters de! E ke indêl so nom ge sarâ predikâd fo a tîc ol mond konversjû e perdû, a partî de la nosta pôera kapitâl. E oter, êkola, de 'nkô si a i testemone de tîc... a partî de la nosta pôera Gerûzalêm. E me ve meterô adôs kela forsa santa, ke a nom del me Pader v'ô zemô a tate olte 'mprometida. Intât, a stirî ke in sitâ, finakê kela forsa lě del cel la ve batežerâ kol fôg! [O l'â ûlîd dî, diolte, "e kon kela forsa lě stirî a 'l mond a portâ fo ol Vangël despertôt, finakê l'sarâ 'l momênt del vost batêž indel fôg; e isč turnerî a fam kuruna a me, kompâñ ke v'ie dic"...?]

E dapo kei laûr ke i ê 'ndac de fo tîc insêma, ôna buna traca 'lâ vers a Betaña (ke g'éra lâ amô ol Lazer, eñîd fo de la so tomba a la uz del Gežû); lâ, arsade sô i so ma a 'l cel, a i â benedîc: e 'ntat ke i a benedia a l'se sluntanaa, e l'veñia portâd sô 'n cel.

KUA A 'L “ VANGĚL DEL LUKA ” SEGŎND ME

E ìhura lur, dapo 'mpo de adorasjû... a la finfî i ê turnâc zo tŏc kontêc in sitâ. E lâ i ê stac lâ 'ntre ka e Dom, a lodâ e ringrasjâ ol Dio Ġrand Siñûr Sant, e a teñ viv ol pensêr de lû turnâd indrê a salûdai e a rinfrankai. ...Infin'a kel de lâ ke 'l fŏg del so sant isperet de lû i â po mandâc fo tŏc a la so missjû, amô òna olta denâc a lû kompâñ de prima, ke 'l Gezû s'i ẽra trac insêma aposta, in kei añ lâ. E ki ke òl saigen de pjŏ... se 'l â po kapîd almên ke g'ê pjŏ de sirkâ lâ a Gerüzalêm indoke l'ê 'l Gezû... ma de 'ndaġa dre pŏtŏst a 'l Gezû 'ndoke l'ê adês... a l'g'â adoma de capâ 'ndei ma kel oter leber ke me, 'l Luka, amîz d'i so amîz del Gezû, ò skriîd zo amô, per so grasja, dapo ke ò sentîd amô a tace laûr d'oter, e in partikolâr dapo ke ò koñosîd, e per impŏ a servîd, kela gran konküesta del Gezû mort e resüsîtâd, ke l'se cama Saul, ol Paol. Po... amen, e deograsja!

E poa me ve salûde, kol domandâv isküza, se so mia stac bu de fa de mei (ma l'ê a 'mpo ke... de mei e de mêlega so teâd fo: adês a fo 'l bidêl), e sküza a d'i dupjû ke va sŏmeerâ de troâ det (...a i ê mia roba mea), e de ergotina de impŏ spostâd (pukî, ne) e de ergŏt de zuntâd lâ impŏ... pok elegânt (e l'ê roba mea). Però, me ma par ke l'manke det negŏt de importânt... e ñe ke ga see det vergŏt de fals o de imposibol. Me v'ò mia imbrojâd sŏ... e v'ò be dic a sŏbet de prenspe ke ke isé oter avresev mia “lezîd sŏ ol so Vangêl del Gezû”, ma adoma skoltâd komê la kŏnterês sŏ me bergamâsk de inkŏ ke, dopo ÿ lezîd sŏ a la me manera ol test italâ de kel ke noter a m'cama ol “Vangêl del Luka”: ke l'sarês a di po ol liber de jura riâd ke infina a noter, indokê g'ê skriîd det òna filena de laûr sŏ 'l Gezû e de laûr dic e fac de 'l Gezû, sentîc a kŏntâ sŏ in tace añ de 'l Luka prope d'i so amîz del Gezû, e po skriîc zo adoma kuando ke uramai skuaze pjŏ nigŏ de kei amîz lâ i püdia pjŏ cirkulâ a kŏntâ sŏ a uz kel ke l'êra stac e ke l'ÿa dic e ke l'ÿa fac per noter ol Nost Siñûr Gezû Krist: òna eta lŏminuza, tŏta spen-dida a ês ol vangêl del Dio lüminûz dela eta, e del so reñ poa ke adês (e mia adoma “dopo, de lâ”) per ki ke ga sta. Per noter. E ke isé la see!

Per ün an dumela de göbel... e ü göbel amô de dumela añ. Longa eta! Adio.

Siñûr, siña zo amô te, ke m's'ê semper a kela, ke: ki ke ma salva, sedenô?